

AD ARTEM DIALECTICAM,
INTRODVCTIO
BREVIS ET PERSPICVA

salibus et facetiis vndique aspersa,
pro tyronibus & novitijs elaborata: omif-
sis intricatis & spinosis omnibus,
qua illos retardare & impe-
dire solebant.

* *


*

Ioanne Argallo collectore,
Ædis Ecclesiæ Christi, in Academia
Oxonienfi, olim alumno, nunc apud
Suffolcienses, verbi Dei Ministro, S.
Theologiæ Baccalaureo.

Audiamus, non diserta, sed fortia: Hie
ronym. de Institutione Clericor, ex D.
Cypriano, Epistolar, lib. 2. Epistola,
2. ad Donatum.




LONDINI,
Excudebat *Richardus Bradochus,*
impensis. G. B.



*Elenchus eorum, quæ in hoc
libro præcipuè explicantur.*

1. *Individua.*
2. *Prædicabilia quinque.*
3. *Prædicamenta decem.*
4. *Post prædicamenta.*
5. *Definitio.*
6. *Divisio.*
7. *Quæstio.*
8. *Propositio.*
9. *Æquipollentia.*
10. *Conuersio.*
11. *Loci Personarum.*
12. *Loci Rerum.*
13. *Argumentum, eiusq; quinque genera.*
14. *Collocatio Medii, in omnibus Modis
& figuris.*
15. *Fallacia verborum & rerum.*





Utriusq; Academiae adoles-
centibus studiosis, & iuniori-
bis beneuolis, salutem plurimam.



INITE me, per pati-
entiam vestram (Iu-
uenes in Domino
charissimi) paucis hic
præfari: non enim ha-
beo multa dicere, &
quæ dicturus sum, non in meam, sed
vestram vtilitatem facio præcipue, si
vobis est ocium, & si placet audire.

Ante annos complures, cum in Aca-
demia Oxoniensi inuenis fuisset, *Æ-*
dis Ecclesie Christi Prebendarij, ad insti-
tuendos, & informandos quosdam iu-
niores, in huius artis præceptis, me (nes-
cio quem) adolescentem temerarium,
ex amore potius, quàm iudicio, malè
inconsideratè que elegerunt. Ego itaq;

Praefatio.

pro consuetudine nostri Collegii, *Aristotelis Topica* cæpi audacius prælegere, quæ tamen nec Græce nec Latine intellexeram, neque certè intelligo adhuc. In meipso illud verissimum comperi, quod de quorundam temeritate scribit Plin. iunior, homo doctissimus. *Statim sapiunt, statim sciunt omnia, neminem verentur, imitantur neminem, atque ipsi sibi exempla sunt, Epistolar. lib. octavo.*

Non tamen est hæc omnium earum conditio : commendat enim *Iunium Auitum, & Calpurnium Pisonem*, inuenes verecundos & doctos. *Et Hieronimus pater, suum Nepotianum* laudat, adolescentem (pro ætate) insigniter eruditum & suauissimis moribus imbutum. Itaque ne succenseatis obsecro. Iuueniles meos mores & audaciam ego hoc in loco depingo, omnes adolescentes, sine illorum magna iniuria, temeritatis condemnare non debeo.

Atque, in prælectionibus illis meis, Latine aut vix Latine prolatis (pudet meminisse) Deus bone, quam negligenter

Praefatio.

ter omnia percurrerebam. *Dūmodo* enim aliquid dicerem & effutirem, tempusq; vtcunque contererem, officio meo satis bene functum mihi persuadebam: *Dialectices* verum vsum, neq; intelligebam nec multum de eo laborabam. *Profecto*, vt quod verum est, ingenue fatear, præterierunt aliquot anni, antequam huius verū vsum cognoscere, aut quasi per rimulas aliquas perspicere potuerim. Nūc vero & vtilissimā esse, & omnibus studiosis inuenibus percōmodam, & nobis verbi Dei Ministris, maxime necessariam, confidenter ausim pronuntiare: sine qua, nec *Prophetarum* & *Apostolorum* nervosas Conciones intelligere, nec aduersariorū falsa & captiosa argumenta, commode retexere, & diluere poterimus. *Honestus* quidem *impetus* est, vt dicit *Plato*, quod ad *Eloquentiam* illi rapiantur. Sed retrahendi aliquantisper, & exercendi potius in *Dialectica*, dū sunt iuuenes, quod si non faciant, veritas eos effugiet. Grauiissima sunt hæc verba, & *Platone* dignissima, ideoque a vobis nō

*Plato in
Parm.*

Praefatio.

contemnenda.

Ego vero, quum animum meum huic studio primum applicuerim, duabus rebus impeditus fui, nouis scilicet & peregrinis huius artis vocabulis, & quorundam scriptorum barbarie, & imposito sermone. *Dialecticorum peregrina*, & exotica verba, quamuis in ipso limine vos offendere, & à proficiendo aliquantulum retardare possint, tamen nosse debetis, in omnibus artibus & scientiis, talia esse debere, & legendi loquendiq; assuetudo, ea molliet & faciet suauiora. *Iuuenes* estis, laborate igitur, ut hanc vnā difficultatem (ad scientiam tam nobilem adipiscendam) vincere possitis. *Quae difficilia pulcra*, declinari & penitus hæc tolli non possunt. Mementote quid olim *Milo Crotoniates* fecerit, & præualuerit, Aut, si illud exemplum minus arrideat, *Demosthenes* vobis in mentem veniat, qui, cum impeditioris linguæ fuerit, & in principio orator non bonus, *præliatus est contra naturam suā, & victor abiit, tandemque labo-*

Milo.

Præfatio.

*re suo illud effecit, ut omnium Græcorum me-
rito haberetur, eloquentissimus.*

Quod ad alterum attinet, ostendam
vobis quid ego, ad meam commodita-
tem fecerim: Quum non Latine, sed bar-
barè multos eorum libros scriptos vi-
derem, spinosis & intricatis quæstioni-
bus & quidditatibus inuolutos (*Dor-
bellos, Scotos, Hispanos, Iauellos, Egidios,
Lambertos, Tartaretos, & eius fermenti
similes*) ego eos omnes deposui, et
quasi, abieci. Latiniores, faciliores,
doctiores, et ad usum meliores elegi,
quorum iam (per Dei gratiam) satis
magnus et bonus est numerus, vndique
venalis, non contemnendus.

Atque nuperrimè, cum forte rursus
in *Iauelli* Logicam imperfectam inci- *Iauell us.*
dissem, doctè & subtiliter, sed barbarè
& impolitè scriptam, atque in prima li-
bri fronte, illum *Chrysostomum* nomi-
natum, & quasi de nouo Rebaptizatum
cernerem, non potui me à risu contine-
re. Quasi vero, disertus & eloquens pa-
ter *Chrysostomus* esset Iauello similis, aut

Praefatio.

Iauellus illi. Indignabundus, Hanc rem
maletuli, plumbeum huius os aureo
illius esse comparatum. *Desiderabam* in
illo locos Topicos, et Sophistarum
Elenchos videre. *Sed hac* necessaria omi-
sit, remittens, ad petrū Hispanū, lecto-
res suos: cuius de locis et fallaciis librū
adhuc non memini me vnquam vidisse
Vos itaque, tales *Chrysostomos* præterire
poteritis, & meo exemplo cautiore et
prudentiores esse si velitis, *Atque bene*
spero metādē, post multos annos, aliquo
modo legendo, meditādo, et scribendo
ea cognoscere, et in hoc parū volumē
congeſſiſſe, quæ & mihi ipſi iam ſeni, et
vobis adoleſcētibus, S, *Theologia* ſtudi-
oſis, breui et exiguo labore, aliquantu-
lum proficere poſſint. *Et obnixè* à vobis
omnibus peto, vt quæ hic, in rem ve-
ſtram præcipue collegerim, candide
accipere & in meliorem partē exponere
et interpretari volueritis. Labor meus
fuit, vtilitas veſtra eſſe poteſt, ſi ho-
neſta et licita media non deſpiciatis.

Neque eſt mihi animus quenquam ab
optimis

Prefatio.

Optimis autoribus tam veteribus quā modernis auocare, vt ab Aristotele Stagirita (nobili illo philosopho) *Porphyrio*, *Boetio*, *Ammonio*, aut à *Willichio*, *Porretano*, *Agricola*, *Matthio Philippo*, *Sturmio*, *Erythræo*, *Valerio Ultraiectino*, *Barthol. Keckermannno* (quem honoris causa nomino) aut à nostratibus, viris doctis, & in hac arte multum exercitatis, *Setone Monothalmo* (quem ego Londini puer noui) *Cartero*, eius commentatore: *Stanihursto* verè generoso, *D. Casco*, erudito viro, medicinæ doctore præstantissimo, & his similibus.

Sed vellem vos à faciliioribus incipere: & suppositiones, *Ampliationes*, *Appellationes*, *Consequentias*, *Terminorum probationes*, & spinosa omnia, intricata, superflua, & sine fructu indissolubilia, relinquere & præterire. Nollem vos, pretiosum tempus sic conterere: Non sum longus, vt videtis, ne obrepat tædium. Illud enim *Horatii Flacci*, mihi bene placet.

Quicquid præcipies, esto brevis, vt cito dicta
Per *Horat.*

Præfatio.

Percipiant animi dociles, teneantque fideles.
Tentaui etiam, hic & illic, lepidis sermonibus et facetiis, vos delectare. Porro, et exempla quæ adduco, omnia reddunt faciliora: sunt enim satis nota, et ex sacris literis plerunque petita. Nihil intentatum (pro meo modulo) reliqui, quod vobis vlllo modo prodesse posse, arbitrarer. Potest hic meus qualiscunque labor, ad Aristotelem et alios classicos autores, vobis esse introductio quædam, si volueritis.

Vtcunque placuerit, vel displicuerit, nolite vos aureum hoc iuuentutis vestræ tempus malè perdere, aut procrastinare. Opportunitatem, boni Agricoltæ nullo modo præterire volunt, quorum diligentiâ laudabilem, et vos imitâmini obsecro.

Sunt securi quidam homines, qui de *særa Latronis in cruce pœnitentia*, multû sibi blandiuntur, sed periculose. Sunt similiter negligentes quidam inuenes, qui literarû studiû, cum *Catone sene*, in senectutem differunt, sed inconsideratè

Facilius

Praefatio.

Facilius et tutius est erudiri, dum in
Ephebia vestra estis. Dico enim vo-
bis, quod verum esse experiemini, tales
Catones paucissimos vos inuenturos,
et cum inueneritis tales, dolentes et
conquerentes audietis, quod iuuentutis
tempus ociosè neglexerint: Itaque;

Dum vires, anniq; sinunt, tolerate labores, Ouid. 2.
de Arte.
scuruie
Iam veniet tacito, curua senectula pede.

Valete (optimi et studiosi inuenes) et
Deum precamini pro me sene, qui ve-
stra causa inuigilaui: et qui assiduè so-
leam precari pro vobis omnibus. *Hales-*
woorihia, Suff. Alingtoniorum nobilium, op-
pidi Mercatorij. Anno. gratia, 1605.

Ioannes Argallus.



Dialectica.



IALECTICA,
est scientia seu
ars, de quali-
bet re proposi-
ta, probabili-
ter differendi,
prout cuiusque
natura, capax
esse fidei pote-
rit. *Dialectico,*
probabilitas,

proposita est, etsi non semper eam assequatur
Orator bonus, non semper persuadet, etiamsi
fuerit *M. Cicero*. Medicus peritus non sem-
per curat, etiamsi fuerit *Hippocrates* *Cous*, aut
Galenus pergamenus. Hi, quamvis fines non
semper attingunt, tamen docti esse possunt;
& satis laudabiliter officium suum Præstare,
scilicet, si nihil eorum prætermittant, quæ ad
artis suæ finem pertinent.

Apostolus Paulus apud *Galatas*, officium
suum

suum fecit, & tamen verebatur. ne frustra inter eos laborauerit, Gal. 4. Augustinus pater, Hipponensis Episcopus, bonus & vigilans pastor fuit, & officium suum fecit: tamen, per hæreticos *Donatistas*, *Hippo* ciuitas, multum distracta & turbata fuit. Hoc, nos consolari poterit, si diligentes fuerimus, etiam si laborum nostrorum fructus, & bonos exitus, semper non viderimus.

Zeno,

Huius, Duæ numerari solent præcipuæ partes, Inuentio, & Iudicium: Inuentio quærit, quid quaque de re & quæstione dici commodè possit. Iudicium prudenter perpendit, vtrum illud quod inuentum fuerit, cum regulis *Dialecticæ* conueniat, an non, Zeno Atheniensis, Philosophus Stoicus, & vir doctissimus, manu sua demonstrare solebat differentiam, inter *Dialecticam* & *Rhetoricam*: ac *Dialecticam* compressis digitis, pugno: *Rhetoricam*, iisdem deductis & explicatis, palmæ similem esse dicebat, *Dialectica*, rigida est, & pugno ferit: *Rhetorica* mitior est, & quasi palma sua, caput demulcet, & placidè persuadet.

☞

Contigit (me puero) contentionem Oxonii, inter duos mihi tunc notos ortam fuisse, non de lana *Caprina*, sed quis illorum melior *Dialecticus* esset. Ego, inquit alter: nam ego possum syllogismo probare, te Anserem esse. Quomodo inquit ille? Hoc modo respondet alter;

alter: Anser habet duos pedes, tu habes duos pedes, ergo Anser es. Qui prouocatus fuit, nesciens quomodo ex hoc *Labyrintho* se expediret, socio suo magnam alapam, pugno suo impingit: si Anser sum (inquit) tunc dicere potes, Anserem tibi bonam alapam dedisse. Hic argumentabatur, vt videtis, non Rhetoricè permulcendo, sed Dialecticè feriendo: Argumentum enim soluit pugno.

Dialectici, materiam quæstionis tractandæ, ab aliis artibus mutuuntur, sed viam et Methodum tractandi, à seipsis propriè habent. Tractant Themata simplicia & coniuncta. Themata simplicia, vel quæstiones simplices, sunt simplices voces, vt sapientia, virtus, *Theologia*. Themata coniuncta sunt, ex simplicibus, composita, vt, an sapientia sit virtus? An Theologiæ studium sit amplectendum? Simplicia, tractari possunt commodissime, Diuisione: Coniuncta vero; Argumentatione.

Nullæ definitiones aut descriptiones, nullæque Diuisiones, absque prædicabilibus, & decem *Prædicamentis seu Categorijs*, cognosci possunt: itaque de illis, aliquid est necessario dicendum. Et, quia Prædicabilia ex *Indiuiduis* & singularibus constant, earum natura, primum explicanda est.

Indiuidua.

Dialectica.

Indiuidua.

Indiuiduum est (quasi velitis dicere) infectile et quod diuisionem non patitur. Qua generali acceptione punctum, momentum, et vnitas *Indiuidua* vocari à vobis possunt. Sed hoc in loco, *Indiuidua* vocari solent, nomina propria, & voces singulares, quorum quinq; sunt genera. *Proprium* cuiusque nomen, vt *Abram* (fidelium pater) *Moses*, flumen *Tamisis*, *Londinium*, *Oxonium* mater: *Amabilis Cantabrigia*, soror.

Per periphrasim, & circumloquutionem, vt *Troiani belli scriptor*, pro *Homero*: metropolis *Galliæ*, pro *Parisiis*: doctor subtilis, pro *Ioanne Duns*, scoto illo tenebricoso: doctor *Angelicus*, pro *Thoma Aquinate* (sic enim placet nostris Romanensibus loqui) *Euer* sor *Carthaginis* pro nobili illo inuene, *Scipione*: *Virginis* filius, pro mundi saluatore, *Iesu Christo*.

Pronomen Demonstratiuum, vt hic & ille *Homo*: *Hic est filius meus dilectus, in quo mihi bene complacui, ipsum audite, Mat. 17. Hic est heres, occidamus illum, vt nostra fiat hereditas, Luc. 20.* Et, nisi ego fallor, *Aduerbium Demonstratiuum* huc referri potest: vt, bonum est nos (*Hic*) esse. *Faciamus (*Hic*) tria Tabernacula, Mat. 17.*

Per

Per Excellentiam, vt apostolus, pro Paulo: Poeta, pro Virgilio: Orator Romanus, pro Cicerone: Orator Græcus, pro Demosthene, & si vultis, Commentator, pro Auerroe, Arabico. *Individuum* Vagum, & indeterminatum, vt quidam homo descendit ab Hierusalem in Hiericho, & incidit in Latrones, Luc. 10. Homo quidam erat diues, qui habebat dispensatorem, Luc. 16. Quicumque *Individuum* vagum adfert, quamuis aliquod singulare velit, tamen perplexè & dubiè loquitur. Atque note (boni Iuvenes) omnia individua, naturam restrictissimam habere: ideoque inferiora nulla continere, quibus realiter tribui possunt. Hinc est (vt ego auguror) ea appellari *Individua*, quasi dicatis, *indivisibilia*, in inferiora,

Pradicabilia.

Pradicabilia, sunt voces communes & generales, vt Genus, Species, Differentia, Proprium, & Accidens: quæ omnia sub se comprehendunt inferiora sua. Atque hic obseruate, nullam Metaphoram facere verum genus: vt, *Ecclesia est Arca Noe: Cæna Christi, est mensa Domini*. Verè hæc dicuntur, sed vera genera vobis non sunt dicenda. Metaphora enim, non dicit quid res sit, sed cui similis sit, quod vobis diligenter notandum est.

Horum prædicabiliū doctrina, ad Definitiones & Diuisiones multum conducit: quæ sine generibus & Differentiis confici aut intelligi, neutiquam possunt. Secundo, horum adminiculo, propositionum & syllogismorum termini iudicari possunt, vt hinc, qui quibus in prædicando iungi possint, diiudicare valeatis. Nec, solidè inuentio *Medii* vel generalis, vel specialis, sine horum doctrina commodè fieri posse, certò cognoscatis.

Genus, habet sub se plures species: Species duplex est, media seu interiecta, & infima. Species infima, sub se plura Indiuidua: Species media (cum etiam genus sit & regi similis) habet sub se, alias species inferiores, quasi subditos & Vasallos suos, vt animal, hæc duo, Brutum & Hominem.

Quodcunque huic quæstioni, quid hoc aut illud apte responderi potest, est aut genus aut species: vt, quid est Paulus? Homo est: Homo, eius species est. Quid est homo? Animal: Animal est eius genus.

Genus in suas species, Species in sua Indiuidua, vt totum in partes distributum, orationis bonam copiam suppeditat, & memoriam, tum docentium tum audientium, mirifice iuuat.

Differentia triplex est, Communis, Propria, & maxime propria

Communis, est accidens separabile: hoc modo Socrates vir, à seipso puero distat, & Paulus à Paulo. *Cum eram puer, loquebar ut puer, quando autem factus sum vir, enacnani quæ erant paruuli*, I. Cor. I 3.

Propria, est accidens inseparabile: Ita oculus cæcus differt ab oculo vidente, & homo absque cicatrice, a seipso postea cum cicatrice Cæcitas oculi, vulneris cicatrix, corporis sunt accidentia inseparabilia, Ebriosi homines, non ratione sed poculis contendentes, inter pocula, poculis sæpe feriuntur & vulnerantur, vulnerati Chyrurgos quærunt, curati pulcrè cicatrizantur, Iactitent hi vinosi homines, fortiter accepta vulnera sua, ostendât & ostentent multiplicatas cicatrices suas. Nolo ego sobrius illi scum, tale accidens inseparabile possidere.

Maxime propria Differentia, certam speciem procreat, & est Prædicabile, de inferiori specie, & omnibus eius Indiuiduis prædicans in quale: vt, qualis est homo, aut qualis est *Ioannes a Deo dilectus*? Aptè respondemus, esse rationales.

Communis & propria Differentia, faciunt rem dissimilem & diuersam: maximè propria, ab aliis omnibus, non modo diuersum, sed aliud, aliam scilicet naturam & Substantiam, *Porphyr. de differentia, chap. 3.*

Differentia, alia Diuidens, alia Constitu-

ens. Diuidens, qua genus in species diducitur, vt rationale & irrationale, diuidunt Animal, in hominem & brutum. Itemque volatile terrenum & aquatile, eidem animali adiuncta, bestias omnes separant & distinguunt. Nam bestiae omnes, sunt aut volatiles, terrenae, aut aquatiles. Quibus, quartum genus (Amphibium) addi potest, vitam degens, partim in terra, partim in aquis, vt Rana, Crocodilus, Testudines, Lacertae, serpentes aliqui, sed non omnes.

Differentia Constituens, addita proximo generi, non diuidit speciem, sed procreat: vt, sentiens additum corpori animato, efficit animal: animal rationis particeps, hominem: rationis expers, seu irrationale, procreat bestiam.

Omnis differentia Diuidens, est superioris: Constituens, inferioris, vt rationale ad animal superius, est Diuisiua, ad hominem inferiorem, Constitutiua.

Proin, dominus deus Papa, superiorē non agnoscens, inter has nostras Diuisiuas, locum habere non potest. Alibi, eius egregiam personam, prout dignus & condignus est, reponemus.

Proprium, conueniens omni, soli, & semper: Soli speciei suae: omnibus eius speciei Indiuiduis, & semper: vt homini risibile, equo hinnibile

bile: aptitudinem denotans, non actum. Itaq; Porphyrius in Isagoge, hominis Propriū vocat, aptū ad risum, quāquam rariū actu rideat. Quemadmodū de quodam Crasso, in Parthis Crassus. interempto. & ob id, *Agelastū vocatum*, Plinius testatur, lib. 7. cap. 19. Et vir sapiens, vix tacitè ridebit, ut apud Siracidem habemus, ca. 21. Et tamen vir sapiens, semper risibilis est. Voces conuertibiles sunt hæc: Definitio, & Definitum: Differentia & sua species. Proprium similiter cum sua specie: Totum, & omnia membra diuidentia, simul sumpta.

Accidens Predicabile (teste Damasceno) seu Accidens commune, est, quod de pluribus specie differentibus prædicatur in quale: ut quales sunt *Monachi Papistici* profectò, ociosi & luxuriosi patres. Signāter, Argallus dixit patres, filios enim habent & filias, ad aliorum Caminos sese pulcrè calefacientes.

Definitur etiam Accidens esse, quod adesse & abesse potest, sine subiecti cui inhæret interitu, & tamen non sit eius pars, aut corporis aut animi eius.

Huius duo sunt genera. separabile & inseparabile: Accidens separabile est, quod subiecto suo, re ipsa facile detrahi potest, ut candor parieti, chartæ, panno, & similibus. paries enim potest esse paries, quamuis non sit albus, & charta potest esse charta, quamuis atra.

Polus.

Accidens inseparabile, quod re ipsa non potest separari, sed duntaxat cogitatione : vt, calor & leuitas ab igne, pondus à saxo, humor ab aqua, magnitudo & color, à corpore : sic etenim olim edocti fuimus. Incredibile forsan hoc vobis videbitur, ignem imaginari sine calore, saxū sine pondere, aquā sine humore, corpus sine magnitudine. Nisi velimus cum poli sodalibus (vt est in *Erasmi spectro*) fateri nos immanem Draconem nescio quem, in nubibus imaginando videre, vbi nullus Draco videri potuit. Qui tamen, urgente *Polo* (homine festiuo) & digito locum demonstrante, ne parum nasuti, aut inciuiles viderentur, fassi sunt se iam illocū, os igniuorum, caput, pedes, alas, & caudam tremendam, manifestè videre & contemplari.

Audiui apud Oxonienses (me puero) Exorcistas & Necromanticos, præ cæteris habere fortes imaginationes. Quales (vt ego autumo) fuere, *septem illi filij, cuiusdam Senæ Iudæi, principis sacerdotum, vt est in Actis Apostolicis, chap. 19.* Imaginentur itaque illi, ignem sine calore, saxum sine pondere, & aquam sine humore. Non est mea imaginatio satis fortis, vt hæc imaginari queam : Certe, Exorcista & Necromanticus non sum, neque per dei gratiam, vnquam esse volo.

Dicuntur Accidentia, de subiecto suo, in concretis

concretis Adiectiuus, non in Abstractis substantiuus: vt, *Achilles Homericus*, est iracundus homo, & implacabilis, non autem rectè dixeris, *Achilles est ira*: *Orlandus est furiosus*, non furor, si propriè & aptè loqui voluerimus: *Hieronimus*, est doctus pater, non doctrina. Nemo hoc modo Latine & purè loquitur.

Excipitur ab hac regula & Limitatione, *Deus* Opt. Max. qui non solum est misericors & iustus, sed ipsa misericordia, ipsa iustitia. Et, *Christus deus*, non solum est verax, sed ipsa veritas, in Abstracto, *Ego sum via, veritas, & vita*, *Ioannis* 14. *Via in exemplo, veritas in promisso, vita in premio*, *Bernard.* in *Ascensione domini*, *serm.* 2.

Omne prædicabile, aut in quid, aut in quale prædicatur, non æquiucè, sed vniuocè: sic enim Dialectici loquuntur. Vniuoca dicuntur, quorum nomen est commune, & ratio substantiæ, omnibus suis vniuocatis seu significatis, eadem est: vt, homo, bos, leo, equus, sunt animalis vniuoca vniuocata, quoniam in nomine, & in communi ratione substantiæ animalis conueniunt.

Æquiuoca, seu ambigua sunt, quorum solum nomen commune, definitio vero, seu ratio substantiæ, diuersa. *Canis* nomen, æquiuocum est, significans ambiguè, aut animal terrestre, aut sydus cæleste, Nomen *canis*, conuenit v-

trisque his æqui-uocatis, sed canis substantia
vtrisque illis conuenire non potest. Conueni-
ant necne, minime curo: *Inter Canes* æqui-u-
cos (qui nihil præter ossa habent) cænare no-
lo. *Inter vos* (inuenes) cænare in oppido volo,
si quid boni cibi habetis. Ego enim vos, dia-
lecticè instruo, & vos me senem, cibo vestro
reficere & exhilarare debetis.

Æqui-uoca similiter duplicia sunt, *Æqui-*
uocantia, & *Æqui-uocata*. *Cancer*, æqui-u-
cans est: at animal *Amphibion*, morbus *Can-*
cer, & *Cancer* sydus cæleste (quæ voce *cancr*i
significatur) æqui-uoca æqui-uocatadici solent.

Rursus dico, Genus & species in quid præ-
dicantur, reliqua tria prædicabilia, in quale.
Percontanti enim, quid sit *Abraham*, aut quid
sit *David*, homines esse bene respondemus,
homo vero est species. Roganti quid sit bos,
aut quid sit homo, animal esse apte dicemus:
animal vero, hominis est proximum genus. Si-
militer, si quæramus, quale aliquid sit, vt qualis
sit homo, per reliquorum *Prædicabilium* qua-
litates respondere commodè poterimus, esse
rationalem (quæ est hominis differentia) risibi-
lem, (hominis proprium) doctum, indoctum,
clementem, crudelem & truculentum, quæ e-
ius sunt accidentia & qualitates. *Irus ille Ho-*
mericus, qualis fuit? Pauper fuit, mendicus, oci-
osus, & impudens nebulo fuit, *fruges consume-*

re natus: pulcræ sanè, & perbellæ qualitates. Itaque Vlyssus pugno (domum reuertentis) percussus, cecidit, & sicut magna bestia (prout dignus fuit) humi prostratus, vno ictu, magnus nebulo verberatus, mortuus fuit, sepultus annon, me latet, neque profectò multū curo.

Cum alterum de altero, tanquam de subiecto inferiori dicitur; quicquid de predicato dicitur, id omne de subiecto quoque dicitur, vt Socrates est Homo, homo est animal, animal est sentiens, ergo Socrates est sentiens. Hæc regula, vocatur prima regula Antepredicamentalis, & valet in ordine essentiali superiorum & inferiorum, in eadem Categoria. Habetque rationem Argumenti Soritis, de quo postea, dicendi locus commodior dabitur.

Secunda regula Antepredicamentalis, hæc est: Diuersorum predicamentorum diuersa genera, diuersas habent differentias, vt animal et scientia, Arist. in Antepredicamentis cap. primo. Hoc etiam, de eiusdem Prædicamenti generibus, quæ diuisione inter se opponuntur, intelligi potest: vt animal & planta, corpus & spiritus, quæ sunt in substantia: Numerus & oratio, quæ sunt in Quantitate. Quæ, tametsi in eodem Prædicamento sunt, tamen non vnicam, sed diuersas habent differentias.

Nullus Chrysippus, nullus Carneades, etiamsi Helleboro sese purgaret, potest generibus a deo

deo diuersis, vnicam solam differentiam coaptare.

Predicamenta, seu Categoria.

Predicamentorum doctrina, ipsa canicie venerabilis est, (vt notat *Bartbol. Keckermannus*) ab Archita Tarentino, Pythagoræ discipulo (qui circa annum mundi, 3422, docuit) primum tradita, teste Simplicio, in præfationem super Prædicamēta. Habentque ea vtilitatem magnam, quemadmodum mox audietis. Qua, vos iuuenes, nullo modo carere poteritis, si boni Dialectici esse velitis.

Prædicamenta hæc, seu Categoriæ, continent generum & specierum ordinem, secundum sub, & supra. Et numero decem solummodo existunt, non autem viginti, i. decem bona & decem mala, vt vetus Pythagoras voluit, quem admodum legere poteritis, *lib. pri. Metaphys. Aristotelis*.

In vnoquoque prædicamento, duæ sunt lineæ, recta & lateralis seu transuersa. In recta linea, ordinantur genera et spēs vsq; ad infima et specialissima: à latere locuntur differentię et discrimina. Hæc predicamēta vocantur *generalissima, suprema & prima*, quoniā nihil est illis Vniuocè superius et prius, et nunquā esse possunt species. Species vero infimæ, seu specialis-
simæ

simæ, quæ in infima cuiusvis predicamenti serie locantur, nunquam esse genus, semper species, ut homo et equus. Species interiecta seu media, et genera esse possunt et species, ut animal et brutum. In toto hoc mundi theatro et Vniuersitate, quicquid est et existit aut est *Substantia*, aut *Accidens Prædicamentale* vnde hoc vetus Distichon.

*Summus Aristoteles, trutinans cacumina rerū.
In duo diuisit, quicquid in orbe fuit.*

Generis ratio et inuestigatio, eadē est in substantiis, et prædicamentis Accidentalibus quibuscunque. siquidem; non minus accidentia quàm substantiæ ordines suos prædicamentales habent, et per consequens generū et specierū tabulas dispositas, si quis diligens lector eas voluerit quærere et inventas disponere.

sed, id quod generi addendum est, et per quod præcipuè definitum determinatur, non ita est semper in Accidentibus. ut in substantiis. Cōmentator itaque benè obseruat: *Qui dicunt* (inquit) *Accidentia non habere definitionem, minus dicunt quam habent: sed qui dicunt Accidentia habere definitionem, plus dicunt quam habent.* Vtrumque enim, suo sensu, verū esse potest.

Anerrois.

Horum decem predicamentorū utilitas præcipua, duplex est: Primo, ex illis, omnium rerum attributa & prædicationes desumuntur: secundo,

Secundò , ad definiendum & diuidendum conducunt, sine quibus, nihil in artibus, nihil in docendo, scribendo, aut in vita hac humana & fragili, commodè tradi potest aut explicari, Sic Aristoteles ipse, Animæ definitionem quærens, eius genus ex prædicamentis inuestigat vtrum in substantia, aut in Qualitate, aut in Quantitate, aut in quopiam alio reperiri poterit: Arist. 1 lib, de Animo. Hoc Aristoteles fecit, vt nos (cum res postulet) similiter faciamus.

Nulla est vox, seu singularis, seu communis, quin commodè, in aliquo horum Prædicamentorum inueniri possit, his paucis, quæ in his versibus subsequentiis sequuntur, exceptis,

Vox artis, Consignificans, Priuatio, Fictum:

Pars, Deus, Excedens, Complexum, vel polysemus

Ista Categoriis, haud possunt verba locari:

1. Voces artis, viz. vt meræ sunt artis voces, seu voces secundæ intentionis, vt Genus, species, differentia, proprium, & Accidens, & multa plura his similia. Qualia, non solum in dialectica, sed in omnibus aliis artibus & scientiis, reperiri solent.

Restamen quæ sub his vocibus continentur, in Prædicamentis collocantur.

2. Consignificantia, quæ sunt plerunque indeclinabiles Grammaticæ orationis partes, vt præpositio,

præpositio, Aduerbum, Coniunctio: & Inter-
iectio.

Priuationes, nullam rem actu, sed potius rei
absentiam significantes. vt Mors, Cæcitas, Te-
nebræ. 3.

Ficta, vt *triceps* Cerberus, Chimæra, & nes-
cio quis, S. Christophorus, trunco suo Abyssum
penetrans, magnitudine & mole, Taurum A-
fiæ montem superans, & (Papyraceum) pur-
gatorium papisticum, *Hardingo* nostro teste,
de eius cognomine si quis Papicola subdubita-
re forsan voluerit. 4.

Pars, vt manus, pes, digitus, brachium, per
se in nullo, sed ratione totius. 5.

Excedens, seu *Transcendens*, vt Ens, Res, Ali-
quid, Vnum, Verum, Bonum (& vt paululum
hic iocer & meipsum recreem) Dominus deus
noster papa, & similia, confusè & indiscrimi-
natim, omnia ferè significantia, omnia fere
discurrentia. 6.

Complexū i. tota oratio: quæ in nullo prædica-
mento inuenitur, nisi ratione partium, vt,
Moses fuit omnium, hominum mitissimus, Num.
12. Moses homo, in substantia: mansuetudo,
in Qualitate. 7.

Polysemus, vèl *Æquivoca*, seu ambigua,
locum nullum habentia in vlla Categoria, nisi
distinguantur in sua significata. *Æquivoca*-
ta sua, in prædicamentis, nidum inueniunt: 8.

Ipsa

1 Cor, 4,

Ipsa verò Equiuoca indistincta, vt sal insipidum, vt peripsēma & purgamenta Mundi, in sterquilinum meritò eijcienda sunt.

Quod vero ad deum Opt. Max. attinet, rectius à nobis, non solum substantia, sed perfectissima appellari potest: nisi hoc melius placeat, nullibi includi, quia infinitus sit, secundum illud Salamonis, *Ergone putandum est, quod vere deus habitet super terram? Si enim calum, & calicelorum te capere non possunt, quanto maius domus hac, quam ego dedicaui? i. Reg. 8.* Dico igitur (pro meo modulo) & pronuncio, Cælum capere, comprehendere, & constringere incomprehensibilem deum non posse, multo minus Substantiæ prædicamentum, hoc verè præstare posse: sequitur iam prædicamentum substantiæ.

Substantia.

Pythagoræorum ea fuit superstitio, vt nihil absolutum putarent, nisi attingeret numerum Decennarium. Hunc ergo, numerum sacrum, tum rerum principiis, tum etiam his prædicamentis assignarunt, vt *Simplicius* annotat, *Aristoteles* etiam, ne in philosophiæ vestibulo & limine, magni *Pythagoræ* discipulos offenderet, & auditores suos à se alienaret, hanc prædicamentorum decada, prudenter retinuit

Interim

Interim tamen satis probauit, decennarium hunc numerum, non ita strictè se obseruare. Siquidem illa quatuor vltima prædicamenta, ita leuiter & quasi negligenter perstringit, vt ea verius enumeret quam tractet. *Et lib. 5. physicor.* sex tantum repetat: reliqua tanquam minùs necessaria omittat, quemadmodum doctissimus *Keckermannus*, optimè expendit.


Atque de substantia agendum est primo, vt de omnium Categoriarum perfectissima: Est enim omnium accidentium fundamentum & *Basis*, à qua, nouem posteriora sustentantur: namque sine substantia, esse non possunt.

Substantia, alia est prima & singularis, vt Indiuidua: alia est secunda, quæ est communium & vniuersalium, vt homo, animal, corpus: bestia, vt leo, & tardus Asinus, *animal* (scilicet) *auritum, solidis & stolidis pedibus incedens & facundum, facundum non audemus pronuntiare.*

Substantia prima, propriè, principaliter, & maxime substare dicitur, vt *Socrates, Plato*, quæ neque in subiecto est, neque de subiecto vlllo dicitur. Et, nisi hæ singulares & Indiuiduales substantiæ essent, secundæ substantiæ generales non essent neque existerent.

Substantia, alia corporea, alia incorporea: Corporea, simplex et concreta. Incorporea, vt spiritus

ritus cuius tria sunt genera, *Deus, Angelus, et Animus hominum immortalis*. Angeli boni, vt Raphael, Gabriel, Michael. Mali, vt Diabolus, viz, Beelzebub, Legion, & horum similes. Tabula hæc proximè sequens, vobis hæc omnia melius demonstrabit.



Metalla hæc, quæ inter substantias inanimatas perfectas numerantur, præcipua hæc sunt, Aurum, Argentum, Es, Stannum, Ferrum, Plumbum. Inter quæ, *Aurum & Argentum* præcipue laudo, & extollo, quemadmodum eorum locus & dignitas requirunt, eaque reliquorum Reginam & Dominam pronuncio. Sed, ea non possideo, neque profecto multum curo, ne cum possideam ea, possidear ab eis. *Omniū enim malorum radix, est Philar- guria*, I, *Tim.* 6. Dicam enim vobis, quid mihi in pecuniis paucis reseruandis, ante triginta annos, male contigit. D. *Ioannes Delaberus*, seu de la Barr, (ab antiquis Normannis, ante quingenta annos, si velit, profapiam deducens) verè generosus, nunc apud Eboracenses, Medicinæ doct̃or eruditissimus, mihi in agro deuonienſi, Rectoriam de Cadleigh (non procul à ciuitate Exonienſi) comparauit, In quam cum *Inſtitutus & Inductus* in realem poſſeſſionem fui (ſic enim loquimur) ex *Decimis meis*, quædam vendidi, nimmosque inde prouenientes, ad tempus aliquod; cum Euclione, in Olla mea reſeruauit: volui enim eſſe diues. Qui adeo me, dum illos haberem, die noctuque diſcruciabant, ne ſcilicet veteres illi fures, inter *Hieruſalem & Hiericho* deſcendentes, *fores noſtras* effringerent, & propter *Mammon iniquitatis*, me leuiuium relinquerent, vt

profec̃to nunc malle[m] cum Biant[e], absque illis esse, quàm cum illis malè perire. Eant itaque (in malam rem) quocunque voluerint: volente deo, *Argallum* senem, non cruciabunt amplius. *Auream mediocritatem*, quam auri copiã (si velitis credere) potiùs exopto & desidero. Hæc itaque Horatii carmina suavissima, mihi optimè placent.

Horat.
Carm. lib.
sexto.

Aureã quisquis mediocritatem

Diligit, tutus caret obsoleti

Sordibus tecti, caret invidenda.

Sobrius Aula.

Sepius ventis agitur ingens

Pinus: & celsæ grauiore casu

Decidunt turres, feriuntq[ue] summos

Fulmina montes.

Abraham, fidelium pater diues fuit, Sed *petrus*, Christi Apostolus, pauper fuit. *Argentum* (inquit) *et aurum, non habeo*, Act. 3. Bonus *Lazarus* et pauper et mendicus fuit *Luc. 16* Iro *Homerico* pauperior, sed multo honestior Hoc itaque, paupertatis nostræ acerbitem lenire potest, si consideremus, non solum diuites, sed pauperes & mendicos, ad Regnum dei pertinere.

Huius Substantiæ, quatuor sunt proprietates: Primo, nulla Substantia, aut prima aut secunda est in subiecto vlllo: quia, inesse subiecto, Accidentis est, non Substantiæ, Quæ, vt
Corban

Corban Iudaorum, aut Fiscus papa, omnia recipit, & ad se corradit Secundo, vna substantia non est alteri, verè contraria. Inter eas, Oppositio qualiscunque esse potest, vera contrarietas, nunquam. Tertiò, Substantia nostra, non suscipit magis & minùs. Sic, homo infans, aut Pygmæus bipedalis, non est minus homo, homine viro & adulto. Sicque magnus Hercules, cum Leonino pelle, & fusce terribili, *aut Gigas Goliath, de Geth Philistæus incircumcissus altitudinis sex Cubitorū & palmi, i. Sa 17*) non magis homines sunt, quam parvus Zaccheus, *aut parvus David*, inter omnes fratres suos (quasi Apostolorum minimus) & ab illis inuisus & odiosè contemptus. Tamen maius & minus suscipere dicimus: omnes enim substantiæ, non sunt eiusdem magnitudinis.

Quarto, quamuis illi nihil sit vere contrarium, tamen substantia nostra, est contrariorum susceptibilis: planè loquor, vt intelligatis Homo enim, aliquando bonus, aliquando malis, imò pessimus: eademque manus, aliquando frigida, aliquandò calida est, quæ verè contraria sunt,

Quantitas.

Hoc Quantitatis Predicamentum, nunquā intellexi iuuenis, neque profecto adhuc intelligo

ligo, senex. Atque bene nemini, me barbati-
lum, semper vereri Mathematicos nostros, de
hac Categoria mecum disputantes, ne ad Ab-
surdum, seu ad (non plus) ut loquuntur, in hoc
agro ignoto, me adigerent.

In hoc prædicamento difficili, apud nos
Oxonienfes, sese perdidit, subtilis ille disputa-
Wardus. tor *Wardus*, qui à reuerendo patre, *Thoma*
Cranmero interrogatus, an Christi Corpus, se-
cundum veras corporis Organici dimensio-
nes, esset in Sacramento Altaris, multa enar-
rans, nesciens quomodo se expediret, tandem
hoc modo rem controuersam pulcrè conclu-
sit, Chisti corpus in sacramento Altaris fuisse
(*Quantum*) sine modo (*Quantitativo*) quam
responsionem, neque ipsum, neque vllum ali-
um intelligere arbitror.

Scio huius Categoriae cognitionem, Mathe-
maticis multum conducere: nobis vero Theo-
logis, non esse ita necessariam existimo, aut si
fuerit, eius plena vtilitas, non adhuc mihi cog-
nita est. Nisi forsàn, ad intelligendam *Arce*
capacitatem, Gen. 6. aut ad *Templi Salomonis*
structuram & Symetriad melius intelligendam
(*cuius Rex Salomon meminit, I. Reg. 6. & post*
eum, propheta Ezekiel, cap. 40) aliquantulum
proficere, arbitrari debeamus. Aliquid tamen
hic, de illo dicendum est, ne *Academici nostri*
meæ fidei committens decem Prædicamen
ta,

ta, me aut clanculum furatum esse, aut negligenter vnum perdidisse, merito vociferentur. Hoc itaque est, quod *de Quantitatis* Categoria, habeo dicere. Sin vero quæ dicturus sum non placeant, mementote obsecro quid nuperrime fasius fuerim, Quantitatis Categori-
am me nunquam intellexisse : hoc ego ingenuè agnosco, vos itaque quæso, ignoscite.

Quantitas, rerum omnium Magnitudinem, & Multitudinem seu numerum complectitur. Cuius, alia est coniuncta seu continua, alia Disiuncta seu discreta. Coniuncta, vt linea, superficies, corpus, locus, & tempus. Disiuncta, vt numerus & Oratio. Linea, ex punctis: superficies ex lineis, corpus ex superficiebus constat. Aristoteles, huic minutulo puncto (quo nihil esse potest minus) duo officia verè tribuit: primò, quod magnitudinem continuet, secundo, quod terminet & ad finem & periodum, eam perducatur. Huius magnitudinis (in diuitiis accumulandis) continuationem & progressum, in infinitum vsque optant auari homines, quia insatiabiles sunt. Habeant itaque puncta infinita, sed præter puncta, nihil habeant, obsecro Locus arctus & spaciosus, proprius vel communis, in quo locatum & corpora continentur. Tempus breue, longum, præteritum, præsens, futurum. Huc refertur Annus, eiusque

partes, Ver, Aestas, Autumnus, & Hyems.

*Poma dat Autumnus, formosa est messibus aestas
Ver præbet flores, igne lenatur Hyems.*

*Ouid. de
Rem lib.
primo.*

Omnis Quantitas Coniuncta, substantiam mensurat per lineam, superficiem, perque has tres corporis dimensiones, Longitudinem, Latitudinem, & profunditatem, perque locum & tempus. Locus est superficies corporis continens, & circundantis locatum. Videtis itaque (inuenes) si animaduertatis, locum locatum suum metiri & commensurare. Tempus etiam, est mensura Substantiæ mobilis, quatenus est in motu, non quiescens. vid. præd. Quando, de quo postea.

Corpus solidum & materiatum, est in Prædicamento Substantiæ: Mathematicum corpus, cum hac sua trina dimensione, Longitudine Latitudine, & Craffitie, in hoc Quantitatis prædicamento elocandum est. Quæ tres dimensiones, respectu Substantiæ, accidentia dicuntur, sed inseparabilia: respectu Quantitatis, differentiæ & Discrimina.

Disiuncta, seu Discreta Quantitas, duplex, est, Numerus & Oratio: Numerus, est vnitatū collectio, substantiam similiter numerans. Nam, per numerum Denarium, decem lapides, aut decem homines numerare poterimus, & per quaternarium, Elementa quatuor.

Numerus, vt Duo, quinque, decem, centum,
mille,

mille, & mille decem. Itaque, *decies mille Talentorum*, cuius *Matthæus* Euangelista meminit, cap. 18. à rege *Munifico*, seruo suo nequam & malo, remissum & condonatum, huc aptè referri potest;

Arithmetica, omnis generis numeros tractat, & in illis, tanquam in propria subiecta materia, versatur: cuius scientiæ aliquam noticiam, non solū *Dialecticæ* candidatis, sed etiam omnibus hominibus maximè necessariam esse, nemo sanæ mētis inficiari potest. Digitos enim tuos, sine hac, numerare non potes.

Oratio, pro voce, quæ aurium sensum mouet, & à nobis auditur, est in tertia specie prædicamenti *Qualitatis*, *Stentoris Homericæ* vocalitas, quæ tanta esse dicitur, quanta aliorum quinquaginta,

Magno si quicquam credas Homero.

Huc pulcrè referri potest, & in hac parte *Ca-* *Iuuenal.*
ategorix, locum habere suum. Sin verò hæc oratio accipiatur, pro vocum & syllabarum longarum breuiumque dimensione, ad Poetas & Musicos spectante, ad hanc *Quantitatis* *Categoriam*, iure suo referri debet.

Adeste itaque huc, o vos mendaces & indocti Poetores, qualis *Chærilus* fuit, & huc intromitemus vos. Excluset vos de *Repub. sua*, *Diuius Plato*. Mitius vobiscū hic agemus, *Dialectica* nostra recipiet vos, modo velitis esse

pacifici homines. Satyrica vestra carmina, vibranda sunt & contorquenda, non in bonos, sed in malos & pessimos homines. Hoc fecerunt veteres Poetæ boni, si eorum vestigia sequi volueritis: *Tertullianus*, vetus pater, vobis non fauet: dicit enim *libro de Anima, Poetis, nec vigilantibus credam*. Et ex vestro sodalizio non postremus homo, vos cum pictoribus comparat, & ambos mendaces affirmat

Pictoribus atq; Poetis

*Horat. de
Ar. Poetica*

Quilibet audendi semper fuit æqua potestas:
Fuerunt itaque illorum ætate, multi mendaces & somnolenti poetæ, ut olim & nunc, multi inter nos, plus satis pruriginosi scriptores, Poetores & Poetridæ, quamvis non omnes. Excipio enim (honoris causa) *Galfridum Chaucerum* (*Homerum nostrum*) *Ed. Spencerum*, *Sam. Danielem*, *Mich. Draitonum* & quosdam alios.

D. Philippum Sidnæum, equitem Auratum, virum nobilissimum, inter Poetas enumerare non audeo: quamvis in Poesi, nemini secundus fuerit. Ponamus eum potius inter Proceres optimos, prout optimè meritus fuit. Heroum veterum expressam imaginem, Orbis miraculum, in bello magnanimum, in pace prudentem. Cuius virtutes eximias admirari, assequi vix vnquam poterimus. Ad alias igitur res festinet oratio nostra.

Punctum,

Punctum; est principium lineæ, & vnitas seu vnum, principium Numeri, vt modo diximus. Omnis enim numerus, ex vnitatibus consistit: hæcque duo, in hoc Quantitatis prædicamento non sunt per se, sed respectu Lineæ & Numeri, quorum principia sunt.

Mensurarum & ponderum nomina, quibus vel liquida, vel arida, vel quodcunque aliud metiri soleamus, qualia sunt Amphora, Congius, Tricongius, Sextarius, & Modius: Porro & Vncia, Semis, Libra, Triens. Similiter passus, stadium, Leuca & Vlna cum Pertica (sexdecim vel octodecim pedes longa) huiusque similibus, huc pertinent omnia.

Et, quoniam de ponderibus & mensuris verba facimus, cauendum nobis diligenter, quomodo in vendendo & cōmensurando metiamur fratribus nostris, vt iustè illud faciamus absque fraude & dolo malo. *Statera iusta, modius iustus, æquisque Sextarius, ego Deus.*

Ne, dum modius & libra in Quantitatis prædicamento locum habeant, nos locum inueniamus in Prædicamento Infernali, cum Diabolo & Angelis eius, vbi tenebræ sunt, lacrymæ, & stridor dentium. *Abominatur enim Deus noster eum, qui talia faciat, Deut. 25,* Ponderibus, & mensuris suis malè proficiunt, qui metiendo & mentiendo, Gehennam & Orcum sibi comparant.

Exod 19,

Sterilis

Senec. Her.
fur.

*Sterilis profundi vastitas squalet soli,
Et feda tellus torpet aeterno situ,
Rerumque maestus finis, & Mundi ultimus:
Immotus Aer haeret, & pigro sedet
Nox atramundo, cuncta in mœrore horrida,
Ipsaq; morte, peior est mortis locus.*

Melius foret cum Dyogene Cynico oleribus
vesci, quam hoc modo ditescere, & postea cum
Cacodemone, inferorum æternas pœnas male
experiri: Itaque, caute.

Quantitatis, tres sunt proprietates: primo,
illi nihil est verè contrarium. Secundo, non
suscipit ea hæc Aduerbia, magis & minùs: ma-
ius & minus suscipere, non negamus. Trian-
gulum enim, non est altero magis & minùs
triangulum, licet maius & capacius, vel minus
& arctius esse possit. Tertiò, maximè proprium
est Quantitatis finitæ, secundum eam, æquale
aliquid vel inæquale dici. Infinita vero Quanti-
tas, quasi Papa transcendens, Monarcha Mun-
di, superiorem non agnoscens, hisce legibus
non vult teneri, & constringi.

Scholastici quidam scriptores, nescio qua
valida ratione permoti, quantitatem sextupli-
cem faciunt, scilicet Magnitudinis, Multitu-
dinis; Ponderis, Perfectionis, Durationis, &
Intentionis. Sed has sex, ad antedictas species
ante recitatas posse referri, doctissimus Kecker-
mannus probabiliter putat.

Qua-

Qualitas.

Qualitas, est forma accidētalī, qua res aliqua (*Qualis*) appellatur, vt fortitudo, prudentia, auaritia, superbia, & similes, à quibus qualitatibus & Attributis, homines vocantur fortes, prudentes, auari, superbi: vt, fortis Dauid prudens Socrates, & prudens Cato: auarus Laban, Tarquinius superbus, superbus rex Herodes, *vermibus corrosus, à quibus consumptus expirauit, Act. cap. 12.*

Qualitas, est omnium Accidentium copiosissimum. Nullus est enim naturæ angulus, quin suis quidem variis abundet qualitatibus. Quicquid audimus, videmus, gustamus, odoramus, palpamus, id omne, accidentalī qualitas est. Vnde, qualitatū hanc cognitionem, Physicæ partem maximam & potissimam continere, ego arbitror: igitur, & valde vtilem esse, nemo negare potest.

Huius Qualitatis, quatuor solent recenseri species: prima est, *Habitus*, & *Dispositio*: Secunda, naturalis potentia, & impotentia: tertia *Passio* & *Passibilis qualitas*: quarta, *Figura*, & *Forma*. *Habitus* adimpletus est, tempore, diuturnitate, labore & vigiliis acquisitus, & in subiecto radicitus inhærens, vt virtutes Morales, & Artes omnes.

Sunt

Sunt alterius generis virtutes, quæ apud scholasticos Theologos (satis aptè) vocantur Theologicæ, vt *Fides, Spes, Caritas*, quæ infusæ dicuntur et a Deo immensa sua erga nos bonitate & *Philanthropia*, absq; nostris laboribus & vigiliis (tanquã causis) datur & infunduntur gratis. Ita tamen distribuuntur, vt nostra diligetia & licitis mediis retineatur, & nostra socordia & supina negligentia, merito deperdantur.

Dispositio, est habitus inchoatus, diturnitate tantum ab habitu distans, estque gradus & via Regia, ad habitum. Vitiorum itaque Anfractus & Angiportus relinquamus, & Regia hac via, cum *Rubenitis, Gaditis, & dimidia tribus Manasse*, ante fratres nostros, in terram *Canaan. i. in Calum, Ios. I.* ad hos virtutis præclaros habitus, feliciter & animosè progrediamur.

2. Naturalis potentia, vt in Cicerone puero, procliuitas ad ornatè dicendum, quæ postea in habitum conuersa est: vt, in Alexandri Magni pueritia, aptitudo ad bellum, & res arduas & maximas subeundas. Naturalis impotentia, seu reluctatio naturæ, in subiectis imbecillioribus: vt indocilitas in tardis & stupidis ingeniis, & inagilitas in valetudinariis & impotentibus. Itaque, Nabal stolidus fuit, & ad bonos & civiles mores, incompositus: & *Miphiboseth*, filius boni *Jonathan* (quia à natiuitate claudus

claudus) 2. Sam. 9. 13. ad Palestritem, ineptus.

Passiones, vel Perturbationes, vt metus, tristitia, dolor gaudium, et horum similes quę sũt aut *Animi* aut *Cõporis*. Et passibiles qualitates Latinus, qualitates afficientes, Non quòd ex patiantur aliquid, sed quod inferant passionẽ et affectionem sensibus, nonnunquam tristẽ & melancholicam, nonnunquam hilarem lætam et iucundum,

Passi- { Oriuntur, à per- { Pallor, ex metu
biles { turbationibus, vt { Insania, ex tristitia.
Qua- { Sunt obiecta S. sensuum { Colores, visum:
litates { quos varie afficiunt, vt, { Soni, auditum.
 { &c. { Sapores, gustum

Figura inanimatorum vt. \odot . \square . \triangle . Porro, et literarum, vt *A.B.C.D.* et numerorum characteres, vt. 1. 2. 3. 4. 5. omnesque figuræ quas tractat *Mathematicus*, vt *Sphæra*, *Globus*, *Triangulus*, *Astrolabium*, *Cylinder*, *Quadratum*, &c.

Forma animalium externa, hominum & be-
stiarum: vt, *Thersitis* forma informis, et *Helena*
pulcherrima et formosissima. Nam forma in-
terna, ad Substantiæ Predicamentum referri
debet.

Hanc figuræ et formæ differentiam *in Boetio* legere poteris itaque noua inuentio non est.

Haec qualitatibus quatuor species, non sunt infi-
nitae

mæ, sed Subalternæ et interiectæ, quoniam harum quælibet habet sub se, species suas, Passibiles, seu Patibiles diuturniores sunt & stabiliiores: Passiones, breuiores sunt, temporariæ, et facilè mobiles. Hinc est, quod frater *Titelmannus* verè dicat, qualitatem patibilem et passionem, gradibus tantum differre, sicut dispositio et habitus. *Achilles* Homericus, homo fuit iracundus implacabilis. *Eusebolius*, leuis et inconstans Christianus, mutabilis vt *Chamaeleon*, mutabilis vt luna. Hæ, seu patibiles seu passibiles qualitates, malæ fuerunt quas non imitari, sed declinare debetis.

In his Qualitatis speciebus, hæ tres, seu proprietates seu cõmunitates velitis dicere, à vobis obseruari possunt, viz, *Cõtrarietas* *Magis* et *Minus*, *Simile* et *Dissimile*: vt, hic Homo albus, ille ater, et carbonario similis. Et cõparatiuè, hic albius, hic nigrior illo: vt atrè *Ethiopè* esse profectò iuraueris. Hic, fidè habet magnā et cõstantem: ille, imbecillam et languidam, vterque (per Dei gratiam) veram, si tamen non Hypocriticam: *Credo Domine, succurre quæso incredulitati meæ, Marc. cap. nono.*

Tertio, secundum solas Qualitates, res dici similes vel dissimiles: vt, album albo simile, & nigro album dissimile. In substantiis verò, magna & multiplex illa quam oculis cernimus similitudo vel dissimilitudo & varietas, non

non est respectu substantiæ, sed ratione diuersarum qualitatum, substantiis suis variè, & multipliciter inhærentium: huc itaque referri debent.

Relata, seu ad Aliud.

Quantum Prædicamentum, est Relatorum, & eorum Correllatiuorum eis correspondentium: quorum vis omnis & natura, ad aliud refertur, vt sine alitero, alterum esse non possit vt, Pater & filius, *Rex & Regnum, Maritus & vxor, Magister & Discipulus, Dominus & seruus*

Socratis Zantippa, in hoc Prædicamento Relationis, locum vendicat suum, quia vxor, quamuis morosa & garrula, Talem etenim eam fuisse, prudens Socrates expertus est. Habeat hic, hæc, & hoc (si velitis) in loco, locum suum obsecro, quis eam prohibere potest? Meliorem sortem quam hanc prædicamentalem habere non meretur, nisi substantiam pessimam velitis eam denominare.

Relata secundum, $\left\{ \begin{array}{l} \text{Esse} \\ \text{Dici, \& improprie Relata.} \end{array} \right. \left\{ \begin{array}{l} \text{Relatiuum, vt Pater} \\ \text{Correllatiuum, vt filius.} \end{array} \right.$

Relata secundum Esse aut actu *Relata*, vel proprie dicta *Relata*, nudos alterius ad alterum respectus et habitudines considerant, et quæ sine mutua ad inuicem collatione intelligi non possunt.

possunt. Quæ conuersio et reciprocatio in genitiuo casu fit aptissimè, vt pater est filii pater, & filius est patris filius. Hæcque simul sunt natura, quorum posito aut destructo altero, ponitur aut destruitur alterum : hæc enim est Relatorum secundum (Esse) natura & conditio *Aristoteles* multa verba habet, de Relatis secundum (Dici) *Platonis* præceptoris sui, opinionem introducens in scenam, de ea disputans, non tamen definiens : sed eam (vt decebat) examinandum & aliis discutiendam, in medium relinquens.

Relata hæc, secundum (*Dici*) vocantur Relata potentia, & impropriè dicta Relata : loquendi vsu & consuetudine non bona, vocantur Relata, sed reuera, Relata logica non sunt æstimanda. Nam, in omnibus Prædicamentis reperiri possunt, & quorum vsus non est magnus, aut saltem huc vsque, mihi non benè notus.

Huc referri possunt, *Dignitatum, Officiorum Cognationis, Affinitatis & Etatis* vocabula, quæ ad aliud referuntur, & collata cum aliis, intelliguntur meliùs. Et notate, quod sex quæ sequuntur Prædicamenta, ad Relata impropriè dicta, seu secundum (*Dici*) referri posse, *Aristoteles* scribat. Itaque, vt ego vaticinor, *Aristoteles* de illis omisit aliquid tractare. *Gilbertus verò Porretanus*, doctè supplēuit ea, quæ

quæ sex principia nominauit.

Actio,

Quintum prædicamentum, est Actio, operatio seu Effectio, quæ est substantiæ agitatio, viri-umque eius velut effluxus & exequutio,

Ad hanc classem omnia referuntur, que agē-di significationem habent, seu in hominibus seu in bestiis : vt, intelligere, recordari, loqui, ridere, flere, arare, pascere, triturare, mugire mouere, proficisci, reuerti, & Tugurium & do-
lium nostrum, cum *Diogene Cynico* iterum re-
petere et possidere. Vt proficiscar in exteras
Nationes sed rursus (Per dei gratiam) reuertar
domum. Profecto, dulcis est patria et *domus*
amica i. propria domus, non aliēna. *Hic nū-*
qua (ad libitum meum) cum *Diogene*, prandeo
quando volo, hac in re *Platone* fælicior, qui
prandet quando *Dyonisio* placet. Hic comedo,
bibō, dormio, obdormio, caput pecto & caput
scalpo: sudorem abstergo, alliū eructo, pedio,
& (deimpta *Iota*) quod reliquum est facio.
Hoc, alibi quàm domi nostræ facere, esset for-
sā in librum (*De Ciuitate morum*) impin-
gere. Hic, me exuo, induo, mando, remando,
impero, domi meæ regulus sum, aliò profi-
ciscens, nullus. Argallum senem, foras nemo
agnoscit.

DI

Quod

Argalli
Naumachia.

Quod, mihi nauiganti, & apud *Hybernos Australes in Monania*, ante viginti quinque annos, paruo tempore commoranti, bene exploratum fuit. Periculum à sæuo & inclemente mari, periculum ex mutatione aeris, periculum à potu acido, & cibis falsis, periculum à lectulis & stratis (*male profecto stratis*) periculum à falsis fratribus, i. à vernibus *et pediculis*: qui non vocati, veniunt ad nos, mihi non perpercentes, donec rursus domum redierim, & meam Zantippam salutauerim. Apud has bestiolas, nullus personarum respectus. *Sanctum Franciscum, immo ipsum S. Patricium* (vt ego arbitror) non agnouissent, si nobiscum hoc tempore nauigassent. Itaque, in Moluccas illas decantatas, in Iauam & Iaponiam celeberrimas, per (*CAPVT BONÆ SPEI*) tremendum illud Promontorium Australe, nauigent & circumnauigent quicunque volunt. Ibi, si placet, Polum Antarticum, & nouas eius noui orbis stellas spectent & philosophicè contemplantur. Exerceant illic nostri Iesuitæ, (nouii fratres) nouam mercaturam suam. Conuertant illas Gentes ad fidem suam, id est, conuertant Aurum, Argentum, Vniones, & pretiosa Aromata, in fiscum, discum, & Corban suum, vt magistro suo Iesu (cuius nomen suffurantur) dissimiles sint, qui fuit pauperissimus. Quod ad me attinet, plus satis est, quod Hyberniam

Hyberniam propinquam semel viderim, & bis atque iterum apud illos, nauticè concionatus fuerim. Senex iam sum, nauigent alii: ego (quo nunc sum animo) nauigare amplius non desidero. Ex Virgilio, aliam Cantilenam iam occinere, assuesco, scilicet,

*Nos, patriæ fines, & dulcia linquimus Arua,
Nos patriam fugimus: Tu Titire lentus in umbra, Virg Eclog
Formosam resonare doces, Amaryllida sylvas. Titirus.*

Transfretare, nauigare, viriliter & animosè in flumen Tamēsin se præcipitare, pedes manusque strenue mouere, & spumantes vndas nando sulcare & diuidere, quod nos Oxonienses generosiores, minus prouidè (nihil verentes) facere consueuimus, huc referri debent, quia Actiones sunt.

Actionis Prædicamentum, contrarietatem suscipit, non per se, sed propter qualitates, quibus mediantibus, Agens agit. Sic calefactio, & frigefactio, actiones contrariæ sunt, non per se, sed quia calor & frigus contraria sunt.

Actio nostra, recipit magis & minus: aliquid enim magis vel minus calefacit & friget, prout res ipsa magis vel minus calent, vel frigesunt.

Passio.

Sextum Prædicamentum est Passio, Pati, seu fieri

seu ab Agente aliquid accipere. Huc referuntur omnia, quæ passiuam significationem habent. Itaque, Passiones, seu perturbationes Stoicæ, huc referri debent. Subiectum enim ab illis, valde patitur, vt in iratis & timidis facile apparet. Antea, in Qualitate, hic in Passione, sed diuersimodè, quod non est inconueniens.

Passio hæc, seu perpassio, duplex est, animi & corporis. Egrotat crumena mea, sæpius quàm vellem, ex quo morbi genere, vos quæso, quorum Marsupium simili morbo laborat, iudicate. Passiones Iosephi, Davidis, Iobi Hussitæ (patientissimi hominis) & omnium Martyrum huc referendæ sunt. Ipsos vero, non in hoc Passionis, sed in Prædicamento Cælesti triumphare & nunc gaudere, confidenter credendum est. Moriatur anima mea, morte horum hominum, & fiant nouissima mea, horum similia, vt Balaam (ad se bene reuersus) bene dixit, Numer. 23. Beati, qui persecutionem patiuntur propter iusticiam, quoniam ipsorum est regnum Cælorum, Mat. 5.

Hoc Passionis Prædicamentum (vt & Actionis) contrarietatem admittit, magisque & minus suscipit: scilicet, si qualitates super quas ambo fundantur, contraria fuerint, & magis ac minùs suscipiant. Omnes enim homines, non habent easdem passiones, sed nonnunquam contrarias, & ex Diametro repugnantes, quibuscum

buscum plus aut minùs, variè affici & distorqueri videmus.

Vbi.

Hæc quatuor quæ supersunt Prædicamenta, Vbi, Quando, Situs, & Habitus, seu Habere, suum quendam vsum habent, sed minùs necessarium: vtpotè quibus, non continentur iis res seu Entia absoluta & perfectæ, definitionis perfectæ capacia: sed concreta tantum, & quæ sub accuratam contemplationem non cadunt, vt inquit doctissimus, & nunquam satis laudandus, *Barth. Keckermannus*. Itaque (illo monitore) retinuimus ea, tanquam bis mille annorum vetustate sancitas, Pythagoricæ doctrinæ reliquias. Nollem enim vos (Iuvenes) fanaticos innouatores esse, & rerum nouarum cupidos: præsertim, cum vetera sine veritatis iactura, aut magno dispendio, retineri possunt, itaque pergamus.

Septimum hoc prædicamentum, Vbi, est ordo, qui locorum descriptionem complectitur. Et notate, omnia quæ aptè respondent questionì factæ per vbi, in hoc predicamento, locum vendicare suū, Vt, vbi sunt Dæmones? *In aere isto caliginoso, mundum hunc malum circuentes, et querentes quos deuorent, quorū locum et consortium, ego non desidero, Nam,*

vt est apud D. *Lucam chap 16*, quicumque cum diuite guloso, in in inferno cruciantur, domum rursus nunquam reuertuntur, *Quibus resistite, fortes in fide. & fugient à vobis, 1. Pet. cap. 5. Nisi enim precesserit pugna, non potest esse victoria, Cyprian de Mortalitate*. Rursus, vbi sunt AEthiopes, atri inquam illi AEthiopes, vbi habitant? Responde, in torrida mundi Zona, inter *Tropicos Cancrì & Capricorni*, non procul ab AEquatore & Linea Ecliptica, eos comorari. Atque ibi (in nomine Domini) adhuc habitent & commorentur, non enim turbabo illos. Anglia nostra temperata, me potius delectat. Vbi est Saulus qui est Paulus? *Act. 12. 29. Damasco, confundens Iudeos, & affirmans, quoniam hic est Christus. Vbi est Christus? In templo Hierosolymitano, in medio doctorum, audiens & interrogans eos. Et Iesus proficiebat sapientia & etate & gratia, apud Deum & homines Luc. 2.* Vos (inuenes charè dilecti) laborate, & pro viribus contendite, vt dulcissimo huic Iesu, conformes & similes sitis.

In hoc Prædicamento Vbi, collocantur res in Concreto, connotantes modum seu circumstantiam loci cuiusque, vt *Affrica, Asia, Europa: Germania*, superioris & inferioris, *Angliæ nostræ florentissimæ*, eiusque partium & membrorum omnium, Londini, (patriæ meæ charissimæ & dulcissimæ) Oxonii matris
Canta-

Cantabrigiæ sororis suauissimæ, religiosissimæ, simul & doctissimæ, similiumque: Si tamen, in toto terrarum Orbe, similes, illisque pares Academia inueniri possint.

Quando?

Octauum Prædicamentum, vocatur Quando? In quo similiter collocantur res, in Concretis Adiectiuis, nobis delineantes modum, seu Circumstantiam, non loci (vt Prædicamentum superius) sed temporis; & omnium eius partium. Hucque omnia referri possunt, quæ respondent questionī factæ per (Quando) vt quando venisti huc? Heri vel hodie. *Dic nobis, quando hæc erunt? Amen dico vobis, quia non præteribit generatio hæc, donec omnia hæc fiant, Mat. 24.* Quando igitur, non est tempus simpliciter (tunc enim esset in Quantitate) sed, est temporis ad personam, rem, vel factum applicatio.

Ad hanc Categoriā, referuntur omnia nomina temporis: Quicquid enim fit, tempore fit: cuius partes sunt, Annus, Dies, Mensis, Hebdomas, Hora, Ver, Aestas, Autumnus, & Hyems.

Virg, Ec. 5,

Ante focum, si frigus erit, si messis, in Umbra.

Ætates hominum huc pertinent, Infantia, puertia, adolescentia, Inuentus, ætas virilis; &

veneranda Senectus . Omniaque Aduerbia temporis, vt hodie, cras, manè, meridianò, Vesperè, semper, aliquandò, nunquam hiisque similia.

Situs, & Positio.

Nonum Prædicamentum, vocatur Situs, seu Positio: quæ, corporis & partium eius positionem, hoc vel illo modo ordinat & disponit, vt corporis statio, deambulatio, cubatio prona vel supina, in latus dextrum vel sinistrum. Porro, sessio & accubitus, (veterum more sine mensa) *quemadmodum de Architrachino habemus. Ioan. 2.* Hic Aristoteles, in dicendo, multum ambulasse dicitur, vnde Peripateticus, seu deambulator vocabatur. Et Christus in puppi, *super cernical dormiebat, Mar. 4.* Et ex itinere defatigatus Iesus, *supra fontem Iacob sedebat, Ioan. 4.* Hæc deambulatio Aristotelis, hæc cubatio & sessio Christi, huc referri possunt. Vocabula vero (Infinitiui modi apud Grammaticos) sequentia, vt stare ambulare, cubare, dormire, accumbere, & similia, ad Actionis Prædicamentum pertinere nemo ambigere potest, quia Actiones sunt.

Sunt tamen viri docti, qui hæc limatius distinguunt, si placet audire. Volunt itaque Concreta

tertia Adiectiua, ad hoc Prædicamentum situs & positionis referri: vt, Deambulans, sedens, accumbens, volutans, & horum similia: Corporis verò positionem, in Abstractis Substantiuis, vt Deambulationem ipsam, sessionem, cubationem, & cum suis & porcis in cæno & Luto volutationem, ad Actionis Prædicamentum pertinere, illi probabiliter autumant rectene an secus, Scholarum nostrarum moderatoribus, examinandum & discutendum, relinquimus,

Habitus.

Decimum Prædicamentum, vulgo *Habitus* vocatur, vel habituum esse: quod planius & Latinius, integumentum vel indumentum appellare poterimus. In hac Categoria, collocantur res in Concreto, subiecto accommodantes, quoddam artificiale adhærens. Itaque, ea vocabula huc pertinent, quæ deducta sunt, à vestium, armorum & ornamentorum nominibus, vt Prætextatum, cataphractum, & togatum esse: quod in usu apud veteres ciues Romanos fuisse legimus: Calceatos, annulatos, & vt lepidè dicam, cornutos ramicosos,

Porro, & coronatos reges, Laruatos Hypocritas, cinctum Petrum, eundemque discinctum, malè & sordidè cinctos alios, & discinctos

cunctos quoscunque: *ut, respondens Acha rex Israel Benadabo, Syria regi superbo, Dicite ei, non gloriatur accinctus aequè ut discinctus, 1. Reg. 20. Palliatos Græcos, & palliatos Christianos: barbatos & barbatulos, crinitum Iopam, comptos & palliatos Philosophos, cucullatos Monachos, veliatis Moniales & Nonnas, socias, & contubernales suas. Video, inquit Herodes Atticus. barbam & pallium, philosophum, non dum video. Aul. Gall. Noct. Attic. lib. 9. cap 2. Pallio. nihil expeditius: Gaude pallium & exulta, quoniam melior Philosophia te iam dignata est, ex quo Christianum vestire cœpisti, Tertull. de Pallio. Sed, non sunt omnes philosophi, qui philosophico pallio iuduuntur: Cuculla, non facit Monachum, proluxa barba, non facit hominem doctum.*

Placetne, in hoc prædicamento Habitus, de habitu Monachorum Romanensium, de Cuculla & tonsura eorundem, lepidum commentum inter vulpeculam & Anserem, ex me audire? Quod ego inuenis, in veteri libro pergameno, Oxonii: nemini olim me legisse: quod adhuc non excidit, quamuis profectò, ut verum fatear, nunc senex, incipiam delirare; Sic itaque se res habet.

Vulpecula loquitur,

*Quod fuerã, non sum: frater, caput aspice tonsũ,
Finem pono malis, notat hoc vestis Monachalis.*

Anca

Auca respondet.

*Vestis honesta quidem, sed quod fuerat iā pridē,
Est cor semper idem, cur dare nolo fidem.*

Qui legit, intelligat: Misterium enim magnum
latet quod ego hic vobis aperiam, Monachi
Papistici, vulpeculæ sunt: Laici verò stulti et
simplices anseres facti sunt, quemadmodum
vetus istud illorum Emblema pulchrè edocet.
Cauemus itaque iam moniti, ne astutis his
vulpeculis; vineā Domini demolientibus, Cant
2. nimis citò fidem adhibeamus,

*Olim, bonus meus Anus. D. Ioannes Talkar-
ne, Armiger cornubiensis vir pius cordatus, et
bene doctus, quo melius puer, operam libris
incumberem, veterem hunc versum mihi sæ-
piùs recitare solebat.*


Oxonium veniunt multi, redeunt quoq; stulti.

Quod postea in meipso, quamuis & toga-
tus & graduatus fuerim, verissimum esse com-
peri. Itaque, caute Inuenes, ne mei similes si-
tis, id est, ne in hoc albo non proficientium,
mecum inueniamini. De Categoriis, vbi &
Habitus, quoniam apertæ sunt, & non obscu-
ræ (sic enim loquitur Stagirita) nihil aliud tra-
do (inquit) nisi quod initio dixi, (*Habere*) idem
declarare, quod vestitum & armatum esse: &
(*Vbi*) vt in Lycæo, in foro, Arist. de prædica-
mentis Agere et Pati, & cæteris, cap. 6.

Hæc 4. posteriora Prædicamenta, Substantiæ

vt

vt regi suo, hoc modo sequenti, inferuire possunt, si illorum Ministerio vti volueritis.



Postpradicamenta.

Aristoteli Stageritæ placet post decem prædicamēta, *Postpradicamenta* quædam addere: Quæ continent nonnullorum terminorum distinctiones, intellectu & consideratione vestra, non indignas, Cuiusmodi hæc sunt, *Prius Posterius, & Simul*. Nā, quod ad reliquos terminos (*Motus & Habere*) attinet, ii sine vlla iactura prætermitti possunt, quemadmodum Bar. Keckermannus bene annotauit: cuius opinioni, ego lubens acquiesco. Atque hic, mihi bene placet, perspicuitatis causa (quam ego in docendo vel discendo, vehementer amo) Murnelii ordinem, vobis ante oculos proponere.

Prius tempore, vel existentia est, quod ante
aliud

aliud fuit: sic Bruta prius in rerum omnium creatione, extiterunt homine, & Testamentum vetus, prius erat Nouo.

Prius natura: sic genus est prius quauis sua specie. Zabarella vocat, prius ordine naturæ generantis.

Prius dignitate, vt Consul Senatore, præceptor discipulo, Dominus seruo, Rex subdito.

Prius ordine, rectè in Numeris, & eorum progressu, cerni potest, vt vnum ante Duo, duo ante tria, & sic deinceps, ordine recto, & non retrogrado, si progredi volueritis. Huc addi Hebdomadarum dierum ordo successiuus, aptissimè potest: vt Dies Dominica ante diem Lunæ, dies Lunæ, ante Martis diem, Martis ante Mercurium, & sic de reliquis: Quamuis me non lateat, ad Tempus etiam hoc referri posse, si quis curiosius & limatiùs hanc rem rimari & ventilare voluerit. Sed *Argallus* scribit nouitiis, & in arte Dialectica, non adhuc multum exercitatis.

Prius Causa: sic nempe omnis causa est prior causato vel effectui suo.

Effectus, vt pedissequa, causam veram et propriam ancillatur, et causa vera et propria (vt rex) effectum suum semper antecedit. Atque hoc in loco memoriæ vestræ iuuandæ causa. notetur hoc, docti *Murmeli* distichon si placet legere.

gere.

*Tempore natura, prius ordine dic et Honore.
Causam causato, dicimus esse prius.*

Et notate, quot modis Prius dicitur, tot modis Posterius dici potest: hæc enim sunt Relata,

Simul tempore Suncronoi et coetanei, Hieronymus et Augustinus, Cyprianus Martir, et Cornelius Episcopus Romanus, Bernardus Clareualensis, et Eugenius eius nominis tertius. Simul tempore, Ioannes Argallus qui hæc scribit (pauper senex) et reuerendi patres D. Thomas Bilsonus, Wintoniensis: D. Martinus Heyton, Eliensis: D. Robinsonus, Carliolē- D. Tobias Matheus dunelmensis: Episcopi doctissimi, loco suo dignissimi vigilantissimi Antistites, alique permulti: vt, D. Thomas Thorntonus, D. Robertus Dorsetus, D. Gulielmus Iamesius (Dunelmensis Decanus, Vir grauissimus et prudentissimus) D. Galfridus Ludovicus, vetus collega eius, vetus amicus meus D. Ioannes Reynoldus, D. Thomas whitus, vir eloqueus, & in scripturis potens Act. 18. D. Rodolphus Piccauerus, D. Gulielmus Zoucheus, D. Ioannes Walsallus, D. Ioannes Housonus, D. Nicholas Bondus, Collegii Magdalenensis nunc Præses, homo nitidus & facetus, contubernalis meus, & olim familiaris Geta. Omnes sacræ Theologiæ doctores præstantissimi.
Simul

Simul tempore fuimus, in vna *Academia* & Schola educati, & Ecclesię Christi Oxoniensis magna ex parte, omnes socii & alumni. Hos, magnus Deus, ad summos in Ecclesia honores & dignitates (quia digni sunt) euexit: Argallum vero, pro peccatis suis magnis & innumeris, indignum senem, in paupertatis vinculis adhuc detinet, vt cum Acolasto, filio prodigo, pænitentiam agat, verè recipiscat, & tãdem per eius gratiam, saluus fiat.

Sæpe leuant penas, crepta que lumina reddunt, Ouid,
Cum bene peccati penitusse vident.

Vexatio, intellectum dabit: *Præcessit disciplina, & per dei gratiam, sequetur & venia, Cyprian. Epistolar. lib. 4.* Bona est ea paupertas & humiliatio, quæ vere pænitentes faciat.

Simul natura sunt, duæ species, sub vno genere Oppositæ, vt homo & brutum sub animali.

Simul ordine & honore, omnes Christi Apostoli. Hoc erant utique & cæteri Apostoli, quod fuit Petrus, pari cõsortio præditi, & honoris & potestatis, vt Cyprian, loquitur, de Simplicio, *Prelator. Tract. 3.* Quales apud nos Anglos, illi procures sunt, qui a Regis nostri Iacobi sanctioribus Conciliis semper præsto ad sunt, viri præ cæteris omnibus, longe honoratissimi, par honor, æqualis auctoritas. Qualesque apud veteres Quirites (*Mundi Dominos*) consu-

Consules pares, Duumviri, Triumviri, decemviri et postea, in magno Reip discrimine dictatores non annui, sed Semestres,

Definitio,

In omni Definitione bona et perfecta, plura et maiora de iure suo, a nobis, ut ei debita requiruntur, quam illi bene solvere & præstare poterimus: eoque magis in ære eius, mali debitores sumus. vid. *Arist: 6. libr. Topicor. cap. primo.* Inter reliqua tamen, hæc pauca necessaria, omitti non debent. Conuerti debet definitio cum definito suo, debet esse brevis, & sine ambiguitate perspicua: & postremò, ex *obsoletis, antiquatis, & Metaphoricis verbis,* non debet componi, *Arist. 6, Topicor. cap. 1.*

Nec tamen ita rigidè interpretanda est hæc limitatio, quasi nullis omnino utendum sit in definitione Metaphoris. Sæpe vocabulis propriis caremus, & tum necessitas cogit hanc bonam legem violare. Id modo notetur, semper propria per se et natura sua, esse clariora et meliora translatis. Ideoque eis in Definitione et adeo omni bona doctrina, merito præferenda esse. *Definitio alia est Nominis, alia Rei:* Nominis Definitio, est brevis explicatio nominis, ut *Philosophia est studiū sapiētię:* Theologia, est doctrina de deo, Euangeliū est nūcijs optabilis

optabilis. *Ecce Evangelizo vobis gaudium magnum, Luc. 2. 10.* Et, sine aliqua aut Rei aut Nominis explicatione, velle rem cognoscere, est tempus perdere, vt Boethius, ex Methodico Galeno, bene annotauit.

(Essentialis, ex genere proximo, & differentia specifica constans, quæ rara est, propter verarum differentiarum magnam penuriam.

Definitio
Rei, ex
Boethio.

Causalis, ex

{	Materia.
	Forma.
	Efficiente.
	Fine.

Accidentalis, ex frequentia, & coaccruatione plurium Accidentium.

(Ex speciebus, vel ex partibus,

D. Keckermannus, nos hic relegat, ad clarissimum Philosophum, Rodolphum Goclenium, tum in Problematibus Logicis, tum vero in eruditissimo libello, quem de Definitione conscripsit, dignissimū (vt ille attestatur) qui à Logicæ studiosis attentè legatur. Itaque, quæso vos (studiosi inuenes) vt hunc elegantem libellum consulere velitis. Interim, *hoc ex Damasceno, cap. 8. Dialectica*, notatu dignum iudico, definitionis perfectionem esse in reciprocatione: sanitatem in hoc, ne quid in definitione desit, ne quid redundet. In Marsupio meo, redundat puluis, in Marsupio meo, deest Argentum: Itaque per hanc Damascenire-

gulam, ægrotat crumena mea. Libenter ego medicos illos conuenirem, qui hunc meum *Marsupii morbum & Cacoehmiam*, perfecte, curare vellēt: talē ego, non deum, sed alterum *Æsculapium* profecto denominarem.

Argalli
Corrolar.



Et nunc tandem, accipitote *Argalli*, de definitione, dulce, ambrosium, nectarium & mellifluū *Corrolarium*, quod ego volo vocari meum, quia ex me natum est, lectorem attentum nunquam decipiens: scilicet, *Stultorum infinitum numerum, verarum differentiarum, magnam penuriam esse. Si veræ differentiarum abundarent, ut in hoc mundo abundat Nabal stultus, & eius progenies numerosa, statim optimas et perfectissimas haberemus definitiones. Argallus, qui est Archigallus, qui est alter Socrates (non Midas) qui est Pythagoras, qui est sapientum octauus, dixit & Statuit. Itaq;, sub pæna Anathematizationis magnæ (Bell Booke and Candle) credere statuimus iubemus, & Papaliter imperamus. Volumus enim, ut quod nos mandamus, sine vlla cunctatione, FIATVR.*

Placeat sanctitati vestræ, Grammaticorum regulas melius considerare. Priscianus enim *1. Cor 16, 22* sic non loquitur. Apagete, quid audimus? *Anathema Maranatha vobis*, nisi statim taceatis. In contemptum Prisciani, & omnium Græmaticorum, FIATVR.

Sancti


Sanctitatis tuæ diuinam prudentiam, laudamus & in Cœlum vsquē attollimus, Papaliter etenim concludis.

Sic volo sic inbeo, stat pro ratione, voluntas.
In nouis verbis cudendis & creandis, omnipotentiam vestram agnoscimus. Itaque, vt quod mandastis FIATVR, actutum & sine mora, procurabimus.

Diuisio.

Diuisio duplex est, Nominis & Rei: Nominis, quando ambiguum & multiplex distinguitur in sua significata, vt Canis in animal latrabile, & sydus Cæleste. Hæc distinctio (vt & omnis Diuisio, & rerum in partes distributio) ad perspicuè & copiosè dicendum & disputandum, maximum habet vsum. Diuisio Rei, quatuor habet genera sequentia: quæ, cuiusmodi sint, modo audietis. Interim caute (ô vos Academici recentiores) qui ex Dotatione vestra, in Prandio, bouillæ carnis elixæ, cum tenui iusculo, tres obolos solum, inter quatuor famelicos habeatis, ne ita diuidatis, vt vestri sodalitiî & fraternitatis reliquos socios decipiatis, *Hoc enim est frangere, non diuidere.* Leges benediuidendi & partiendi, non docent vos hoc facere. Auscultate igitur, quid olim accidit: hodie inter vos, simile accidere potest, nisi

proinde caueatis.


Th.P.

Tho. Pemb. Olim discipulus meus, puer ingenii præcoci & bonæ indolis, cum primum ad nos Oxonium recens venerit, carnem Bouinam gustare non potuit, tali cibo pupillus meus querulans, nunquam vescebatur, alius itaque actutum illi parandus est, aut (in malam rem) statim ægrotare vult. Tales sæpenumero sunt illi, qui parentum mamillas nimium fugunt, & non nisi domi instituuntur. Postea tamen, videns apud nos, nihil præter aridum panem, iusculum, tenuemque potum (*sixte-
us appellamus*) eorum mensæ apponi, tentabat esuriens, de carne illa Bouina, quasi pitisando (*ut canis Nilum*) primis labris degustare, volens quomodo palato eius, ille nouus cibus masticatus arrideret, experiri. Profectò, quod verum est, vobis narrabo: Mentiendi consuetudo, non est bona. Ecce subito, miraculum magnum. Hoc alimenti genus illi inusitatum, de improviso (quod non expectabamus) ita meo discipulo perplacere cæpit, ut iam ferè abstinendo famelicus, non solum portionem suam auidè deuoraret, sed etiam reliquos sui ferculi socios defraudasset, nisi eius voracitatem nouam, citius deprehendissent. Dicite mihi quæso (vos barbatuli) an, in tanta cibi inopia & parsimonia, talis diuisio vobis placere possit? Remanet iā, ut de iusculo illo Hæsterno, in quo
hæc

hæc caro decocta fuerit, inquiramus: An scilicet, à cuius carne modo abhorruerit, ab eius brodio & sorbitiuncula nunc abstinerit, annon? Quæstio magna (me Hercle) & inter *Articulos Parisienses* inquisitione dignissima. Itaque, Sorbonistis illis (magnis Magistris) ventilandam, & in vino discutiendam relinquamus, nostrum enim captū, longè superat. Certi aliquid, in re tam magna & difficili, sine magna deliberatione, non habeo definire,

Vos vero (inuenes) optarem, ex hoc tam preclaro exemplo, aliquid discere, quò prudentiores sitis. Cognoscite itaque ex me sene, (patre vestro) hunc malum puerum, fuisse Dæmoniacum, i. proteruum, lasciuum, & nimis mollem, sub parentum alis non educatum, sed corruptum: hocque Dæmoniorum genus, non nisi abstinentia & fame eiiciendum esse, ut hic clare cernitis. Profecto *optimum condimentum fames*: Ad huius generis morbi malitiam expellendam, totus *Medicorum* chorus, in promtu, medicinam meliorem & nobiliorem non habet, aut excogitare potest, ut ego auguror. Et sciatis velim, Argallum non esse *Pleudoprophetam*. Utimini itaque (in nomine Domini) cum opus fuerit, nam probatum est. Pupilli vestri, si morosi aut nimis delicatuli fuerint, hoc modo ad pristinam sanitatem re-

duci eleganter possunt, si experiri volueritis,

Tempus nunc est, ut hac inequali diuisione prætermissa, æquiores prosequamur, quæ proximè sequens, talis est.

1.

Generis in	{	Homo, in masculum & fæminam.
Species	{	Peccatum, in {
		{ Originale Actuale.
2.

Diuisio Rei, quadruplex,	{	Totius in partes: hæc q; strictiori vocabulo, vocari solet Partitio, seu E. numeratio	{	Ciuitatis, in {	Plateas, ex domibus cõ, stantes. Portas, et Mænia. Fossas, & propugnacula
				{	Comediæ, in Protasin, Epitasin, & Catastrophè

3. { Subiecti, in Accidentia, ut homo doctus, indoctus, longus, breuis: Dominus, Pater, seruus filius, mansuetus, truculentus.
 4. { Accidentis, in alia Accidentia, ut Amicitia { Vera, Hypocritica,
- Atque utinam omnis amicitia esset simplex, & vera, qualis fuit illa pii AENEÆ, & fidi ACHATIS, aut illa ACHILLIS & PATROCLI, aut illa IONATHAN & boni DAVIDIS, 2. Sam. I. aut postremò qualis olim fuit illa, inter me & ARTHURUM WAKUM, inter me & ROBERTUM DORSETTUM inter me & IOANNEM DELABERUM (adhuc uiuentem) medicinæ doctorem præstantissimum verè generosos omnes. Melius nunquam ama-
- uit

uit *Pylades Orestum suum*, quàm illi me, aut ego illos, Sed eheu, nimis verum est, quod olim *Poeta* cecinit:

Illud amicitia quondam venerabile nomen

Prostrat, & in questu pro Meretrice sedet.

Ovid,

Facile inuenias amicos fucatos, (quales hi tres Iobi amici olim fuere) *Eliphas Themanites, Baldad Suhites, & Sophar Nahamahites*, consolatores pessimos. Bonos & constantes, paucissimos: nam in arumnis pauci fideles.

Pindar.

In omni bona Diuisione, membra diuidentia, non debent esse sibi inuicem subordinata: sed ita distincta, & ab inuicem separata, ut eorum alterum de altero, nullo modo prædicari possit. Sumite vobis exempli causa, Animal in has vulgares suas species diuisum, *Hominem & bestiam*. Bestia, neque prædicari potest de homine, nec homo de Bestia. Virtus similiter, quatuor habet species notissimas, *Prudentiam, Iusticiam, Fortitudinem, & Temperantiam*. Hæ species distinctæ sunt, neque potest vlla earum dici de altera. Prudentia enim, non est Iusticia: Iusticia non est Fortitudo, Fortitudo non est Temperantia, neq; Temperantia, reliquarum aliqua.

Perfectissima est ea Diuisio, quæ ex duabus solummodo partibus constat. Hancque *Diachotomiam*, Peripatetici veteres, multum extulerunt, Tamen apud nos, ex tribus partibus

Trichotomia, non est despicienda. Lex itaque Dei, per Moſem promulgata, ex ratione obiecti, *Trichotomiam* requirit. *Alia enim est Moralis, alia Ceremonialis, alia Iudicialis ſeu Forenſis*. Utinurque nonnunquam diuiſione quadripartita, ſed cum his nunc recitatis, forſan non comparanda. Multæ ſunt laudes & encomia *Diuiſionis* apud *Platonem*, in *Sophiſta*, & in *Phædro*. Vbi, poſt eius prolixas commendationes, tandem *Socrates* exclamat : *Si naſtus fuero ducem, qui recte partiſci ſciat, eius ego veſtigia, vt Dei cuiuſdam, ſequerer lubentiſſimè*. Nouit prudens *Socrates*, quid optaret: hoc, ſi aliquis *Morio*, aut ſtultus *Nabal* dixiſſet, notatione dignum, non iudicaſſem.

Quæſtio.

Quæſtio duplex,	Simplex,	An ſit?
	vt virtus,	Quid ſit?
	cuius ge-	Quæ Species, et partes?
	nera ſep-	Quæ Cauſæ?
	tem vul-	Quæ Effectus?
	go recita-	Quæ Cognata & Similia?
	ri ſolent	Quæ Contraria, & Diſſimilia
	Compoſita,	quæ argumentatione tracta- ri commodiſſimè poteſt. Hæc, ex propo- ſitionibus confici debet, vt, an Virtus ſe- quenda ſit? An ſit Purgatorius ignis Pa- piſticus, poſt hanc vitam, annon?
Quæſtionem, de rebus omnibus quibuſcun- que		

que mouere, & in dubium vocare, non debemus. Aristoteli bene placet (vt & nobis) *contra negantem Principia, non esse disputandum.* Qui igitur hanc quæstionem mouet, An Dii sunt colendi, & An amandi Parentes, supplicio coercendos esse. Similiter, qui an Nix sit alba, *sensu carere, Aristoteles pronunciat, primo Topicor. cap. 7.* In qua posteriori opinione, *Anaxagoram Philosophum* fuisse legimus. Sed de rebus dubiis, & multum controuersis, Dialecticus rectissime disputare potest: vt, vtrum sit deterior avarus quàm prodigus, Laban an Acolastus. *An Petrus*, per 25. annos continuos, Cathedralem sedem *Roma* tenuerit, vt Hieronymo placet. An liceat vxorem alteram ducere & circumducere, priore superstita, Et vtrum vetbi Dei Ministris licitum sit ab ouibus suis, tempore persecutionis fugere? Aut pestis contagium, & grassantem infectionem declinare, annon? De quo posteriori, nuperrime, aliqua disceptatio Londini fieri cæpit.

Athanasius, pater bonus & Orthodoxus, ab hæreticis *Arrianis* eum persequentibus, fugit & licitum esse, egregiè conuincit. Alii, negare videntur, vt bonus pater *Augustinus*, sed quodammodo, & ex parte, *Epistola 180 ad Honoratum.* *Tertullianus* verò, Montanizans, omni modo illicitum esse mordicùs tenet, sed
minus

minus verè, vt ego arbitror. *Hieronym. de Scriptor. Ecclesiasticis.*

D. Thom.
Bentham


Tempore Mariæ, nuper Angliæ reginæ nostræ multi reuerendi patres, pii & doctissimi verbi Dei Ministri, fugerunt: Dominus *Thomas Benthamus*, olim Dominus meus, homo verè Christianus, benignus & liberalis. Nobilis *Sandus*, eloquens & disertus *Iuellus*, (*Papistarum malleus*) lepidus & cum grauitate facetus *Epigrammatarius*, *Parkhurstus*: *Pilkintonus* doctus, prudens *Grindallus*, impiger *Hornus*, regius præceptor *Coxus*, Reginæ institutor inuicti animi *A Elmerus*, trium linguarum homo peritissimus. Herefordiensis duo, grauitate pares, *Scoreus & Westfalingus*. *Exoniensis*, *Milo Conerdallus* (Cathedram fugiens) vir humillimus. Pius & Laboriosus *Foxus*, *Elemosynarius*, candidus *Molinæus*: bonus pater *Aluans*, senex *Whithedus*, Geometer, Musicus Theologus, & nullius fere liberalis cognitionis, ignarus. Zelo & spiritu plenus, *Sampsonus*, eiusque fidus *Achates*, *Leuerus*. *Dunelmensis* *Whittingamus*, *Cestrensis* mitis *Goodmannus*. *Alexand. Nowellus*, *Paulensis* Decanus dignissimus, homo nonagenarius, verbi Dei buccinator egregius, verè *Philoxenus*: in omnes bonos bonus, in pauperes, profusus. *Laurentius Humfredus*, in Academia Oxoniensi, per multos annos, fidelis Antesignanus, & Regius professor

feffor mæritiffimus. *S. Theologia* doct̃or literatiffimus, in omnes nos suos filios, pater aman-
tiffimus. Qui finguli, poſtea (per Dei gratiam)
reuerſi incolumes, veritatem Euangelicam a-
pud nos Anglos, ſtrenuè & viriliter defende-
runt, magnaue fuerunt ornamenta, & lumi-
na Eccleſiæ noſtræ.

Propoſitio. ſeu Enunciatio.

Propoſitio ſeu Enunciatio, eſt oratio brevis &
perfecta, qua quid ſit verum vel falſum, per-
ſpicuè declaratur: vt, *Romanenſes ſunt Idolola-
træ. Omnes ſacerdotes Papiftici, non ſunt vir-
gines.* Huius tres ſunt partes, Subiectum, Præ-
dicatum, & Copula. Subiectum (inquit doct̃us
Melancihon) eſt illud, quod in Grammatica
conſtructione, eſt prior Nominatiuus, de
quo aliquid dicitur. Prædicatum ſeu Attribu-
tum, eſt quod de Subiecto enunciatur: vel,
prædicatum, eſt deſcriptio ſequens Copulam:
vt, *S. Antonius eſt porcorum medicus S. Fran-
ciſcus, eſt pediculofus ſanctus.* Copula, ſeu vin-
culum, eſt quod ſubiectum & prædicatum ſi-
mul coniungit & copulat, vt homo eſt morta-
lis: (*Eſt*; hoc in loco, copulam coniungentem
cernitis. Deprecandi, interrogandi, vocandi,
admirandi, deplorandi, & ſimilia loquendi
genera, ad Oratores potius, quàm ad Dialecti-
cos

cos pertinere, *Aristoteles putat, de Interpret.*
lib. 4.

 *S Antonius*

Antedictus S. Antonius mihi in mentem reuocat quid ante quadraginta sex annos, aut amplius; *Oxonii* lepidè contigent, quod nūc vobis iuuenibus, non indignabor commemorare. Porcellus quidam impurus, suo more obgrunniens *Marianis* temporibus, inter *Missarum* solennia, magna studiosorum frequentia Collegii nostri Ecclesiam intrauit, neque impediri voluit donec sacrifici vestimentum sacratum, dentibus suis impuris sædè arroserit: profecto non fingo. Multi hanc rē intuentes, tacitè subridebant, superstitiosi indignabantur Diuina sua sic prophanari. D. *Guilielmus Tresham* Prebendariorum Coriphæus et collegii nostri Subdecanus (theologiæ Doctor) claris parentibus ortus, se d Romanensium religioni totus deditus, me puerum et scholasticum infimum ad abigendos ex choro Canes, flagellatorē argenteo nummo condixit. Officiū meū (non *Homeromastix* sed *Cunomastix*) gaudens assumo: flagellum itaque actūtum paro, facioque canes meos cum primum me viderint currere et eiulare, paruoque tempore sentire non cum *Actæone* sed cum *Archigallo*, se iam rem habere. Ego interim cum *Woltono, Elcocco, Wimslea, Siddallo, Arthurō Wako* generoso (studiorum meorum postea bono

no particeps) reliquisque sodalibus hoc videntes, a risu et cachinnis temperare non potuimus. Et nisi multum fallor *D. Gilbertus Mūsonus*, *D. Thomas Frāciscus*, *Alfordus*, *Daubenus*, *Frognollus*, *Wallens*, *Iacobus Daltonus*, et *D. Richardus Sudburinus*, olim præceptor meus bonus (seniores nostri) alioquin graues viri, rem hanc ridiculam contemplantes, sese continere non potuerunt. *D. Thresham*, præ metu subsellium suum reliquit, huc illucque semouens, promouens nihil: voluit quippe bonus senex hunc strepitum autoritate sua cōpescere, sed rusticus hic porcus Doctoratum eius noluit agnoscere.

Quid sacrificius toto hoc tempore cogitauit, vellem vos (iuuenes) mecum diuinare. Verisimile est, eum minime quietum fuisse, itaque sæpius sese *Crucis* signaculo consignasse, et ad *aquam suam* benedictam tanquam ad sacram *Anchoram* cōfugisse, quo scilicet tutius et expeditius hanc impuram bestiam in fugam cōuertere possit, dubitantem forsan, ne *Diabolus* in forma porci iam apparuerit. Si *Dominus Thresham*, in diruendo & mutando iam totus occupatus, mihi in mandatis dedisset vt similiter cū *Porcis* facerē quod cū *canibus* iussisset fieri, sacerdoti nostro *Missificanti* nō paterer hanc indignitatem offerri. Hoc quoniam non fecit, nolui mandati limites præterire: Itaque hunc

hunc Antonii Porcum (in malam rem) impune quò voluerit abire, passus sum.

Quid malè morato suillo postea contigit, an in Canes Molossos inciderit, aut Diabolus in eum (quemadmodum olim in *Gadarenorum* fues) intraverit, *Mat*, 8. me later, neque profecto multum curo. Si mortuus fuerit, resuscitet eum Patronus suus, si velit: si aures bene perforatas domum reportauerit, curet eum S. Antonius, quia porcorum medicus est: non habeo hac de re vobis plura dicere, Igitur, ubi desistimus, progrediantur quæso, Hora quarta audita est, & verebitur Affrania mea (si diutiùs hic mecum commoramini) ne vos forsàn, hic mecum cænare volueritis, Profectò, ut est apud veterem Comicum, *quod nos capere oportet, hæc nostra intercipit*, Itaque properandum esse, videtis.

Propositionis partes, non sunt pueriliter intelligendæ, quasi oporteat unicam vocem subiectum esse, & unicā vocē, prædicatum. Absint hæc, nimis pueriles cogitationes. Sed hoc moneo, sit hæc nostra *Propositio*, oratio unica & integra, etiamsi subiecto aut prædicato addantur descriptiones. Est ergo hæc sequens, vera & bona propositio.

Adde quod ingenuas didicisse fideliter artes.

Emollit mores, nec sinit esse feros.

Vtile est, in omni disputatione in omnium
ho-

hominum scriptis in omni congressu & familiari sermone considerare, quæ sit illa propositio quam confirmare et stabilire velitis: et porro quam apta sint illa, quæ ad opinionem illam vestram seu aliorum vel confirmandam vel infirmandam, adducere soleatis ante oculos habere. Hæc examinatio, ex locis Topicis, et Argumentorum formis optimè expendi et ventilari posse certissimum est. Itaque loca Topica, et argumentorum genera, a vobis nullo modo negligenda sunt. Iam igitur tempus est, ut Quæ qualis et Quanta propositio quælibet dicenda sit, hoc in loco consideremus. Nā ex Propositionibus argumenta confici debent: Quod ex hoc veteri subsequente versiculo, perspicuum vobis faciemus,

Quæ? Ca. vel Hyp. Qualis? Ne: vel Aff:

V. Quanta? Par. In. Sin.

Qui versus antiquus, hunc habet vñ. Si quæpiā interrogetis de aliqua propositione seu Enuntiatione, quæ sit? Respondere per Substantiam eius poteritis, esse vel Ca. Categoricalē vel Hyp. Hypotheticam. Secundo si quærat^r qualis sit? Respondendum est per eius Qualitatem, esse vel Ne. i. Negatiuam, vel Aff. i. Affirmatiuam. Tertio, si interrogetur quanta sit? Respondendum est similiter per eius Quantitatem, esse vel V. id est Vniuersalem, vel Par Particularē. In. Indefinitā, vel Sin. Singularē.

Sic

Sic enim in Scholis nostris, apud nos Oxonienses, me puero, loqui solebamus. Vt cuique barbarè scripserit, qui hunc versum composuerit, (quod ego non approbo) memoriæ tamen iuuandæ, utilis est & percommodus.

Signa vniuersalia sunt, *Omnis, Quisque, Totus Vniuersus, Cunctus, Quis non, Neino, Ne vnus* quidem. Atque notate, generale hoc signum (*Omne*) per Synecdochen, nonnunquam restringi ad particulare, vt, *Omnis Iudæa ibat ad Ioannem, Mat. 3.* *Omnis*, id est, ex Iudæa plurimi. *Et, omnis lex, in vno sermone impletur, diliges proximum tuum, sicut teipsum, Galat. 5.* *Omnis lex, i. omnis lex secundæ tabulæ. Et, predicate Euangelium, omni creaturæ, Marc. 16* id est, omni homini, vel omni credenti.

Ex hoc scripturæ loco, S. Franciscus, anseribus prædicabat. *Obstreperum animal Anser: ferunt tamen, ab his sororibus auiculis, magno silentio auditum fuisse, quemadmodum belle notat festinus Erasmus, in suo Colloq. Medardo.* Pius sane, & plus quàm misericors homo, qui Anserum salutem, hoc modo consultum vellet.

Hæc, & similia propositionum genera, vocari possunt, generalia *Synecdochica*, & *Restrictiua*.

Propositio omnis Indefinita, est absque signo

no & nota vel vniuersali vel particulari. Quæ in materia necessaria, valet vniuersalem : vt, homo est animal, vel rationalis, vel risibilis, æquipollet cum his Propositionibus, omnis homo est animal, omnis homo est rationalis, omnis homo est risibilis. Rursus, Indefinita propositio, in materia Cōtingēti & non necessaria valet particularem, vt homo est doctus, id est, aliquis homo est doctus. Monachi sunt virgines, i. quidam Monachi sunt virgines. Quamuis enim omnes cælibes sunt, tamen omnes virgines nō sunt. *Sunt, qui propter regnum Calorum, seipsos castrauerunt, Mat. 19.* Sed, me Hercle, nostri Romanenses, tales non sunt. *Durus est hic sermo, non omnes capiunt verbum hoc.*

Affirmatiua propositio dicitur, vbi principale verbum affirmatur, vt *Antonius Eremita*, fuit vir integerrimus. *Pambus*, fuit homo bonus, sed illiteratus. De quo, memorabile est illud, quod historia Ecclesiastica, de illo narrat, de linguæ vitio refrenando: quod, vtinam garruli homines, & loquaces Pici nostræ, imitari velent. Optandum hoc, sed sperandum minimè.

Propositiones Modales.

Propositiones aliquæ, vocantur Modales, seu Modificatæ, quæ his quatuor vocabulis & fig-

nis, notari solent, *Necesse, Impossibile, Possibile, & Contingens*. Hi termini, modum propositionibus imponunt, easque diuersimodè afficiunt, vnde eas *Modales, seu Modificatas* esse nuncupatas, ego auguror, si non sum falsus vates: neque habent magnam vtilitatem adhuc mihi cognitam. Tamen, quia magnus *Aristoteles lib. de Interpretatione*, de illis tractat, volui vos (iuuenes) de illis vtcunque admonere. Atque haud scio (vt dicit doctissimus Keckermannus) magisne doctrinam hanc Modalium Scholastici exercuerint, quàm illa eos vexarit. Certè, vsque adeò ab illis sudatum & elaboratum hic fuit, vt Dieterio satis noto, locus datus sit, *De modalibus, non gustabit Aſinus*. Horum itaque tractatio, ad vos minus exercitatos, adhuc non pertinere, arbitror. Vtrum in posterum vsui vobis crit, vos ipsi videbitis.

Vniuersalis affirmatiua, difficulter probatur, facillimè refellitur. Vniuersalis negatiua, facilius probatur, & difficilius euertitur. Particularis affirmans, facile probatur, difficulter euertitur. Particularis negans, facilius probatur, difficilius refellitur. *Ex Barth. Keckermanno*, hæc postrema mutuatus sum: si igitur hanc admonitionē commodam & vtilem perspiciatis, vtimini quæso, & grati estotè. Profectò, ingenui homines non dedignantur ingenuè,
per

per quos profecerint agnoscere & confiteri,

Equipollentia.

AEquipollentia, seu Identitas, duplex est, Dictionum simplicium, & Propositionum. Simplicium, ut Ensis & Gladius : Iacobus & Israel, liber & codex, fur & Latro. Inrerrogatus quondam à Iudice, fur quidam, quam differentiam inter furem & Latronem nouerit, respondet intrepidè, Iudicem sublimè sedentem, latronem esse, se verò pro re minima incarcerationatum, furem appellari solitum esse. Ego verò, quia nullos latrocinantes Iudices cognoui, hanc distinctionem non agnosco.

Propositionum AEquipollentia, est diuersorum verborum, vna eademque significatio: ut non omnis homo est doctus, & quidam homo non est doctus. Nemo non est risibilis, & omnis homo est risibilis, hæc æquipollent, & eadem sunt.

Atque, oportet eum qui non vult decipi (ut docet Plato in Phædro) in rerum *similitudines & dissimilitudines accurate introspicere*. Multi enim, pro rebus ipsis, imaginum specie & larua externa sæpius decipiuntur. Itaque, ex sacris literis, (Theologiæ Studiosis) notanda sunt hæc & similia exempla: *Non omnis viuens in*

conspetu tuo iustificabitur, Psal. 142. & *nullus
vivens in conspectu tuo iustificabitur: hæc æqui-
pollunt. Et, non exies (e Carcere) donec reddas
novissimum quadrantem* (ut loquitur vetus in-
terpres) i. nunquam exies, vel (Latinius) exhibis
si nostri Romanenses paterentur eum Latine
loqui. Hæc enim similiter æquipollent, ut *Hi-
eronymus, Chrysost. Theophyl & Nicholaus de
Lyra*, illum locum exponunt. Purgatorium
itaque papisticum, ab hoc loco (horum iudi-
cio) stabiliri & confirmari non potest.

Phrasis linguæ Hebraicæ & Græcæ (quia sa-
crarum literarum fontes sunt) ad hanc AEqui-
pollentiam melius intelligendam, a Theologiæ
candidatis, diligenter observanda est. Simili-
ter, multiplex variandæ sententiæ ratio, apud
Latinos Qua de re, Erasmus Roterodamum
consultere poteritis, lib. 1. *Commentar de Copia*.
Hos interim versus legere poteritis.

Non omnis, quidam: non omnis non, quasi nullus

Nonnullus quidam: sed nullus non, valet omnis:

Non aliquis, nullus: non quidem non, valet omnis

Non alter, neuter: Neuter non, præstat uterq.

Atq; huius Equipollentia manifestandæ

*causa, audite quæso ex me, exemplum ridicu-
lum.*

Habet in manu sua, stultus meus puer,

quatuor lapillos, cum sorore paruula ludit,

lapillos hos suos abstulisse conqueritur. Ost-

endit mihi plorans, bis duos, nisi hos (inquit)

ego

ego habeo. Stulte puer, audi me, nullos abstulit soror tua. Quos enim in manu retines, & quatuor, æquipollent: bis duo, semper quatuor faciunt. Silet tunc meus paruulus, lacrymas mappa pendula abstergit, & quietus est. Euge (iuvenes studiosi) in docendo & instruendo dexteritatem meam: ego, ut videtis, vno verbulo, hunc meum paruulum, subito creavi Dialecticum. Utinam ego, simili modo, quum orta tempestas fuerit, Eulaliā meam possem compescere.

Imprudētius forsan hoc dictum excidisse existimetis (*Creasse*) me Dialecticum, quod *D. Papa*, iure hæreditario sibi vendicat, & inter Casus Papales est illi reseruatum, suæque Cathedræ agglutinatum. Ego tamen ab illo (homine peccati) veniam non deprecabor: *Papæ* omnipotentiam & Deitatem mentitam, neque veneror neque vereor. Per Dei gratiam Argallo seni, & iam iam morituro, nocere & incommodare non potest. A Tarraro & Gehenna (misericors pater) libera animam meam, *Purgatorium Papisticum* non metuo. *Tertium enim locum* (cum *Augustino*) penitus ignoramus, imo, in sacris scripturis, cum non inueniemus, *Hyponostic. lib. 5.*

Conuersio.

Conuersio propositionum triplex est, *Simplex* conuersio, per Accidens, & per Contrapositionem: Conuersio, est migratio subiecti in locum prædicati, & prædicati in locum subiecti, quantitate & qualitate manente eadem. Pro his duabus prioribus conuersionibus, hic sequens versiculus, memoriæ mandari potest.

Ecce, Tibi, simplex vertit: Facit, Edo, per Acci.

In quo, hæ quatuor vocales, *A. E. I. O.* notandæ sunt. *A.* significat generalem affirmantem, *E.* generalem negantem, *I.* particularem affirmantem, *O.* particularem negantem, vt in Syllogismorum modis, postea manifestum vobis faciemus.

Simpliciter conuertuntur, propositiones generales negantes, vt nullus vrsus est leo, ergo nullus leo est vrsus. (trum?)

Vrsa, quid infrendes, quid dētibus incutis An.

Vrsa, cares cauda, non potes esse Leo.

Et, nullus homo est saxū, ergo nullum saxū est homo, Similiter, cōuertūtur simpliciter, particulares aientes et affirmātes vt, quædā fortitudo est virtus, ergo quædam virtus est fortitudo vt est in prima huius uersus parte.

Ecce, Tibi, Simplex vertit.

Et notandū est interdū generales affirmātes, conuerti simpliciter, viz, si prædicatum sit vel Definitio, vel Differentia, vel Proprium, quorum natura, conuersionem cum suo subiecto pati-

patiuntur, vt omnis homo est animal rationale, ergo omne animal rationale est homo: hæc definitio est hominis. Omnis homo est rationalis, ergo omne rationale est homo: hæc differentia est eiusdem, Omnis homo est risibilis, ergo omne risibile est homo: hoc, hominis est proprium. Simplex hæc conuersio (vt videtis) in reciprocis & conuertibilibus, non est reprehendenda.

Per Accidens conuertuntur, vniuersalis affirmans, & particularis: vt omnis homo est risibilis, ergo quoddam risibile est homo.

Similiter, vniuersalis negans & particularis, vt nullus homo est lapis, ergo quidam lapis non est homo, vt in huius versus parte posteriori apparet

Facit, Edo, per Acci.

Tenuis hæc, & ieiuna per Accidens conuersio, in Syllogismorum Reductionibus, aliquem vsum habere, non negauero. Modi namque imperfecti, per hanc qualemcumque conuersionem, ad modos perfectos reduci possunt, Sin vero vobis placeat (quod facere debetis) ex modis vsitatis & perfectis ratiocinari, non erit vobis opus, hac conuersione per Accidens vt neque Syllogismorum Reductionibus, omnino vti. Itaque, aut reiici tanquam superfluum, aut tanquam minus necessarium, bene omitti potest, vt ego arbitror. Diuidicent hanc rem, Academici nostri: nolo enim in cudendis nouis dogmatibus Papa esse, i. nolo esse homo

singularis.

Tertia conuersionis forma, est per Contrapositionem, vel contra Oppositionem : quæ tum fit, quando termini finiti, per negationem Prædicati & Subiecti, conuertuntur in terminos infinitos, vt homo est risibilis, ergo quod non est risibile, non est homo. Esau, fuit rufus & hispidus, Genes. 25. ergo, qui non est rufus & hispidus, non est Esau. Iacob frater, per Rebeckæ matris astutiam, Isaac patri imposuit, qui putabatur fuisse primogenitus Esau, reuera tamen non fuit.

Hæc conuersionis forma per Cōtrapositionē, gignit figuram secundam, quod diligenter notandum, iudico. Porro, eius vsus, in obscuris propositionibus illustrandis, & in arguendo ab Oppositis, valdè commodus est, modo appositè illud faciamus. Ioannis ad Oppositum (me puero) nihil aliud fuit, quàm garrulus & loquax Sophista. Sic itaque pugnando & repugnando disputemus, vt veritati agnitæ, nos seriò nunquam opponamus. Ioannis ad oppositum, nomen ignominiosum, fugiamus. Caueamus verò diligenter, ne contra Deum opt. Max. exercendi ingenii causa, vnquam disceptemus. *Impia est consuetudo disputandi contra Deum, seu ex animo illud fiat, seu simulatè.*

Cic.

Propositio Hypothetica.

Propositio Hypothetica, triplex est: Conditionalis, (Si) vt, si nihil attuleris, ibis Homeræ foras.

foras. Copulativa (Et) vt, *Deus est & Clemens, & Misericors*, Exod. 34. *Disiunctiva* (aut) vt, *Arrius fuit, aut hæreticus aut orthodoxus, Papistici Sacerdotes, sunt aut pastores boni, aut mercenarii homines.*

Ex propositionibus Hypotheticis, Syllogismos Hypotheticos, facile conficere poteritis, si minorem propositionem addere volueritis, quod facile factu reperietis. Syllogismus Disiunctiuus, vt sit bonus & completus, plenam membrorum enumerationem requirit, quemadmodum mox audietis.

In Conditionali hypothetica propositione, hæc regula obseruari potest : A positione Antecedentis ad positionem Consequentis, sequitur Argumentatio. Similiter à negatione vel destructione Consequentis, destruitur Antecedens: vt, si homo est, animal est, sed homo est, ergo animal est. *Si Thomista, tunc Idololatra, sed Thomista, ergo Idololatra.* Thomas enim Aquinas (qui est Angelicus doctor) dicit *Imagines esse colendas eo honore, quo exemplar seu Prototypon.* Itaque Christi Imaginem esse adorandam Latria, Aquinas, in 3. libr. Senten. Dist. 2. Cuius opinioni, Holcot (qui est alius scholasticus doctor non indoctus) contradicit, in libr. Sapient, Lectione, 127. Vtunque hæc doctrina, ab Angelico doctore est profecta, terrena est tamen, non Angelica doctrina: &

*Aquinas,
Idololatra.*

à nullis scriptoribus, nec veteribus, nec modernis, nisi à *Thoma* solummodò inuenta & mundo protrusa, quod vobis inuenibus, diligenter notandum iudico. Atque porrò, (quæso auscultate) in propositionibus Conditionalibus reciprocis & conuertibilibus, valet consequentia, à Positione Consequentis, ad Positionem Antecedentis: vt, si equus est, hinnibilis est, at, est hinnibilis, ergo est equus. Hæc consequutio reprehédenda non est. Negatiuè, hoc modo: si hómó est, animal est, sed non est animal, ergo non est homo.

Huius Conditionalis, in argumentando, multiplex, & frequens est vsus. Copulatiua hypothetica propositio, per duplicem coniunctionem copulatiuam dignoscitur, vt, *Socrates est & vir prudens, & bonus homo. Marcus Cicero, & bonus Consul est, & optimus Orator.* Hæc Copulatiua, quid sit, nosse non nocet: nemo hoc reprehendere potest. Sed eius in argumentando vsus, adhuc non animaduertimus. De rebus superfluis, benè monet *Mediolanensis Ambrosius, Multa oneri, moderata vsui, Epistolar. lib 7.* Itaque, necessariis & vtilibus præceptiunculis (quæso vos inuenes) contenti simus, non necessarias & superfluas, vt onera & impedimenta, reiiciamus.

Propositio Hypothetica disiunctiua est, cuius partes, coniunctionibus disiunctiuis connectuntur

nectuntur: vt, omnes sacerdotes Papistici, sunt aut *Claustales*, aut *Saculares*: Sunt aut *Regulares*, aut *Irregulares*. Certè, difficile est regulas bonas & pias obseruari, inter tam irregulares, & irreligiosos homines.

Qui curios simulant, & Bacchanalia viuunt. Iuuenal.
Huc aptè Dilemnia Cornutum referri potest, *Satyr.*
(eruditissimo Keckermanno monitore) quod *secund.*
argumentandi genus, tunc solidè constringit, cum diuisio fuerit plena & perfectà. Itaque, hoc Aristippi, non est efficax. *Si uxorem duxeris, habebis aut pulcram, aut deformem: Si pulcram, habebis communem, sin deformem, habebis penā.* Ad quod Phauorinus, apud Gellium, lib. 5. cap. 11. rectè respōdet, esse imperfectam diuisionem. Sic enim dici debuit, omnem mulierem, aut pulcram esse, aut deformem, aut mediam.

Hic mihi in mentem venit, Dedali prudentis patris, ad Icarum filium, iuuenem temerarium, graue consilium, *Medio (inquit) fili, tutissimus ibis.* Quid si ego similiter vobis iuuenibus, in ducenda vxore persuaderem: neq; formosas neq; deformes, sed medias esse quærēdas vobis Vt cūq; sic moneo, vos eas eligite quę vobis optimè placent: nihil enim impedio, modo optimas & vobis commodissimas. Nimum ne properetis quæso: Sat cito si fat bene. Malas & morosas facillime reperietis, nisi bene caueatis

caueatis. Inuenit Rex Salomon, virum de mille
vnum: mulierem ex omnibus non inuenit, Ec-
clesiastes 7. 29: Deus bone, mulierum bona-
rum, & verarum differentiarum, quanta pauci-
tas, quanta penuria? Itaque caueat.

Pergamus vno vel altero exemplo, has Disiun-
ctiuas, clariores facere. Omne animal, aut ra-
tionale est, aut irrationale.

Omnis homo, *tangens montem sinai, lapidibus*
apprimetur, aut confodietur iaculis, Exod. 19.

Atque in arguendo sequitur hoc modo: A po-
sitione primæ partis, ad destructionem po-
sterioris partis, bona est consequutio: vt terra
aut mobilis est, aut immobilis, sed terra non
est mobilis, ergo est immobilis, vt antea in
Cōditionali explanatum fuit. Dauid, propter
numeratum populum, punietur aut fame, aut
bello, aut pestilentia, sed neque fame, neque
bello, ergo Pestilentia, 2. Sam. 24. Hic consu-
lere poteritis, locum à Diuisione, à Speciebus,
& à Partibus: horum enim locorum cognitio,
quomodo Hypothesica disiunctiua valeat, & in
arguendo sequatur, commodè vos docebit.

Huius consequentiæ vis, in membrorum
Oppositione & Disiunctione dependere,
manifestum est. Vnde, vitiosas esse eas necesse
est, cum membra sunt subalterna, & subordi-
nata. Secundo, recta disiunctio requirit ple-
nam membrorum enumerationem: vt, hæc

Czre-

Ceremonia, est vel pia vel impia, est autem hæc non impia, ergo pia & licita. Respondendum vobis est, imperfectam esse partium enumerationem: addendum enim fuit, aut Indifferens, & Adiaphora. Hanc distinctionem, vtinam fratres nostri imbecilliores, melius consulissent. Imbecillos eos appello, proteruos & præfractos, adhuc non denomino.

Hypotheticus Syllogismus Conditionalis, sublata conditione, ad Categoricalum syllogismum facile reduci potest, hoc modo. Si homo est, risibilis est (deme conditionem) & tunc, talem syllogismum bonum & legitimū inuenietis, Omnis homo est risibilis, Socrates est homo, ergo Socrates est risibilis: bonus est hic syllogismus, in (*Darii*) de quo postea dicemus.

De locis Personarum.

Loci Personarum sunt, Genus, Natio, Sexus, Aetas, Educatio, Habitus corporis, Victus & conuictus, seu conuersatio nostra, Nomen, Mors, & quæ mortem consequi solent, vel fama post mortem. Hi loci, seu Circumstantiæ, probabile duntaxat argumentum efficiunt, & vix probabile quandoque: necessarium nunquam gignunt: & referri hæc possunt singula (non incommodè) ad locum externum de

Acciden.

Accidentibus, seu Contingentibus. Quod, ante me fecit *Ant. Gorscius*, in re Dialectica, vir doctus, & bene exercitatus.

4. A genere seu a Semine et Parentibus: ut, fortis est quoniam ad Hercule, vel Theseo, vel Alexandro Magno, est oriundus.

Fortes creantur fortibus, et bonis.

Improbus est, quoniam improbis parentibus natus est, ut, *Mali corui malum ouum*. Bonus David, Absalonem habuit, filium pessimum. Achas impius, optimum filium Ezechiam Regem. Itaque, videtis (intuens) argumentum hinc deductum, necessario non sequi, sed contingenter. Verissime igitur, & suauissime vetus Poeta Euripides cecinit.

De Nobilitate, parum laudis prae dio arc possum: Bonus enim vir mihi nobilis videtur:

Qui vero non est iustus, licet a patre meliore,

Quam Iupiter sit, genus ducat, ignobilis mihi.

Hoc à genere & semine argumentum, in animantibus rationis expertibus, multo probabilius consequutionem habet: ut illud Horatii Flacci ostendit.

Est in Iuuenis, est in equis patrum

Virtus, nec imbellem feroces,

Progenerant Aquile columbam.

A natione & Patria: ut, *Anacharsis* philosophus, barbarus fuit, quoniam Scythia fuit Obiicienti quod Scythia, & homo barbarus fuerit, false

Horat.
Carm. lib.
quarto.

2.

falsē respondet, & nos Scythæ, vos barbaros esse, arbitramur.

Ille, vel ille, perfidus est, quoniam *Pannus*: bibaculus, quia *Germanus*: superbus, quia *Hispanus*. Nouis spargendis & dilatandis ociosē deditus, *quia Atheniensis Act. 17*. Vaser & inconstans, quia *Gallus*: libidinosus, quia *Italus*, mendax, quia *Cretensis*. Hinc illud *Pauli ex Epimenide*, *dixit quidam ex illis, proprius ipsorum Propheta, Cretenses semper mendaces, mala bestie, ventres Pigri, Tit. 1. 2*. Et tamen, qui hoc dixit *Epimenides*, mendax non fuit. Dicendum itaque est, nationem illam ad mendacia procliuem fuisse, omnes tamen *Cretenses* actu mendaces non esse.

A *Sexu* vt mulier est, ergo inconstans ergo timida, verbosa et garrula: vt *Socratis vxor Zantippa* (quam retinebat homo nimis prudens patientiæ suæ exercendæ gratia) vt ipse apud *Zenophontem* testatur. Nollem ego vxorē meā, matula sua, patientiam nostrā sic exercere. Talis fuit *Affrania*, *Licinii Buccionis* Senatoris vxor, mulier impudentissima, & clamorissima, vt habet *Valer. Max. lib. 8*. aliæque huius fermenti quàm plurimæ, vt est notissimum. Habent igitur & senatores, & magni viri, quandoque *Zantippas* & *Afrantias* suas, & suos suos. Ha, ha, he: non enim hic possum me continere,

3.

Est

Est solatium miseris, in penis habere consortem
Bonæ tamen, & sanctę feminæ, tales non sunt
vt intemerata virgo Maria, Chistotocos, & The
orocos) virgo & martyr Theodora, de qua Am.
brosius scribit, lib. de virginibus. Et Elisabetha,
nuper Angliæ regina nostra nobilissima (no-
stra Cornelia) aliæque permultæ. Neque
hic inter bonos, prætereunda est Penelope,
Vlissis, Ithaci principis, coniux castissima, &
amantissima consors.

Ouid. 1. lib.
Elegiar.

Penelope mensit quamvis custode careret,
Inter tam multos intemerata procos.

Et ne videar ingratus hospes, docta. & religi-
 osa fæmina, D. *Katernia Cook*, claris parētibus
 prognata *Henrico Killigreo Cornubiensi Ar-*
migeroprime enupta, postea equiti Aurato, ad
exterarum nationes sæpius legato & Oratori Re-
gio, prudentissimo, ambobus nunc in Domino
placide requiescentibus. Quibus, me plurimum
deuinctum & obligatum fuisse, non possum
non hoc in loco ingenuè confiteri, & posteri-
tati notum facere. Cuius erudita Coniux, in
mei coniguii initiatione apud Cornubienses
Anglos, cum Anna Daniel (virgine generosa)
hoc scripsit Epithalamiū carmen, doctum sanè
& elegans Tetrastichon.

D. Caterina
Cook.

Inceptis Argal! et tuis pater optimus adsit.
Respiciat placide regem, tuamque precor
Anna sit ut puro tua coniux casta marito.

Vos

Vos ambo Christi (membraque casta sui.
Dicendum itaque est, mulieres natura sua,
& sexus imbecillitate, maiori ex parte inconstantes, timidas, verbosas, & garrulas esse, tamen per Dei gratiam, omnes tales non esse.

Ab ætate, ut puer est, ergo ei ignoscendum est. Parcendum pueris & paruulis esse, ego libenter dixerim, neque eorum ramos tenerrimos duriusculè tractandos, affirmaverim: sed, sub ferula & disciplina educandos esse, cettò pronuntiauerim. Melius tamen hoc modo arguere poterimus: puer malus est & nequam, ergo castigandus est. *In tempore eum castiga: qui enim parcit virga, odit filium, Prou. 13.* Et rursus, *Sultitia colligata est in corde pueri, & virga disciplina fugabit eam, Prou. 22.* modò Orbilios plagosos instructores, non experiantur, *Nam, punire malum, charitas est, ut habet Hieronymus.* Hoc bonum est & salutare, seu in pueris castigandis, seu in adultæ ætatis hominibus, quibuscunque, si modum & rationem non excedat. Ab æducatione, ut prauus est, quoniam malè æducatus: aut bonus est *Crisias & Alcibiades*, quia Socratem magistrum & instructorem habuerunt. Et tamen Crisias, malus vir fuit, & sodalis eius *Alcibiades*, patriæ proditor fuit, et homo leuissimus, nunc pro Patria, nunc contra Patriam dimicans, veteri Eucebolio inconstantior, de cuius le-

uitate, Ecclesiastici scriptores narrant, *ut Socras. histor. Ecclesiastic. lib. 3.*

Abraham, fidelium pater, benè educavit *Ismaelem* filium suum, hic tamen, fratrem suum bonum *Isaacum*, persequutus est. Itaque, ex paternis ædibus eiectus fuit, *Genes. 21.* Et doctissimus *Seneca*, *Neronis Caesaris præceptor* fuit: sed, in eo educando (ut omnes norunt) oleum & operam perdidit-*Senecam* præceptorem occidi iussit, matri genetrici non parcebat: vnde, eius temporis Poeta non malus, in eum falsè, hoc modo iocatus est.

Ex Suetonio *Quis negat Anea, magna de stirpe Neronem?*
Sustulit hic matrem, sustulit ille patrem.

6. Ab habitu corporis externo, vultu, complexione, vestibus, incessu tarco vel præcipiti, & similibus. Ex hoc loco, *Zoilum*, malum & nequam hominem fuisse, colligit festius poeta *Martialis*.

Martial. *Criueruber, niger ore, brevis pede, lumine laesus:*
Rem magnam præstas Zoile, si bonus es.

Zopyrus. *Socratem Atheniensem*, virum prudentissimum ex vultu & proportionem corporis, quidam *Physiognomie* curiosè periti, natura ebriosum, mulierosum & stupidum, iudicarunt. Talis reuera fuissem (inquit *Socrates*) nisi Philosophiæ studium, melius me informasset. *Ex visu cognoscitur vir. & ab occurso faciei cognoscitur sensatus. Amictus corporis, & risus dentium, &*

ingressus hominis, enunciant de illo, Syrach, 19. probabiliter scilicet, non necessario.

Similiter de Thersita, & eius informi deformitate, colligit Homerus, pessimum hominem fuisse. *Thersites, fedissimus omnium qui ad Troiam nauigauerunt, altero oculo strabone, altero pede claudo, angustissimis humeris, & ad pectus usque contractis, vertice acuminato, raro capillo, & co impetigine astricto, Anglicè (a scurvy companion) atque inter alia, ab optimo & suauissimo Poeta, illi obiecta, bonos viros odio habebat.*

Pelida, in primis erat, atq; inimicus Vlissi. *Achilles.*
 Maior enim nulla potest esse reprehensio, quàm præclarissimis vitis esse inimicum, *Plutarch. de Inuidia & Odio.*

A conuictu, victu, & societate eorum quibuscum viuimus: vt, improbus est, quoniam cum improbis & malis vivit & conuersatur. Hoc plerumque verum est, nisi tales congerones tempestiuè relinquamus. *Qui enim picem tetigerit, inquinabitur ab ea: & qui communicauerit superbo, superbiam induet, Syrach. 13.* Didicit Ioseph in regia Pharaonis, per eius salutem iurare, *Gen. 42.* Petrus, ad prunas stans, in Palatio Pontificis, negavit Christum, & peiefauit, *Ioan. 18.* Paulus Apostolus, in Phariseorum & Scribarum conciliabulis, blasphemauit, persecutor fuit, contumeliosus fuit 1.

Tim. I. Postea uerò, de Cælo conuersus, & Christi seruus factus, nouus homo, noua creatura fuit, pro magistro Christo, contra superbos Iudæos acriter disputans, affirmans quoniam hic est Christus, *Act. 9.* A malo itaque hominum consortio & societate impura, tanquam à Colubro, tanquam a rabido cane, tanquam à pestis contagione, fugiendum vobis est. Quod enim Hypocrates de peste vitanda prudenter monuit, illud vobis hic faciendum suadeo, *Citò, Longè, Tardè.*

8. A nomine & Cognomine, seu ab Etimologia Nominis. Hinc interdum ioci & cauillationes, atque etiam malæ suspiciones oriri solent inter homines. *Ne ponat oro, Dominus meus Rex, cor suum, super virum istum iniquum Nabal quoniam secundum nomen eius, stultus, & stultitia est cū illo. Abigael uxor, ex mariti sui cognomine*, eum esse insipientem & stolidum colligit, quia nomen eius Nabal fuerit, *1. Sam. 25.* Ex hoc loco, plurimæ vxores, Abigaelis exemplo permotæ, maritos suos, & stultos vocant, & stultos faciunt: subtiles profectò & acutæ disputatrices.

Rectè Verres dictus est, inquit *M. Cicero*, quia verrit et rapit omnia. Hieronymus Pater, quendam Vigilantium aduersarium suum, Dormitantium vocat. *In hunc scribendo, ita debacchatus est (inquit Roterodannus) ut in illo*

illo plusculum modestiæ cogar desiderare. Vt-
nam Argumētis pugnasset, & à cōiitiis sese tem-
perasset. Sic Esau, homo impius, Sarcasmo ama-
rulento, in Iacobum fratrem suum ludit. *Iustè*
(inquit) *vocatum est nomen eius, Iacob: iam e-*
nim me supplantauit bis, Genes. 27. Iacob enim
Hebraicè, supplantator dicitur.

Etimologiæ aliquæ sunt ineptæ, inutiles, &
ridiculæ, neque in argumentando, vlllo modo
probabiliter valent, eruditæ indignæ: vt Petra
quia pedibus teratur. Aqua, à qua omnia: Mi-
les, quasi mira res in Mnndo. Magister, quia
ter magis sit aliis: Presbyter, præ aliis scilicet
ter bibens: Pulcra fane notatio nominis, &
Presbyteris strenuè potantibus, dignissima.
Sebastianus, quasi (Se)sequens: (B)beatitudo,
(Asti)Astium, quod est ciuitas, & (Ana)sur-
sum. Quasi sequens beatitudinem ciuitatis su-
pernae. Hanc pulcram notationem, habet Iaco-
bus de Voragine, in legenda Aurea, de S. Se-
bastiano, Quis ad hanc barbariem (inquit
Keckermannus) risum tenere potest? Atque
tales ineptas Etimologias, passim apud ineru-
ditos scriptores Ecclesiasticos reperietis, quæ-
admodum in illis legendis, ab illo, sæpius ob-
seruatum fuit.

A Fortuna (sic vulgò nuncupata) seu veriùs
à bonis Externis: vt vir probus est, scilicet
quia diues est: pulcra profectò, & valida ratio

cinatio. Reuera, sic vulgo diuites (quamuis pessimi sint homines) hodie reputantur, laudamus & admiramur eos, namque,

Juvenal.
Satyr. 3.

*Quantum quisq; sua nummorum seruat in Arca
Tantum habet & fidei.*

Cauete (inuenes) ne hæc larua decipiat vos. Laban enim diues fuit, sed bonus homo non fuit, sed sordidus & auarus, & in bonum Iacobum, seruum fidelissimum, ingratiſſimus. Similiter, diues ille apud Diuum Lucam, helluonequissimus fuit, bonum Lazarum, hominem morbidum & famelicum contemnens: itaque non obstantibus diuitiis, prout dignus fuit, *In Inferno sepultus fuit, Luc. 16.*

Probabilius hoc modo, Diues fuit, ergo malus fuit. *Diues enim difficulter in Regnum Calorum intrabit, Mat. 19.* Cauete igitur vobis O vos Angliæ nostræ fæneratores, & Euclionenes tenacissimi, rapacissimi, crudelissimi homines. Vos ego indignabundus alloquor, qui ex sudoribus famelicorum pauperum, ociosi ociosè viuitis, Iudæi, non Christiani homines, Usurarii Tarbith, Usurarii Nesc, Pecus hominum, trium literarum homines, (nescio quo vos nomine appellem) (Anthropophagi, & hominum viuentium deuoratores, quod truculenti *Cambales* facere non assolent. Hi enim mortuos, vos viuentes deuoratis, & quasi absorbitis. Cauete inquam, *qui enim in Diuitiis suis malè confidunt (ut vos facitis) difficulter i*

regnum

Fur.

regnum Calorum intrabunt, Marc. 10. Itaque, ne dicatis non prædictum fuisse: rursus dico, aut caute, aut *knaute*, profectò magna ex parte, insignes & egregii nebulones estis omnes: (Eccho) omnes.

A morte, vt violenta morte oppressus est, 10.
ergo malus est: vel subitò moritur, ergo impius fuit. Plumbeum est hoc argumentum, & male sequitur. Non enim solum sicarii, patriæque proditores, homicidæ & similes quisquiliæ, rotam & crucem experiuntur, sed *Dei Martyres*, sanctissimi, & innocentissimi homines. Ab hoc loco, cum Papistis nostris, sic argumentari placeat: Storæus, Campianus Iesuista, Sherwooddus, Nortonus, & nuperrimè *Clarkus & Watsonus*, huiusque fermenti similes, morte violenta per Magistratum nostrum sublati sunt, ergo boni viri non fuerunt. Hâc consequutionem tanquam insufficientem, negaturos illos, ego mihi certò persuaferim. Tales etenim, suæ Ecclesiæ Martyres esse vendicant, & in Legenda sua Aurea, in Sanctorum album & Callendarium, pulcrè disponunt. Sint tales (in malam rem) & decem tales, Romanæ Synagogæ Martyres si voluerint, nostræ Ecclesiæ Martyres non erunt. Non enim supplicium facit Martyrem, sed causa.

In primitiua Ecclesiæ sanctæ persequutionem multi boni & pii fratres, morte crudeli & vio-

lenta, pro christi nomine extincti sunt, ut est notissimum. Et, in postrema, sub Diocletiano Imp. ex Brytannia nostra, S. *Albanus*, & *Amphybalus*, hac Martyrii corona nobilitati sunt. Itaque, mors violenta & extorta, non debet sanctis Dei viris præiudicare. aut malos & impios homines multum decorare.

Phyllis; ap.

Ouid.

II

Careat successibus opto,

Quisquis ab Euentis, facta notanda putet.

Quæ mortem consequuta sunt, vel fama post mortem, Eius scilicet mortem, bona fama sequuta est, ergo vir bonus fuit. Et, malè de eo iam mortuo loquuntur homines, ergo malus homo fuit. Ut ut, talis homo malus fuit, profectò mala est hæc consequutio. De morte *Caii Lelii*, sic loquitur *M. Cicero*. *Quàm charus (inquit) ciuitati nostra fuerit, mærore funeris indicatum est.* Oratoris Romani hæc probatio, mihi non probatur: probabilis forsan, sed necessaria non est. *Herodes* enim, cognomento *Magnus*, astutus homo, & callida vulpes, multos ex nobilioribus, in ipso mortis articulo, crudeliter occidi iussit, ut testatur *Hebræorum Antiquarius, venerandus Iosephus*: ut scilicet in illius funere, *Herodis* mortem viderentur piè lamentarier, *Herodes* itaque bonus Rex fuit, & lacrymis dignus, hoc non sequitur. Illi enim, charissimos suos amicos extinctos deplo-
rabant, non *Herodem*, tyrannum truculentis-
simum

*Antiq.
lib. 17.*

finum.


Porro, de Christo Iesu, hoc notandum est, quamvis fuerit agnus ille castus & *immaculatus, tollens peccata mundi*, statim tamen post mortem, levis & mentiens fama, illum seductorem fuisse, in Iudæa, falsò & malitiosè proclamabat, Mat, 27, 63.

Erant, qui *Laidem Corinthiam, & Floram illam Romanam*, notissimas meretrices, post mortem carminibus suis Panegyricis egregiè celebrabant. Erant etiam, qui impuram Venerem, Deam faciebant, & in Cælo inter Planetas (creaturas nobilissimas) collocabant. Nollem ego quenquam, vxorem meam (si formosa esset) cū *Candaule stolido*, hoc pacto laudare. Quod si facerent, sanè me cornutum fore, statim diuinarem.

Loci Rerum.

De locis, seu circumstanriis Personarum, quæ ad amplificandum magis quam summiter probandum faciunt, iam diximus: sequuntur nunc loci Rerum, qui secundum vulgatam diuisionem, sūt aut Interni, Externi, vel Assumpti. Quæ locorum distributio (vt est à plurimis tractata) mihi adhuc non satisfacit, vt neque multis aliis, viris doctissimis. Materialis enim & Formalis causa, quas inter locos Externos ponere

ponere solent, sunt potius inter locos inter-
nos enumerandi, quia ad rei Substantiam pro-
pius pertinent, si quicquam ego iudicare pos-
sum. Porro, hæc duo Accidentium loca (*Con-
tingentia dico, & Nomen Rei*) alibi tractantur,
inter Personarum, ab his omnino distinctos &
separatos, quemadmodum modo audiuitis. I-
deoque, hic rursus non otiose repetenda aut
obtrudenda vobis. Tamen, ex multis autori-
bus, ego illam viam sequutus sum, quæ mihi
deliranti seni, præ cæteris probabilior, & ad
veritatem arctius & proprius accedere vide-
batur. Itaque, volente Domino, sic progre-
diemur.



Sed primum, ante locorum tractationem, hoc vobis notandum est: quodcunque arguendo probare voluerimus, illud cōclusionem nostram faciamus. Porro, & hoc sequens consilium, prætereundum non est, omnia Argumenta, ex suis locis quasi sedibus desumi, aut à Subiecto, aut Prædicato conclusionis nostræ, Si Medium vel Argumentū sit Genus subiecti, aut Species, aut Differentia, aut Proprium, tunc Argumentū ductum est a Genere, vel Specie, vel à Differentia, vel à Proprio subiecti conclusionis. Similiter iudicandum est, de Prædicato: vt, si Argumētum vel Mediū sit genus, vel proprium prædicati conclusionis, tunc Argumentū illud dicetur ductum esse, à Genere, vel a proprio prædicati conclusionis nostræ.

Valde utilis est hæc præceptio, sed duriuscula (vereor) vobis inuenibus, in hac arte nouitiis, & adhuc minus exercitatis. Posthac, cum *Rodoiphum Agricola* legeritis, utilitatem magnam hinc peruenturam percipietis: & gratiam mihi seni (tunc mortuo) habebitis, quod rem tanti momenti intactam, silentio meo nō præterierim.

Atque hic mihi perpendat Logicæ studiosus inuenis, nō tam quærendā Argumentorū copiam, quàm habendum delectum. Idcirco media hæc, magis ponderabit, quam numerabit

bit. In bello videmus, non tam multitudine & numero, quàm robore & virtute vinci : similiter & nobis faciendum est. Vtique, *in multiloquio est peccatum & vanitas*, *Prou. 10.* ita in Argumentorū numerositate, potest esse imbecillitas. Ad Oratores vero Plebeios, quibus cū imperita multitudine negotium esse assolet, illud Poetæ pertinet,

Et quum non prosint singula, multa iuuant.

Definitio.

Definitio, est oratio, quæ id quod definitur explicat quid sit, *Arist. 1. Topic. cap. 3.* Et sanè, facilis non est differendi & disputandi ratio, nisi quid sit illud de quo instituitur tractatio, vel disputatio, probè cognouerimus, si rei natura illud patiat, *Arist. 8. Topic. cap. secundo,*

Cuicunque conuenit Definitio, & eidem Definitum : & à quocunque remouetur Definitio, ab eodem remouetur Definitum, vt est in Definitione hominis, satis manifestum, *Arist. 6. Topicor.*

Differentia, & Proprium.

Cuicunque conuenit Differentia vel Proprium, ei conuenit & res ipsa: vt, *Socrates est ratio*

rationalis, ergo Socrates est homo: & Christus est inuocādus, ergo Christus est Deus. Inuocatio etenim, propriè Deo conuenit, cuius nulla creatura (etiā si Dominus papa fuerit) particeps esse debet. Et, Christus nouit corda hominum, ergo Christus est Deus. *Opus ei nō erat, ut quis testimonium perhiberet, de homine: ipse enim sciebat quid esset in homine, Ioan. 2: 25.*

Negatiuè, hoc modo: hoc animal non est rationale, vel hoc animal non est latrabile, ergo hoc animal non est homo, vel hoc animal non est canis. Latrare vel latrabile, canibus est proprium, ut hinnitus equis, aut grunitus porcis.


Quæstio hinc oritur, non scholis nostris (quas ego veneror) sed risu vestro non indigna. Quare scilicet quosdam avaros, grunire dicimus, cum grunitus sit porcorum proprietas, aliis speciebus incommunicabilis. Nodum hūc Gordianum qui benè soluit, dignus est ex vino Falerno, strenue potare. Responde igitur, aliquos homines Pythagoricam Metamorphosin induisse, aut per Medæam veneficam, aut Circen, incantationibus & Philtris suis, in Porcos, esse Papisticè transubstantiatos.

Carmina vel calò, possunt deducere Lunam:

Carminibus Circe, socios mutauit Vliſſis,

*Virg, Ecl,
Fr. 8,*

*Frigidus in pratis cantando, rumpitur anguis:
Ducite ab urbe domū (mea carmina) ducite Dap*
Et illos esse grundibundos, ex proprietate specificæ naturæ. Tales sunt omnes Epicuræi, omnesque auari (quos Paulus, Idololâtras vocat, Ephes, 5, Gadarenis simillimi, sordidi & impuri homines.

Notandum porro est, veram et genuinam differentiam alicuius definitionis inuenire, rem esse maxime difficilem, propter intellectus nostri imbecillitatem, quoniam adhuc, *ex parte cognoscimus*. 1. Cor. 13, Sed pro veris differentiis sumuntur veris proximæ, Raræ sunt veræ differentiae et rari sunt boni proximi.  Omne nimium, vertitur in vitium, i vicinum proximum. Aut si vspiciâ reperiri possint boni, rariores eos inuenimus in *Ballua* nostra: diligenter tamen cum *Diogene* accensa lucerna Meridiana, in foro, & viaiū compitis pro illis inquisiimus.

Vnius rei vnicum proprium esse potest. Arist. 5 Top cap. secundo, Omniaque propria, significant aptitudinem, non actum. Quamuis enim homo non rideat actu, aut Canis actu non semper latrauerit, tamen homo est semper risibilis, et canis semper latrabilis, quem admodum de proprio prædicabili antea notatū fuerat: Similiter de *Differentia*, indicandum est, Quamuis enim homo non semper ratione

ne

ne utatur actu (ut in stolidis, et in prouidis hominibus sæpius apparet) homo tamen semper rationalis vel rationabilis dicendus est.

Coniugata.

Coniugata dicuntur, quæ sub vno iugo sunt deuincta, aut quæ ab vno verbo variè deducuntur, ut iustitia, iustus, iusta, iuste, Arist. 2 Topic cap 5, Horum remoto, vel tributo vno, tribuitur vel remouetur alterum: veluti si iusticia sit laudanda, etiam iustus, & res iusta, & quod iuste fit, laudandum est,

Sed hic duplici cautione vobis opus fuerit, propter quædam quæ vocis similitudine videntur *Coniugata*, sed re ipsa, *Côiugata Logica* non sunt, ut somnum & somnolentia, Scilicet, hic homo capit somnum: ergo est somnolentus, hoc non valet, quia somnus & somnolentia, non sunt *Coniugata Logica*, Secundo, cauendum, ne ex vna Actione inferatur Habitus: ut, Cambyfes iuste egit, dum iniustum. *Iudicem Sysamnem* puniuit, ergo simpliciter & absolute iustus fuit, non valet, Aut hoc, *Noe semel* ebrius fuit, ergo *Noe* fuit homo ebriosus, non valet, *Vna hirundo non facit ver, & vna Actio, non producit Habitum.*

Noui ego coniugatos aliquos, sub iugo durissimo, per hos multos annos vinctos & deuinctos

uinctos, & adhuc (proh dolor) relaxari non possunt. Hos homines bene à Coniugatis argumentari posse, vos mecum affirmabitis. Hic nodus Gordianus, facile dissolui non potest. Non licet vobis, cum proteruis Iudæis, vxores vestras ob causas leuissimas dimittere: *Ab initio non fuit sic*, Mat. 14. 8. Itaque, ferendum hoc vobis adhuc est, fratres: adhuc (inquam) hoc, quicquid est oneris, portare & subire debetis. Ex Zantippa vxore pessima & morosissima, didicit prudens Socrates, patientiam.

Nobile vincendi, genus est patientia: Vincit,

Qui patitur: Si vis vincere, disce pati,

Hanc nobilem virtutem, & vos queso addiscite, si tamen poteritis. Aliud consilium adhuc non habeo. Vxorum morositas & proteruia, adhuc toleranda est, donec Deus qui coniunxit vos, separet. *Tunc laqueus contritus est, & nos liberati sumus.* psal. 123.

Ab his veris & logicis Coniugatis, argumenta negantia ducta, necessaria sunt & firma: ut non facit iustè, ergo non est iustus. Papa, Monarcha, & princeps huius Mundi, Ioan. 14. cum Anglia Regnum, Hispanorum regi Philippo secundo dedit, iniustè fecit, ergo Papa, iniustus homo est. Iustitia etenim, suum cuique tribuit, quod dominus Deus noster Papa non facit. Cum Christianis principibus mitius agat, aut breui

breui forsan corruet suum. Babylon enim, ad
nubes vsque exaltata diu, nunc vacillans, de-
iici debet, diu stare non potest. Zelus Domini
exercituum, suo tempore, hoc perficiet: Os e-
nim Iehouæ loquutum est.

Genus, & Species.

A genere Indefinito & indistincto, ad v-
nam speciem, non sequitur argumentum: vt,
animal est, ergo homo est. Negato genere v-
niuerso, negantur omnes eius species: vt, non
est arbor, ergo non est Platanus, nec Quercus
aut parula Fagus. *Et, non iuit seruus tuus quo-*
quàm, 2. Reg. 5, ergo non iuit post Naaman Sy-
rum, ad recipienda munera. Sed mentitur Gi-
ezi, itaque grauitè punitus fuit. Caueat ergo
omnis mentiens, seu seriò illud faciet, seu si-
mulatè. Illa enim Hieronymi distinctio, in *lo-*
cosum, Officiosum, & perniciosum (quasi illa
Duo priora essent licita) neque mihi satisfaci-
unt, neque *S. Augustino*, ante me, *Os enim quod*
mentitur, occidit animã, Sapient. 1. Argumen-
tum tamen sequitur ab hoc loco, à Genere.
Si enim Giezi, nusquam à facie Elizei Domi-
ni sui proficisceretur, tunc neque *Naamanum*
in via pro munere sequutus est.

Genere vniuerso, cum signo vniuersali po-
sito, ponuntur omnes eius species: vt, omne a-

Hi

nimal

nimal fuit in *Arca Noe*, ergo *Elephantes*, *Leones*, *Vrsi*, *Dracones*, *Pardi*, & reliqua, *Gen* 6. Ab hac generalitate, nullum animal excipiendum est.

A specie ad genus, firma Argumenta sumuntur aientia, vt *Cicero* Consul est, ergo *Cicero* Magistratus est. Negata vna solummodo specie, non negantur omnes, vt non est prudens, ergo non est fortis, non sequitur.

Similis argumentandi ratio est, ab Indiuiduis ad Speciem, seu affirmatiuè, seu negatiuè: vt, *Virgilius* est, ergo homo est. Sublato vno Indiuiduo, non tollitur species: vt non est *Virgilius*, ergo non est homo, non valet. Pro hoc ratiocinandi genere, à Particulari ad Commune, videte quæso, *Arist. 2. lib. Topicor.*

Totum & Partes.

Toto posito, partes principales sequuntur necessario: vt, *Dialecticus* est, etgo non ignorat Inueniendi & Iudicandi rationem. Homo est, ergo habet cor, & caput. quæ hominis sunt partes principales, *Arist. 6 lib. Topic. cap. 6.*

Sublatis partibus præcipuis, totum tollitur: vt *Iauellus* (scilicet, *Chrysostomus ille Iauellus, os aureum*) *Dorbellus*, *Petrus Hispanus*, & similes, Eloquutionis imperiti sunt, ergo tales non sunt

sunt Rhetores.

Positis omnibus partibus, totum infertur necessario, vt Aristotel. est Philosophiæ peritus, itaque Logicen, Physicen, & Ethicen non ignorauit.

Partes rei	Constitu endæ	Genus & Differentia. Materia, & Forma.
Partes rei	Iam con stitute.	Similares, seu Homogeneæ, quarum idem est nomen totius et partis : vt quæuis pars aquæ, aqua est, & quæuis pars carnis, caro est.
		Dissimilares, seu Heterogeneæ, quarum idem non est nomen to- tius & partis: vt, vnaqueque pars manus aut arboris, nõ est manus, aut arbor.

*Loci circa Substantiam, vt Adiacentia,
Actus, Subiectum.*

Positis Actibus natiuis, debet præsupponi Subiectum: nam sine Subiecto, ea existere non possunt. Spiritum ducere & viuere, sunt anima-
lis actus natiui, itaque sic arguere poterimus,
Illud animal spirat, ergo illud animal vi-
uit.

Sublato Subiecto, tolluntur *Adiacentia, &
Actus*: vt, animus non est, ergo nec recordatio
est, quia recordatio semper debet animo in-
esse. Et, non sunt bipedales homunciones, qui
Arietibus insident, aut qui vimine & iunco
H 2 pugnare

pugnāt cū gruibus (*Pygmai*) quia nulli omnino tales sunt. Sicque, de ingeniosi *Thoma Mori* putatiua & imaginaria *Vtopia*, & *Purgatorio* illo tremendo *Papyraceo Papiſtico*, indicandum vobis est.

Hiisque adiungi poſſunt, *Platonis Reſpub. lica*, *Ariſtotelis felicitas*, *Ciceronis Orator*, & *Zenophontis Princeps*, ſeu *Cyropadeia* : & ſi vultis, *Balthaſaris Caſtilionis Auſicus* : omnium, quæ vnquam legere poteritis (huius generis) exempla ſplendidiffima. Namque, *Non Entis, nulla ſunt Qualitates, Attributiona nulla*. Poſito Subiecto, ponuntur *Adiacentia* natia: vt, ignis eſt, ergo leuis & calidus. Et, ſi aurum in burſa veſtra habetis (quod dubito, non eſt enim *Articulus fidei*) graue ſit neceſſe eſt. *Grauitas* enim, auri *Adiacens* eſt natia. Sed multi ſunt, qui de auro ſcribunt & loquuntur ſæpius, cū in *Marſupio* & *Crumena* ſua, cum *Petro*, in *Actis Apoſtolicis*, cap. 3, *nec aurum nec argentum* habeant, in quo *Prædicamento*, ego ſum.

Loci Externi.

Externorum locorum, quatuor ſunt genera, *Cognata*, *Applicita*, *Accidentia*, & *Repugnancia* : *Cognata*, duplicia ſunt, *Cauſæ*, & *Euenta*.

Marc-

Cau- sarū 4. ge- nera	{ Materialis, ex qua.	
	{ Formalis, per quam	{ Accidental. Essentialis.
	{ Efficiens, à qua,	{ Prima & infinita, Naturalis, vt vt Deus. Lapidis corſū Secunda, ab illa Violenta, vt prima pendens lapis surſum
{ Finalis, propter quam.		

Materia est, ex qua res fit, seu ea fit naturalis, seu artificiosa : Qua, posita, consequi potest Effectus: vt, sunt vites, ergo potest esse vinum, vites enim materia vini sunt.

Negata Materia, negantur et Effectus: vt non sunt vites, vinum igitur fieri non potest. Et, non sunt arbores, itaque poma expectare non possumus. *Stultus Agricola*, lignis carens, Pomarium suum succidit, pomis indignus, qui pomorum materiā eradicauit. Nam, sine Materia res confici non potest.

Forma, dat Esse rei: vel, Forma est, per quam vnaquæque res talis est, & à cæteris distat, quæ præcipua rei pars est, & est vel Accidental, vel Essentialis.

Essen- tialis forma	{ Naturalis, vt forma hominis, rationale esse. Huc veræ differentię referuntur.	
	{ Artificialis vt forma	{ Mensæ, Scamni, Hemicycli, Solii Regalis, seu Salamonis seu alterius cuiuscunque.
		{ Edificii, scilicet { Domus. Theatri. Nauis.

Posita forma, seu naturali, seu artificiosa, ponitur res ipsa, & negata forma, negatur res ipsa,

Posita Efficiente Causa naturali, non impeditur necessario sequitur Effectus: vt, bibit ille Cicutam venenosam, ergo certè breui morietur, scilicet, nisi tempestiuè illi veneno restiteris. Ignis est, ergo non potest non vrere, scilicet non impeditus, & habens materiam combustibilem, Sidrach, Misach, & Abednago, in flamma non sunt vsti, *et odor ignis non transiit per eos, Dan. 3*, Ignis Effectus, fuit à Domino miraculosè repressus & impeditus.

Est alius ignis, non tamen Purgatorius, neque Masculini, sed Fæminini generis (si quid hic mihi vellem, diuinare poteritis) pessimè vrens: de quo Poeta, *Accede ad ignem (hanc) iam calefcies plus satis*. Vret enim periculosè, in ossa penetrabit, nisi per Dei gratiam magnam adiuuantem & reprimentem, impeditus fuerit. Itaque, caute (*boni Iuuenes*) & rursus dico, vt non decipiamini, caute obsecro,

Quid. Elog. *Verba puellarum, folijs leniora caducis.*
lib. 3.

Ouidius Naso, amoris artifex hoc dixit, itaque illi (*in sua arte*) credendum est.

Sublata causa Efficiente, necessario tollitur Effectus, vt, sol in nostro Horizonte et Hemispherio, non est ortus, ergo nec Dies est.

Finis

Finis duplex est: summus seu vltimus, & destinatus ad finem, Summus est, qui propter se, & non propter aliud expeti, & à nobis desiderari debet, vt felicitatis & beatæ vitæ in sæculo futuro, cum Deo, Angelis bonis, & omnibus Dei Sanctis, perpetua & æterna fructio. Hocque ego Argallus (qui hæc scribo) expecto & desidero, & Ioannes cum Ioanne dico, *Veni Domine Iesu, veni suavis & dulcis Samaritane, præpara me, præpara cor meum, vt mundum hunc malum & meretricium relinquam, & libenter deferam, & sic veniam ad te.* Et vos, dum tempus habetis, hoc similiter mecum expectare, & anxie solliciteque desiderare debetis, si sapere velitis, etiam si inuenies fitis, *Mementote Creatoris tui, in diebus iuuentutis tue, Ecclesiastes 12.* Moriuntur quotidie senes, moriuntur & Iuvenes: vbi, aut quandò, nescimus.

Destinatus ad finem, vt Calx, lapides, cæmentum, & lignum, in acervum colliguntur & parantur, Templi, parietis, vel domus causa. Cuius rei Finis, vel bonus vel malus est, ipsa quoque quæ ad ea tendunt, sunt bona vel mala: vt, pax bona, ergo bellum gerere propter pacem, bonum est. Reip. & Ecclesiæ causa hoc facere, optimum & præstantissimum est: non necessarium mouere, mouentibus ipsis, sæpe periculosum.

Bellum, in timidas mulieres (quamvis morosas) mouere, quæ præter Colum & linguas suas nihil habeant, quò se ipsas tueantur & defendant, virile & honorificum est, aut ego dissimulo, nostrates etenim, si rem bene confiderare velitis, bellicosæ illæ veteres Amazones non sunt,

*Femina sum, & virgo, natura mitis & annis,
Non faciunt molles, ad fera bella, manus.*

*Quid mihi cum ferro, quid bellica tela puella,
Aptior est digitis, lana, colusq; meis.*

Nouimus tamen aliquos, qui cum mulieribus fortiter sanè & animosè bellum gerebant : Scilicet, in pace leones, in praelio ceruos, ut habet vetus pater Tertullianus, de Corona Militis. Filys Ephraim nō dissimiles, habentes arcus & arma, fugerunt tamen in die belli, Psal. 78. Profectò, strenui & animosi milites. Sed hoc seu bellum, seu Duellum, malè procedere solet. Contigit enim illis nonnunquam, quod *Herculi ab Omphalo*, diminutū cum Sandalio caput, aut colo, sandalio deteriori. Ego verò, cum mea importuna Iunone, hoc modo, lites & iurgia compescere neque soleo, neque audeo. Itaque, alia quærenda via est. Audite interim doctissimum Varronem, sit illi, ad hanc questionem dirimendam inter vos, arbiter honorarius, vos obsecro *Vitium uxoris, aut tollendum est, aut ferendum. Qui tollit vitium, uxorem*

rem commodiorem præstat: qui fert, seipsum meliorem facit, *Aul. Gell. noct. Atticar. lib. primo.* Posterioris huius consilii partem ego sequor, & vt *Iffachar, asinus fortis, Clitellas* fero, pati- *Gen. 49.* or & perpetior omnia: postque aliquot annos, in hac patientiæ Schola educatus, me profecisse & agnosco, & gaudeo. Nunc enim, non facile quispiam me irritare, aut bilem mouere poterit. Nam, si *Afrania* nostra sit nimis clamorosa, in interius cubiculum (quasi in *Asylum*) me recipio, & libros paucos (quos habeo) consulo aut ædes meas relinquo, & viriliter me in fugam conuerto, donec *Nimbus* præteriit, & aërem sereniorē & tranquilliorē perspexero.

Applicita.

Applicita, seu *Subiecti Circumstantiæ*, sequuntur: quorum duo sunt genera, *Locus & Tempus.* *Circumstantia Crucifixi Christi*, respectu loci, fuit extra Ciuitatem Hierusalem, locus *Golgotha*. *Circumstantia Institutionis Cene Dominice*, respectu temporis, fuit dies Iouis ante passionem proximus, tempus scilicet nocturnum, inter duas vespervas, quod nos Anglicè vocamus (*Twilight*) secundum legem Paschatis, a Deo institutam, *Exod. 12.*

Ab hac loci *Circumstantia*, sic arguere poteritis

teritis : nullum corpus esse potest in duobus locis simul, ergo humanum Christi corpus, non potest esse in cælo, & in pixide Papistico simul.



Hic, mihi in mentem venit, Papistarum erga vermes & musculos, egregia liberalitas, quæ ne inedia hæ bestiolarum perirent, suos pixides sacros intrare permittunt, ut ex pane illo reservato (quem corpus Christi appellant) pulcrè saginenrur. In christi corpus miserè arrosus dentibus, crudeles: in mures & vermiculos, liberales & plus quàm munifici homines. Sed, dicite mihi (amabo) vermibus, & muribus quare illud expositis, qua Scriptura, quo exemplo, aueo à vobis cognoscere. Quare in crastinum reservatis? *Dominus, panem quem discipulis dedit, dicebat eis, accipite, manducate, non distulit, neque servare iussit in crastinum, ut habet vetus pater Origen. in cap. Levitici septimum* De patribus gloriari soletis, quare igitur cum Patribus, melius non consentitis?

Ab hac loci circumstantia, habemus aliquid ex Romanensium Gratiano (aut si mauultis, *Crassiano* rapsodo) hiis addere, ex Augustino patre, non male (ut contigit) transcriptum. *Corpus inquit, in quo resurrexit Christus, in uno loco esse oportet, de Consecrat. Dist. 2. Cum Augustino, & nobis Protestantibus, confetite videtur, Christi humanum corpus, in pluribus locis*

locis, i. in *Cælo* & in *terra*, simul inueniri non oportere.

A tempore, seu temporis Circumstantia, hoc modo, si placet audire. Et factum est omne tempus, quod vixit *Adam*, anni *nongenti & triginta*, & mortuus est, Gen. 5. Ergo *Adam*, post Diluuium nō vixerat, Nam ab *Adamo* ad Diluuium, ab ætatibus Patriarcharum, ex Gen. 5 supputantur anni, 1656.

Vera hæc temporis Cronologia, ad Romanensium nostrorum fraude & imposturas detegendas, in malè citandis Apocryphis patrum scriptis, valdè utilis est, & percommoda. Allegant enim *Chrysostomi Liturgiam*, pro Missa sua Priuata, vbi nec (*Missà*) nec (*Priuata*) inueniri potest. Precatur enim ille supposititijs, pro quodam *Nicholao Papa* qui post verum & genuinum *Chrysostomum*, quingenta ferè annos vixerat: eorum vanitas, ex hoc loco à tempore, benè dilui & confutari potest.

Testatur porrò. Romanensium liber Portiforius, *S. Laurentium*, per Christi ligneam crucem, quosdam ægrotos, miraculosè curasse. Sed, cum hac fabula, non concordat tempus. Hoc enim non potuisse fieri, ab hoc loco à Tēpore, probamus. Crux enim Christi lignea ab *Helena Imperatrice* inuenta dicitur, annos quadraginta, post huius *Laurentii* mortem, Oportet mendacem esse memorem.

Hos

Hos duos locos posteriores, Oratores in genere Iudiciali, diligenter obseruare solent. Itaque, quo melius & expeditius cognoscatis, quomodo ex his Argumenta desumpta, bonam consequutionem habeant, *M. Cicero, Aristoteles ad Theodecten, & Fab. Quintilianus* (quum otium dabitur) consulendi vobis sunt.

Accidentia quatuor.	{	Contingentia.	{	Maiores.
		Nomen Rei.		Minora.
		Similia.		Paria.
		{	Comparata	

Omittimus hic, de Contingentibus aliquid dicere, quia hinc argumenta deducta, præsumunt & non probant, friuolæ certè nulliusque ponderis, si repugnantem aliquem, in vestram sententiâ pertrahere volueritis. Porro, de illis & illorum similibus, inter locos Personarum satis antea explicatum à nobis fuit: Itaque nunc prætereunda sunt, neque ut *Crambe bis cocta*, coram vobis, delicatulis iuuenibus, rursus apponenda.

Quod verò ad *Nomen Rei*, seu *Nominis Ety-
mologiam* attinet, dico ab hoc loco, nonnunquam satis bona & firma Argumenta produci posse, modò naturaliter, dextrè, & ingeniosè introducta: ut hoc *Plutarchi*, *Cæna dicitur à Græco nomine*. Cænare itaque solus, non est Cænare

nare sed edere. Vnde doctissimus Plutarchus, lib. 7. Sympos. Romanos sæpius in ore habuisse dictum festiui hominis, *qui quum solus cenasset, diceret se hodiè non cenasse, sed tantum edisse.*

Porro, & hoc sequens à Nomine Rei, benè sequitur: Testamentum est, quasi testatio mentis. Itaque, si Testator mentem suam non testetur, Testamentum eius non est dicendum. Sic fides dicitur, quia fit quod dictum est, ut est apud M. Ciceronem, aliter fides non est dicenda.

Interim notate (inuenes) omnium vocum Etymologias non esse quærendas, & inuestigandas vobis. Sunt enim multæ radices, primitiæ & primogeniæ. Itaque, vetus pater Isidorus Hispalensis dicit, omnia nomina secundum naturam non esse imposita, sed multa ad placitum, sicut seruis nostris nomina dare solemus: & hinc esse, quod omnium Etymologiæ non reperiantur. Omnium doctissimus Etymologus Isidorus pater, hoc dixit, itaque eius opinioni acquiescendum, ego existimo.

Similitudo sequitur, quæ rem obscuram explanat & dilucidam facit: sed probandi, ligandi, & conuincendi, perexiguam vim habet. Præterea, omnis similitudo, in his solummodo valet, in quibus comparatur, illique iniuriam feceris

feceris, si quemadmodum cum Herculis columnis fecit Hispanus (*Plus ultra*) eam extenderis, & ambitiosè dilataueris. Omnis enim Similitudo claudicat, Vulcano non dissimilis, quem altero pede claudicasse, veteres scribunt. Atque notate (si nota dignum fuerit) pulcher-
 rumam & formosissimam Venerem, naturæ æmulam, huic atro carbonario, & claudicanti nebuloni, fabro ferrario, olim enuptam fuisse. Ego, si Venus essem, profecto Vulcanum non mihi eligerem socium & Maritum meum: quid & vobis faciendum suaderem, si emeriti militis consilio acquiescere volueritis. Quid verò illam permouerit, tali marito conglutinari, non hic Topicè, inter locos Topicos disputatum volo. Neque ego vos vellem (inuenes) in tam occultas & abditas rerum naturæ causas penetrare, & curiosius introspicere. Alberto, hoc discutiendum relinquamus, vos de his rebus iudicare, aut non potestis, aut adhuc nō debetis.

Similitudo hæc, circa quam nunc versamur, ad Populare dicendi genus, est omnium aliorum locorum Topicorum, accommodatissimum Organon, mihi credite. Itaq, *Mediolanensis Ambros. Officior. 3. dicit, has similitudines, per se vim veritatis non habere: tamen rationem certam, ut per eas, veritas illustrari possit, continere.* Et Rodolphus Agricola, primo de Inuentio.

Inuentione, cap. 26, hæc habet verba, lectione vestra non indigna : *Nullus (inquit) locus accommodatior est, ad eum qui sponte sequitur docendum, quam Similitudinis. Aperit enim rem si rectè adhibeatur, & quandam eius imaginem subiicit animo, ut cum assentiendi necessitatem non adferat, afferat tamē tacitum dissentiendi pudorem.*

Similitudo, seu Comparatio Allegorica & Symbolica, in arguendo vim non habet per se, nisi quatenus applicationem & probationem ab aliis Topicis habeat: sed præcipuè, nisi ex sacris literis (à sacræ Paginæ studiosis) comprobari possit. Itaque, non malè dicitur à *Thoma Aquinate*, *Theologiam Symbolicam, non esse argumentatinam: hocque ex Patre Augustino mutuatus est, Epistola 48, contra Vincentium Donatistam.* Cum igitur Romanenses, argumenta sua Tropologica vrgebunt (quòd sæpius facere solent, ex illorum *B. Thoma* regerere poteritis, tales Argumentationes esse inualidas. Quod etiam, pater *Irenæus* confirmat: dicit enim, super *Parabolas & Allegorias edificare, esse edificare super Arenas.* Quocirca, stolidas & non duraturas Papistarum ædificationes, clarè hic cernitis. Hoc tamen sequens, infirmari non potest, quia ex *Paulo* desumptum est: scilicet, non esse obligandum os boni trituranti, ergo verbi Dei Ministris, non est

est neganda vite sustentatio. Paulus enim hanc similitudinem & allegat, & approbat, 1. Cor. 10.

Sequuntur Comparata: comparatio duplex, vtrum probabilius, & vtrum melius. Probabilius, tribus modis discerni solet, *A maiori, à Minori, & à Pari.* *A Maiori*, negatiua Argumenta ducuntur, vt Cyclopes Deum non curant, multo minùs, ii, mortales homines curare volunt, aut illos æstimare. Horum securitatem plus quam belluinam sic describit poeta Euripides.

Cyclops ap.
Eur.

*Non vlla Numina expauesco Calitum,
Sed victimas uni Deorum maximo
Ventri offero, Deos ignoro ceteros.*

Et hoc sequens, contra operum iustificacionem, si placet legere. Qui per legem iustificari volunt, à gratia exciderunt, Galat. 3. 4. Ergo multo magis, qui per opera sua iustificari volunt, à Gratia Dei sunt alieni, quod tamen Romanenses docent, Agamemnon, à Diis se exaudiri putat, propter suas Hecatombas, & Romanenses propter merita.

Comparatio à Minori: à quo Affirmatiua Argumenta ducuntur: vt, de verbo ocioso reddenda ratio est, Mat. 12. ergo, de quocunque malè facto. Papistarum aqua benedicta, quamuis valida sit & operosa, tamen vñialia hæc peccata abstergere non potest. Tertia probabilitatis

tatis comparatio ducitur à Pari, à quo & Affirmatiua argumēta extrahuntur, & negatiua: vt, vxor bona est à Domino, ergo maritus bonus, ab eodem fonte. Et filiæ, non debent matrimonium contrahere, parentibus infciis, ergo nec filii hoc facere præsumant.

Comparatio, vtrum melius, sequitur: cuius plura sunt genera, sed hæc pauca sequentia, præ cæteris, à vobis præcipuè obseruanda existimo.

Diuturniora, breuioribus meliora: voluptas scilicet carnalis & belluina, brevis est, & breui euanida. virtus verò operosa, gloriosa, firma, stabilis & diuturna. *Altum quiddam est virtus, excelsum, Regale, inuictum, infatigabile: Voluptas, humile, seruale, imbecillum, caducum, cuius statio ac domicilium fornices & popina sunt, vt habet doctissimus Seneca, lib. de vita Beata:* Virtus itaque melior tali voluptate, & multo præstantior est. Sic, charitas melior est fide: ea enim duratura est in meliori vita, post hanc fluidam, & intra paucos annos certò perituram. Fides verò, tunc finem habet, & periodum suam confecit.

Quæ propter se expetuntur, iis quæ propter aliud. Vita itaque nostra (quamuis caduca) cibo est præstantior. Edimus enim vt viuamus non viuimus vt edamus.

Quæ semper commoda sunt, iis sunt antep^{ponenda}

ponenda: quæ hoc vel illo tempore commoda sunt. Sic philosophia, quia semper utilis est, præferenda est Medicinæ, quæ præcipuè utilis est, tempore morborum, & aduetiæ valetudinis.

4. Fines iis, quæ ad finem pertinent † itaque pax bello præstantior est. Bellum enim gerere solemus, ut in pace vitam degamus. Possibilia, impossibilibus: sic, iusticia fidei, melior est iusticia legis, quia hæc (*nobis Ada filijs*) seruatu est impossibilis. Non enim poteritis, illum hominem mihi ex S. literis denominare, qui mandata Dei omnia & singula, perfectè seruauit. Nulla caro hoc facere potuit, aut vnquam fecit, præter Christum Iesum, qui pro peccatis nostris mortuus fuit, & resurrexit tertia die, pro iustificatione nostra, Rom. 4.

6. Laboriosa, procliuibus: Quæ enim difficilia pulcra: pulcra certè si bona. Nisi illum Romanorum Imperator. uelimus laudibus extollere, qui arte sua nescio quæ, res minutissimas, per acus foramen, quam citissimè transmittere solitus est. Laboriosum opus, inutile, ocioq; & maiestate Regali, indignum.


7. Propria, communibus, ut Aristoteli placet, Topic. 3. cap, 11. Id est, propria mea, mihi & vsui meo, meliora sunt & commodiora, quàm communia aliorum, quorumcunque.

Bonum, quò latius diffunditur, eò melius:

ut

vt Munificencia est melior communi & vulgari hominum liberalitate, quia ad plures homines sese dilatat & extendit. *vid. Arist. 3. Topic.*

Repugnantia.



Contraria.

Contraria, sunt duæ qualitates, sese mutuo expellentes: suntque duplicia, mediata seu interiecta, & immediata nullum medium admittentia, Contrariorum immediatorum, vno sublato, alterum necessario ponitur, vt Lex & Euangelium, Caro & Spiritus. *Caro enim aduersus spiritum concupiscit, & spiritus aduersus carnem. Hæc enim sibi inuicem aduersantur, Galat. 5. Aduersa (scilicet) veriùs, quam propriè dicta Contraria, si propriè loqui velimus. Huius generis sunt, Deus & Mammon: vt, non potestis Deo seruire & Mammona, Mat*

6. Honestum & turpe, bellum & pax : Deus optimus, & Baal pessimus. *Vsq̃ue quò claudicatis in duas partes? Si Dominus est Deus, sequimini eum, sin autem Baal, sequimini eum.* 1. Reg 18. Sic itaque argumentari poteritis : Dominus est Deus, ergo Baal non est Deus, Dominus est Deus, ergo Papa non est Deus. Aut si Papa Deus sit, terrenus & mundanus est Deus non Cælestis. Qui, si aliquibus antecessoribus suis similis sit (quos ego nominare possum) profecto aut Plutus est, aut Pluto est, id est, profecto Diabolus incarnatus est.

Contrariorum mediatorum, vno sublato, non remouetur alterum, vt calor & frigus, quæ inter se (teporem) medium admittunt. Album & nigrum, inter quæ, color fuscus, medius est; sanitasque & morbus. Inter quæ duo, ego (valitudinarios) dicerem. Quamuis medici (vt ego audiui) sanitatem & morbum, contraria sine medio, scribant. Omnes enim homines statuunt esse, aut valentes, aut morbidos. Contrariorum, contraria est argumentandi ratio, quandò duo contraria prædicata, duobus contrariis subiectis opponuntur; Vt, virtus est expetenda, ergo vitium est fugiendum. Et, contrariorum eadem est argumentandi ratio, quandò prædicatum, duobus contrariis subiectis est commune: vt, iusticia est habitus, ergo, & iniusticia, habitus est.

Contradictoria.

Contradictoria, seu Contradicentia, sunt affirmatio & negatio eiusdem rei, de eodem subiecto, vt sedet, & non sedet: sapientia, & non sapientia. Quorum vnum semper de omnibus rebus prædicatur, vt omnis homo sedet, vel non sedet: omnis homo sapiens est, vel nō sapiens, *nam in Contradicentibus, non est medium.*

Contradicentia ista, hanc sortiuntur regulā: Posito vno, tollitur alterum, acerrimè enim inter se dimicant, & quasi digladiantur, nec vnquam simul vera & falsa esse possunt. Vt, *hic, saluti æternæ prouidetur, vt bonus Dei Martyr Cyprianus loquitur.* Hic, saluti æternæ non prouidetur, *sed in (Pick purse) Purgatorio,* vt Dominus noster Papa loquitur. Ambo hæc vera esse non possunt, quia contradictoria sūt. Papa contradicit Cypriano, nec mirum: contradicit enim Imperatori, Domino suo: contradicit Christo redemptori nostro, cuius tamen se Vicarium esse, superbè mentitur, Rector Haleswoorthiæ (apud Suffolcienses) cum adhuc sim, malè me haberem, si talem Vicarium haberem, Quomodo enim *grande illud Cete olim deuorauit Ionam,* sic meus Vicarius deuoraret, & deglutiret me.

Relata.

Relatiuè Oppositorum, vtrunque est affirmatiuum: in quo, à Contradictoriis & Priuantibus differunt. Nam horum alterum semper est negatiuum: Relata nostra, in Prædicamento Relationis sunt, quemadmodum (*Esse*) vnius dependet ab (*Esse*) alterius. Hic autem, inter Opposita collocantur, vt vnum eorum opponitur alteri, vt Pater filio, & Dominus seruo: quod non est inconueniens. In arguendo, sequuntur affirmatiuè & negatiuè: affirmatiuè, vt rex est, ergo Regnum habet. Et, Dyonisius Syracusanus, rex non est, quia Regnum non habet. Hic Rex (quondam) propter crudelitatem, regno Siciliae expulsi, puerorum institutor placuit pulchrè inaugurari, vt quod non auderet in subditos, illud in misellos pueros, nouo suo virgarum Sceptro, exercere possit. Vereor, ne illorum posteriora miserè excoararit, nouus hic Orbilius plagosus, rex (quondam) rex Dyonisius.

Priuatiuè Opposita.

Priuantium Oppositorum, hæ tres regulæ obseruari possunt commodissimè. Primò, in gradibus eminentioribus, vno tempore, in eodem subiecto, esse non possunt, Vndè notetur

tur. dari posse gradus intermedios, qui simul inesse possunt: vt, crepusculum medium est, inter densas tenebras, & altam lucem:

Secundò, si vnum Priuantium sit bonum & commodum, alterum est noxium & malum: vt, si visus sit bonum, cæcitas est malum, Verum hoc est, in terreno hoc corpore nostro nequam, peccatis obnoxio. Sed in animo (si Theologicè loqui velimus) hoc argumentandi genus sæpiùs fallit. Morbus enim, cæcitas, exilium, vulnera, cæteriquè casus aduersi, quoniam erudiunt & instruunt nos, meliora sunt, vtiliora, & magis salutaria, quàm ea quæ vocantur prospera: secundum illud *Salamonis, Lior vulneris absterget mala, & plaga in secretioribus ventris, Prov. 20.* Et illud *Dauidis patris sui, Bonum est quod humiliasti me, vt inde discam mandata tua, Psal. 119.* Calamitas, virtutis occasio est, vt habet *Seneca*, vir doctissimus: & *Pathemata sunt Mathemata.*

Tertio, à totali Priuatione ad Habitum, non datur regressus, viz. ordinarius. Nam de regressu extraordinario & miraculoso, nemo Orthodoxus dubitare debet. Multi enim cæci miraculosè visum receperunt, & mortui, vitam.

Sunt tamen quædam Priuationes, à quibus ad Habitum, ordinarius & facilis regressus dari potest, vt a tenebris nocturnis ad lucem,

& à somno ad vigiliam & excubias. Itaq; , hæc tertia regula, quamuis bona & commoda, non est adeo vniuersalis & catholica, quin aliquã exceptionem patiatur.

Diuerſa, diſfe-	}	Numero.
rentia, ſeu		Specie.
Diſparata.		Genere.
		Prædicamentis.

Omnia Indiuidua, ſeu eiufdem ſpeciei, vt Iacob & Eſau: ſeu alterius, vt Eſau & Bucephalus: Irus Mendicus, & *Bucke* equus meus (quõdam) numero differunt. Sed hei mihi, *Bucke* equus, quem ego tantopere amaui, iam dereliquit me, & ego illum: dolens & mærens hæc repeto, Meum bonum & ingenioſum equum *Bucke* , omnium quos vnquam habui uel habiturus ſum, ambulantem & pedes mouentem ſuauiſſimè) me ſemper melius , quàm olim Dominum ſuum Actæonem agnoſcentem, ingrati & deuorantes canes) obefulum, colore glaucū, pulchellum ſanè, & feroculum, quia pecunias non habui (proh dolor doloris) vendere & alienare coactus ſum. Et alterum nemo dabit, emere verò alium non poſſum. *Argallus igitur ſenex*, iam eques ſine equo, prout poteſt pedetentim, pedibus ægris, Vulcano claudicanti non diſſimilis, laborioſè incedit, aliquantulum ſe mouens, promouens nihil: *Det meliora Deus.*

Specie

Specie differunt, eiusdem generis diuersæ species, vt homo & brutum.

Genere differunt, superioris generis diuersa genera, vt animatum & inanimatum, respectu corporis.


Horum trium Disparatorum (quasi infesti essent inimici) alterum de altero nunquam prædicari potest verè: & vnum eorum, à subiecto cui inest, semper expellit, & inciuiliter extrudit alterum, nisi in *Tropicis*, & *figuratis loquutionibus*. Vt, *Herodes est vulpes*, *Ioannes est Elyas*, *Panis est corpus christi*. Disparata hæc sūt, & tamen alterum de altero prædicatur, quia loquutio est Tropica & Figurata. Vtcunque enim Romanenses nostri, Capernaitis non dissimiles, hæc Christi verba, secundum literam (quæ occidit) intelligi volunt, Tertullianus & Augustinus patres, nobiscum, Figuram & Tropum agnoscunt. *Hoc est corpus meum*, i. *figura corporis & sanguinis Christi*, Augustin. in psal. 3, & Tertullianus, contra Marcionem, lib quarto, circa finem.

Sed accipitote (si placet) exemplum facilius, quia est domesticum, & apud nos domesticum. Inter vos, vnus est Melancholicus, eum figuratè, *Saturnum* appellatis. Est alius comptus & nitidus, eum *Paridem*, aut *Venerem* forsitan nuncupatis. Est tertius, robustus & strenuus Athleta, eum *Martem* dicitis: hæc singula
Disparata

Disparata sunt, tamen vnum eorum (vt videtis) prædicatur de altero, quia loquutio est Tropica & Figurata.

Diuerſa Prædicamentis, ſunt diuerſa genera, quæ ex nouem poſterioribus Prædicamentis deſumpta ſunt: quæ cum antediſtis Diſparatis, communem regulam fortiuntur, vt alterum eorum hoſtiliter expellat alterum, neque vnum eorum vllomodo poſſit de altero dici & prædicari.

Subſtantia verò, vt Rex & Monarcha Mundi, à nouem reliquis excipitur: quæ, cum ſit ſubiectum & baſis cæterarum Categoriarum, reliquæ omnes prædicari de illa debent, neceſſariò. Vt, ille vel ille homo, eſt pater, eſt doctus, latus, craſſus, longus, breuis, in Licæo vel foro deambulans, togatus, palliatus, ocreatus: heſterna enim die, hoc pacto amiſtum vidi-
mus.

 Sed, dic mihi ſodes (amabo) quum pater tuus, non ſit Accidens ſed Subſtantia, qualis Subſtantia ſit appellanda, aueo ex te cognoscere Ego pro te (barbatule) per Prædicamenta illum delineabo: filius enim eius (cuius nomen geris) ſi reuera fueris, ſilere & tacere debes. Dico igitur, qualitates eius quicumque velit eſſe notas, Thraſo glorioſus eſt, & verbosus nebulo crine ruber, niger ore, vt in illo Zoilum maledicum poſſis agnoſcere, egregieque pinguis.
In


In illo namque, omnia egregia sunt.

gresie

Epicuri de grege, porcus.

Ieiunium contemnit, quia superstitiosum est.
 In Templo, flexis genibus non orat, quia superstitiosum est. Pauperibus non distribuit, quia superstitiosum est. Maneſte (inuenes) per reliqua Prædicamenta, quaſi per Purgatorium (velit nolit) eum tranſire faciemus. Quantus igitur eſt? Longus eſt, curuus, incuruus, & (*scuruie*) impetigoſus, In Relatis etiam locum habet: Iniuriam illi non faciemus, habeat obſecro. Vxor enim illi eſt, qualiſcunque, virago proſecto, vix mulier, Androgyna, vt ego ſuſpicor, garrula, rubicunda, obæſula, & (Deus noſcit) parum pudica, niſi paſſeres, aut hircos, pudicos eſſe dixeritis. Quod tota vicinia vbi habitat, omneſque proximi, de ea veriſſimè atteſtari poſſunt. Quid agit? Nebulonem. Quid patitur? *Legem Talionis & Retalionis* æquiſſimam: mæchos facit, & ipſe grandis mæchus eſt. In cuius ſcilicet Horoſcopo & Aſcendente *Mars & Venus* conuenerunt in Capricorno. Patitur opprobria, quia ipſe maledicus eſt, quandoque verbera. Habitus & amiſtus qualis? Talis qualis, ſcilicet malè & fordidè tunicatus, prætextatus, nunc cataphractus miles, nunc cinſtus, nunc diſcinſtus, ſtultus homo, mutabilis vt Luna. Vult tamen egregia perſona

sona haberi, quamuis omnium ferè sit postremus. Salue igitur vires egregie, & Domine magnifice,

 Sed dic tandem *Socia! Vbi*) hic Heros magnificus inueniri potest, si quis demens eius opella vti voluerit? *In Curia, in Foro, in Taberna, in Theatro, in Lupanari, Lenones inter & Scorta, clamans, exclamans, egregiè mentiens* Hoc solummodo, illi superstitiosum non est: tandem *vino somnoque sepultus, & humi iacens, Procumbit scilicet humi bos*, expectate igitur prandium magnum, splendidum Couuium, si manere volueritis. Sed Quando, Quando (inquam) hunc hominem hoc modo armatum videris? Responsio facilis, hodiè, heri, & cras hoc videre poteritis, semper, & in sæcula sæculorum, Amen. Moueri, & dimoueri ab his egregiis Attributis non potest, immo non vult, Dispositiones & inclinationes non sunt, sed inueterati Habitus. In hoc solummodo constans, quod semper inconstans sit. Profec-tò, felices hii, qui sub talium Clientela militant: sed feliciores multò, qui illis cum nihil negotii habent, vt ego auguror. Atque hoc modo (vt videtis) omnia Prædicamenta, de hoc bello homine prædicantur, quia Substantia est, quamuis omnium pessima.

Huic, non multum dissimiles quidam sunt (quos ego noui) *Petifoggers in the Law*, (qui
nunc

nunc vndique sicut Locustæ, multiplicantur) venerandæ legis nomine indigni, in quibus *petie Lawe*, *petie honestas*, & *petie mores boni*, inueniri solent: Legulæi, non Legisperiti, Patriæ parentes, imò Patriæ pestes, maiori ex parte superciliosi, garruli, contentiosi & pessimi homines. Tales odit anima mea, à talibus itaque libera nos Domine.

Loci Assumpti.

Assumpti loci, seu inartificiales, seu Argumenta remota, & extrinsecus assumpta, quæ sine arte nuncupantur, & extra causam, ad fidem faciendam adhibentur, iam sequuntur: quorum duo sunt genera, *Diuina & Humana*. Diuina semper valent, & sunt in vtramque partem firmissima, & Affirmatiuè & Negatiuè. Affirmatiuè, vt vanus est imaginum vsus in Templis nostris, quia Scriptura sacra sæpius attestatur, illas docere mendacia, & seueriter admoneat, vt ab illis caueamus. *Pilioli, custodite vos à simulacris*, 1. Io. 5. 21. Vtut enim, ex B. Gregorio illud placet, *Imagines esse Laicorum libros*, & in Ecclesia, (si eas non adoremus) permittendas esse: tamen, doctores & instructores periculosos extitisse, & à vero Dei cultu ad illas colendas, homines simplices diuertisse

uertisse, sanioris & melioris iudicii Romanenses, & confitentur liberiùs, & piè lamentantur. Negatiuè, vt Scriptura, nò meminit Inuocationis sanctorum mortuorum, ergo non sunt inuocandi. Et rursus, scriptura non approbat preces communes fieri lingua peregrina & exotica, I. Cor. 14, ergo talis doctrina respuenda est.

Hocque notatu dignissimum iudico, aduersarios nostros recentiores, *Petrum à Soto, Canisium, Lindanum, & Peresum* (viros profecto doctos) concedere, hæc tria nunc nominata illorum commenta, ex Sacris scripturis non posse confirmari, nisi solummodo traditione & consuetudine Romanæ synagogæ: vt doctissimus vir, piæ memoriæ, *D. Whitakerus*, in disputatione sua de sacra Scriptura testatur. Concedunt multa, emendant paucissima.

Sequuntur testimonia Humana, quorum quinque præcipua genera numerari possunt. *Leges, Scripta hominum, Rumores, Insurandum, & Tormenta seu Questiones.* Auruspicum verò, & Augurum responsa & testimonia, ex Auium volatu, aut Extis animalium superstiosè desumpta, neque inter Humana nec Diuina, repono: sunt enim planè Diabolica. Ea itaque, Dialectica nostra meritò reiicit & damnat. Atque ego cum *M. Cicerone*, vetus illud

illud *Catonis* admodum scitum esse dico. *qui*

Dialectica.

pag. 131.

Ciuiles, & Imperatorix: Leges optimæ, prudenter
compositæ, eleganter scriptæ.
Patriæ, & Municipales.

1. Leges.

Decreta, per Gratianum
collecta.

Ius Canonicum
seu Pontificium.

Decretalia
Clementina.

Sacræ & Ec-
clesiasticæ

Extrauagantia.

Concilia

Prouincialia.

Nationalia.

Œcumenica & Generalia.

Testimonia.
Humana.

2. Scriptura, & commentaria hominum doctorum. { Patrum veterum,
Modernorum.

3. Rumores, & fama volans, sæpe. { Augens.
numero mentiens, veritatem { Diminuens.

4. Iurandum. { Ius,
Iurandum.

5. Tormenta, supplicia, seu Quæstiones, per quas, veritatem latentem &
abstrusam, magistratus extorquere solent: quemadmodum cum Bagatha,
& Thara, eunuchis suis, fecit Rex magnus Artaxerxes, Hæster, cap. 12.

uertisse. sanioris & melioris iudicii Romanen-
ses, &c

Negat

onis fa

inuoca

preces

otica, 1

est.

Hoc

farios

nifium

docto

illorum

posse

& cor

tissim

dispu

Conc

Sei

quinc

Lege

dum,

verò,

Auiui

tiosè desumpta, neque inter Humana nec Di-
uina, repono : sunt enim planè *Diabolica*. Ea
itaque, *Dialectica* nostra meritò reiicit &
damnat. Atque ego cum *M. Cicerone*, vetus
illud

illud *Catonis* admodum scitum esse dico, qui
mirari se aiebat, quod non rideret *Aruspex A-*
ruspicem cum vidisset. De Divinat, lib. 2. Eo-
rum coniecturæ & prædictiones incertæ sūt,
& a sanioribus Gentibus, aut explosæ aut de-
risæ.

Hippocrates (in medicorum optimus) scribit, *temperantiam esse matrem sanitatis*. ergo illi credendum. Omnes enim prudentes, illa admittere solent, quæ probantur iis, qui in sua arte benè versati sunt: *veluti in re medica, quæ medico, in re Geometrica, quæ Geometra, Arist. 1. Topic. cap. 6.*

Momus.

Momus sutor, in egregia illa Veneris formosissimæ pictura, ab Apelle delineata, crepidæ formam reprehendit, Apelles emendauit. Sed, cum extra limites artis suæ vagaretur curiosius, statim meritò audiuit, *Ne sutor ultra Crepidam.*

Quando authoritates duæ pugnant, dignior sententia, & probabilior approbanda, & sumenda est. Astronomi veteres, dixerunt, *Solem mouere, Terram stare & quiescere*: quod & nos Christiani, verissimum esse & credimus, & Demonstrationibus confirmare poterimus. Quidam tamen ex neotericis (*ut Copernicus*) vir doctus, in falso argumento ingeniosè desudās, *Terram moueri, Solem verò stare & immobilem esse, falso contendit.*

Copernicus.

In his Testimoniis humanis, Maior est semper particularis: In Testimoniis Diuinis, maior est sēper vniuersalis. Nam quicquid Deus dicit, absque vlla contradictione, vniuersaliter verum à nobis recipiendum est.

Argumentum à Testimonio humano negatiuum

tium, non valet: vt, Aristoteles non scripsit *de Syllogismis Hypotheticis* (vt doctissimus, in re *Dialectica*, Keckermannus annotat) ergo de illis non fuerit nobis, in *Dialectica* hac nostra docendum, hoc non sequitur. Multa enim Aristoteles vel noluit scribere, vel propter negotiorum multitudinem & vitæ breuitatem, scribere non potuerit. Et forsan, omnia quæ scripsit, non extant, sed temporis iniuria, exciderunt.

Quandoque, plurium hominum autoritates pugnant, tunc acquiescendum potius plurimis quàm paucioribus. Quamuis hæc regula, exceptionem nonnunquam admittat. *Michaas enim solus, veritatem tenuit, contra 400. Pseudoprophetas Baaliticos, 1. Reg. 22.* Et bonus pater Paphnutius, in Concilio Nyceno, vnus contra multos, & pulchrè ambo præualuerunt. *Magna est veritas & præualet, Hoc vnum gessit veritas, ne ignorata damnetur, vt habet in Apologetico, vetus pater Tertullianus.* Et, in illa memorabili disceptatione, inter duos patres antiquos, *Hieronymum & Augustinum, de simulatione Petri*, quum posset *Augustinus* pro seipso, plures patres adducere, vnicum tamen ex sacris literis, Apostolum Paulum, omnibus aliorum patrum testimoniis opposuit. Hieronymus, plures homines produxit, *Augustinus* hoc vno contentus fuit.

Aristoteli placet, Topicor. 8. vt ante disputationem, interrogationibus quibusdam, respondentem Antagonistam temptemus & prouocemus, & ex illis quæstiunculis velit nolit, ad incommodum & absurdum, eum trahere, si poterimus. Interrogare quædam ab illo, priusquam argumentati sumus (vt scilicet de quæstionis controuersæ statu inter nos conueniat) facile permisserimus, & prudenter hoc factum esse, existimamus. Sed pace *Aristotelis* dixerim, quia vos iuvenes Christiani estis, in hunc finem interrogare non debetis, vt quenquam decipiatis, & à veritatis via eum abducatis, sed potius vt disputando & quærendo, *alma veritas clarius elucescat*. Cuius rei gratia, omnes disputationes à nobis & vobis, præcipuè suscipiendæ sunt.

Aliquos tamen reperietis, crebris interrogationibus multum delectatos, non vt discant sed vt capiant & illaqueant vos. Si igitur cum talibus vobis negotium fuerit, vos similiter interrogationibus vestris, tentate & prouocate illos. Hoc solutionis genus, ad personam hominum curiosè interrogantium, non est culpandum.

Quod Christus, cum *Scribis & Phariseis* sapius fecit, eorum os hoc modo pulcrè obstruens. Et iubete hos curiosos questionistas argumentari (*ad Idem*) id est, aut contra quæstionem

onem controuersam disputare, aut tacere. Et caute, ne in falso argumēto (aliorum in scholis nostriis disputantium more) nimis pertinaces & contentiosi disputatores sitis. Consuetudo mala, habitum malum procreat, qui radicitus inhærens, difficulter extirpari potest.

Et sic terminantur Loci, & eorum consequutiones: iam verò quid, & quotuplex Argumentum sit, explicandum nobis est.

Argumentum.

Argumentum, est probabile inuentum, ad faciendam fidem. Omnia argumenta trahuntur ex locis iam explicatis: qui sunt, vt Cicero ait, *quasi sedes & domicilia Argumentorum, in quibus illa latent: Cicero, in Particionib. Oratorijs, & Topicis ad Trebatium.* Argumentatio, est Argumenti ex locis Topicis explicatio, & disputationis continuatio, processus, causæque nostræ confirmatio.

Argumen torum 5. genera.	{	Syllogis mus	{	Categoricus	{	Communis
				Hypotheticus		Expositorius
	Euthymenia, leu curtatus, & imperfec tus Syllogisimus					
	{	Inductio.	{	Socratica.		
				Dialectica.		
	Exemplum.					
	{ Sorites, Climax, vel Gradatio.					

Syllogismus, est oratio, in qua, ex duobus premis-
sis propositionibus benè dispositis, tertium, i, con-
clusio necessariò infertur.

Tres sunt in omni syllogismo propositiones,
Maior, Minor, & Conclusio. *Maior* vocari à
multis solet, propositio prima. *Minor*, à Rodol-
pho vocatur *Assumptio vel Assumptum*, ab
aliis *Illatio*. *Conclusio*, à Cicerone nuncupatur
Complexio.

Porro, in omni Syllogismo, tres sunt termini
Maior terminus, Minor, & Medius. *Maior*
terminus, est illud in *Maiore* propositione
quod non est *medius*. *Minor terminus*, est illud
in *Minore* propositione, quod non est *Medius*.
Medius terminus, est conclusionis ratio, nun-
quam ingrediens eam: qui in omnibus figuris
sequentibus, mutat locum suum, & quasi *Rex*
in Regno, plures habet *Aulas Palatinas*, & re-
gios secessus: secundum hanc vsitatam regulã,
utilem fanè, quamvis obsoletam, & vix benè
Latinam.

Sub. præ prima: Bis præ. secunda: Tertia, bis Sub
Sunt itaque figuræ tres, & in illis, Modi qua-
tuordecim perfecti, quemadmodum mox au-
dictis. Reliquos vero Modos imperfectos, ut
non necessarios, quamvis non negligimus, ta-
men minus curamus.

Collocatio Medij, in 1, Figura.

Sub.pra.prima : id est, medius terminus, est Subiectum in Maiore, & Prædicatum in Minore. In qua Figura, quatuor sunt modi perfecti, unde sequens versus.

Barbara, Celarent, prima: Darij, Ferioque.

Quorum exempla, iam subsequuntur: Vbi, obliuisci non debetis, quid antea in Propositionum conuersionibus, circa has quatuor vocales annotauimus, *A, E, I, O*. Non enim sunt Dæmonum Characteres, aut Magicæ incantationes. Antea seriò dixi, Argallum Exorcistam & *Erasmi* Necromanticum non fuisse, Sit Erasmi, *Regu-* *Spectrum.* *laris Faunus*, Exorcista, si voluerit, cum Dæmonibus & Cacodæmonibus consortium habeat, Circulis & Characteribus, ad nauseam usque vtatur & abutatur suis; adhuc ludat & illudat, sibi ipsi & aliis, si placet, Ingens porro vas Aquæ consecratæ ad manum, ad aspergendum, cum opus fuerit, habeat: sinamus hominem insanire suauiter, quoniam persuaderi non vult. Argallus noster, Regularis Faunus non est: *irregularis* homo (me castor) hoc si faceret, & fatuum *Faunum* imitaretur, Vtilia hîc proponimus, si paululum anscultare volueritis. *A*, significat generalem affirmantem, *E*, generalem negantem, *I*, particularem affirman-

tem, O. particularem negantem, vt in his subsequentibus exemplis, manifestum vobis faciemus.

Bonum.	Bar		Omne bonum est expetendum,
	ba-		Omnis virtus est bona, ergo
	ra.		Omnis virtus est expetenda.

Violentia. la.	Ce		Nulla violentia est perpetua.
	la.		Omnis tyrannis est violenta, ergo,
	rét		Nulla tyrannis est perpetua.

Tyranni, propter violentiam & crudelitatem suam, perfectò formidabiles sunt omnibus, vt *Phalaris, Scylla, Dyonisus, Nero, Diocletianus*, similesque, non homines sed bestiae, & monstra hominū. *Malus diuturnitatis custos est metus, vt M. Cicero*, ex veteri Ennio probat. *Quem enim metuant oderunt: quem quisque odit, perire cupit.* Itaque, in benè & prudenter gubernando, alia via, alia methodus sequenda est.

In ster- culinū proiici- unt.	Da-	}	Quicumq;, sepultos Christianos, in sterculinum proiciūt, sunt crudeles homines.
	ri-		Romanenses, sepultos Christianos, in sterculinum proiciunt, ergo,
	j.		Romanenses sūt crudeles homines.

Inter multa huius generis Exempla, vnum Marianis Temporibus impiè perpetratum, hic occurrit, quod inficiari non possunt, ego enim vidi. *Petri Martyris Florentini uxorem*, in omni bonarum literarum genere, viri instructissi-
mi

mi, apud nos, in *Ecclesia Collegii Christi Oxoniensis* sepultam, mulierem aduenam, fœminam piissimam, nostri Romanenses (cadaueris humati carnibus non dum consumptis) ex sepulcro foderunt, & in stercorarium proximū inhumaniter proiecerunt. Hoc, Oxonii (me puero) contigit: quod ego & benè memini, & cum aliis vidi, & cuius spectaculi, oculatus (quamuis monoculatus) testis tunc fui, Quorū immane scelus, nostræ Academiæ flos, *D. Rogerus Marbeccus* (qui adhuc viuit) his paucis optimis & suauissimis versibus, sic bellè depinxit.

Famineum sexum, Romani semper amarunt,

Proiiciunt corpus, cur muliebres foras?

Hoc tu si quæras, facilis responsio danda est,

Corpora non curant mortua, viua petunt.

Profectò, Papistarum impura crudelitas, ab ipso *Apelle*, non potuit depingi viuaciùs. Hic senex venerandus, homo septuagenarius, Medicinæ doctor æruditissimus, & Regius, regi nostro *Iacobo* & notus est, & charus: ex cuius munificentia Regali, splendide viuit, vir suauissimis moribus imbutus, & Regio fauore dignus, amicus meus bonus, & pietatis affectu, pater singularis.

Fe		Non est bonum, hominē esse solū, Ge. 5
Homo. ri-		Sacerdotes sunt homines, ergo
o,		Non est bonum sacerdotes esse solos.



Dixit olim prudens Deus (hominis infirmitati gratiosè consulens) *non est bonum, hominem esse solum, faciamus ei adiutorium, simile sibi*, Gen. 2, 18. Romanensium sacerdotes, non sunt soli, mulieres enim & fouent & fauent. Quare igitur, ex hoc Geneseos loco, contra illos argumentari solemus? Et ego illos similiter interrogo, quare vxores licitas contemnūt & meretrices nutriunt? Quas, scilicet, vt Patriarchis veteribus similes videantur, molliore nomine (*Concubinas suas*) in malam rem, nuncupari volunt. O boni viri, si non castè tamen caute, quemadmodum in veteri vestra Glossa, fratres vestros olim amicè admonuistis. Sed profectò, neque castè neque cautè hoc facitis. Omnis enim mundus iam nouit turpitudinem vestram. Audiant itaque Mantuanum suum, non nostrum inquam, sed audiant suum.

Petriq; domus polluta fluente

Fr. Mantuanus,

*Marcessit luxu, (nulla hic arcana reuelo,
Non ignota loquor, liceat vulgata referre:
Sic vrbes populiq; ferunt, ea fama per omnem
Iam vetus Europam) mores excirpat honestos.
Sæctus ager Scurris, venerabilis Ara cynadis
Seruit: honoranda Diuum, Ganimedibus ades.
Frater Mantuanus, qui à vestris partibus stat
hoc celare non potuit, Calamit. lib. 3, Martialem,
poetam Lasciuum, nuper castrastis, & ob hoc laudandi estis. Sed, Medius fidius, vos ipsi
castra-*

castratione digniores, tales si fueritis, quales frater Mantuanus vos esse prædicat. Verè de vestra Ecclesia olim pronunciauit *Clarenallensis Abbas Bernardus*, quòd à *Planta pedis ad verticem capitis*, non est in vobis ulla sanitas ex *Esai. I. ver. 6.*

In hac prima Figura, hoc porrò a vobis obseruari debet: processus fit in illa, ab Vniuersalibus ad particularia, seu à Genere ad Speciem, cuius maior est vniuersalis, & minor semper affirmatiua.

Collocatio Medij, in 2. Figura.

Bis. præ. secunda: id est, Medius terminus in hac Figura, est bis prædicatum, in maiore scilicet prædicatum, & prædicatum in minore. In qua, vt in prima, quatuor sunt modi, vt ex versu sequenti apparet.

Cesare, Camestres, Festino, Baroco, secunda.

Ce		Nulli diuites egent,
Egent. fa		Omnis avarus eget, ergo,
re.		Nulli auari, diuites sunt.

Ca		Bonū omne, possessorem meliorem
Possessorē		facit,
meliozem, me		Nullæ corporis voluptates, posses-
		so rem meliorem faciunt, ergo,
stres		Nullæ corporis voluptates, bonæ sūt

Cauendæ sunt omnes crassæ & belluinæ voluptates, dulce venenum, Serpentibus illis similimæ, quorum caudæ sunt aculeatæ, venenosa

nosæ & mortiferæ. Voluptates tamen quædã sunt licitæ, homineque verè Christiano, non indignæ: diffiteri hoc non audeo. Sed fornicatio & adulterium, tales non sunt. *Nolite errare fratres, neque fornicarii neque adulteri, neq; molles, neq; auari, neq; ebriosi, neq; maledici, neque rapaces, regnum Dei possidebunt.* Si quis verò putet, posse quempiam quoto tempore voluerit, verè pænitere & recipiscere, seipsum periculose decipit. Pænitentia enim, *Dei donum est, non nostrum.* Itaq; dum tempus habetis, in tempore caute obsecro.

Fronte capillata, post est occasio calua.

Caro & Fe-		Spiritus, non habet carnem & ossa,
ossa. sti-		Christus habet carnem & ossa, ergo,
no.		Christus non est Spiritus.
Honorat Ba-		Omnes pii honorant parentes suos,
parêres. ro-		Cham, nō honorat parêtes suos, ergo
co-		Cham, non est pius.

Cham, pater Chanaan, Cham filius Belial, non filius Patriarchæ Noe, bonis parentibus indignus, *patrem suum deridebat, & maledictus fuit*, Gen. 9. Absalon, vir pessimus, & in Dauid patrem suum amantissimū immorigerus, in *Quercu per flavos & rutilantes crines suspensus, misere confossus fuit*, 2. Sam. 18. Cauete vobis vos superbæ filiæ Sion, quæ in crinibus vestris contortis & mentitis, nimium confiditis. *Decaluet Dominus verticem filiarum Sion, & Dominus crinem vestrum nudabit.* Et
erit

erit pro suauī odore, fetoꝝ: & pro Zona, funicu-
lus: & pro crispante crine, caluicium, & pro fas-
cia pectorali, caluicium. Os lehoua hoc loquu-
tum est, Esai, 3. Itaque cauete. Absalonis crines
nolite optare, sed *Magdalena*, cuius peccata
condonauit misericors Christus, Luc. 7.

Proditor Adonias, regia proles, ex Salamo-
nis regis & fratris iusto mandato, à *Banaia*, fi-
lio *Ioadæ*, interfectus fuit. Itaque, cauete (inue-
nes) ne in parentes vestros immorigeri, in prin-
cipem regem (vinctum Domini) coniuratores
sitis. Aetas hæc vestra, lubrica & plerunque
indomita Iuuenca, *Ierem.* 31. 18. hanc admoni-
tionē extorquet. Senex sum, multa huius gene-
ris tremenda exempla vidi: paternè moneo,
vt pater filios suos, moniti vt muniti sitis.

Vtilis est hæc secunda Figura, ad refutan-
dum, atque per sententias repugnantes con-
cludendum: & pendet ab hoc loco Topico
antea recitato, *Remoto genere vniuerso, tollun-
tur omnes eius species. In qua*, maior proposi-
tio est semper vniuersalis, & syllogismi om-
nes negatiui, affirmatiui nulli, ne vnus quidē.
Negatiuos eos appello & denomino, à Con-
clusionē, quæ semper negatiua est.

Collocatio Medii, in 3. Figura.

*Tertia, bis Sub. id est, tertia Figura est, quan-
do*

dò Medius terminus, est subiectum & in maiore & in minore propositione, habens sub se, hos sex modos, Darapti, Felapton, Disamis, Datifi, Bocardo, Ferison: vnde, hi duo versus sequentes.

Tertium, grande sonās, recitat darapti, Felapton, His adiungēs Disamis, Datifi (Bocardo) Ferison

Da.		Omnis virtus Moralis, labore paratur,
Virtus. rap		Omnis virtus Moralis pulchra est, ergo
	ti.	Quædam pulchra, labore parantur.
Fe-		Nullum periculum virile, viro sorti est fugi-
		endum,
lap-		Omne peticulum virile, est molestum, ergo,
ton.		Quædam molesta, non sunt fugienda.

Quis bonus dubitet, inquit M. Cicero, Reip. causa, vel mortem oppetere, si ei sit profuturus? Boni & fideles subditi, patriam suam, mortis cū periculo, egregiè & viriliter tuentur, & defendunt. Qua itaque Scriptura, quo testimonio, quo Augurio aut Diuinatione, à subiectione sua deterrentur Papicolæ nostri, ab illis auco cognoscere. Papæ forsan, Gehennam vel Purgatorium minitanti, nisi hoc faciant. Hector apud Homerum (nescio quo Augurii metu, pugnam detrectanti) Polidamantem grauius obiurgens, respondit, Vnum esse Augurium optimum à Deo mandatum, fortiter defendere Patriam. Omnis anima, potestatibus sublimioribus subdita sit, Rom. 13, Etiam si Apostolus, etiam si Euangelista, etiam si Propheta, siue quis-

quisquis tandem fueris. Neque enim pietatem subuertit ista subiectio, Chrys. in hunc locum, Homil, 23. Romanenses contra (Catholici sanè homines) contra patriam charissimam, arma sumunt: & huiusmodi bellum, in Protestantes denunciatum, bellum sacrum, honorabile & Meritorium nuncupant. Itaque, non solum inter malos homines, sed Patriæ proditores pessimos, enumerandi sunt.

Vera in sa- uocatio.	Di	Omnia vera Inuocatio, saluat
	Quedā	Vera inuocatio prouenit ex
	fide, ergo,	
	mis	Quoddam proueniens ex fide, saluat

Artium ri- notitia.	Da	Omnia artium notitia, utilis est Theologo
	Artium	notitia, in Philosophia tracta-
	tur, ergo,	
	si.	Philosophia est ut utilis Theologo

Honestiū gaudium	Bo.	Honestum gaudium, non est prohi-
	bitum	Christianis;
	car	Omne honestum gaudium recreat
	do.	animum, ergo,
		Quoddam recreans animum, nō est
		prohibitum Christianis.

Honestum est gaudium (inuenes) in arcu & sagittis vos exercere, non in Alea, Vino, Vene-
re,

Nox & amor vinumq, nihil moderabile suadē
Illa, pudore vocat, liber, amorque, metu.

Hanc Aleam, Damonē inuenisse, affirmat Au-
gustin. de ciuit. lib. quarto. In quo exercitio,
quanto peritior, tanto nequior. In Arcu & sagit-
tis

tis sese exercuit, bonus & fidelis Dáuidis amicus, Jonathan, 1. Sam. 20. In floridis agris, & campis redolentibus, ambulando nos recreemus, vbi piè & honestè confabulantes, *forſan cum Cleopha diſcipulo, Luc. 24,* in via, Chriſtum ſaluatorem inueniemus, qui nobis eſt *via, veritas, & vita*, Sint itaque noſtra Colloquia caſta, ſunt ioci honeſti, liberales, & ſint moderati: In melle poteſt eſſe ſatietas, Prou. 25

Voluptates commendat rarior uſus.

Iuuenal.

Et in ocio, caueamus ocioſitatem, matrem nugarum, nouercam virtutum, ut Bernardus bene monuit. Eſt tamen ocium aliud, i. ocium literarium, ſumme laudabile, & vobis iuuenibus (verè ſtudioſis) ſummopere expetendum, de quo Plinius iunior, vir doctiſſimus, ſic ſcribit. In Laurentino meo, aut lego aliquid aut ſcribo, aut etiam corpori vaco, cuius ſulturis, animus ſuſtinetur. Nihil audio quod audiſſe, nihil dico quod dixiſſe peniteat. Neminem reprehendo niſi vnum me, quàm parùm commode ſcribo. Mecum tantùm, & cum libellis loquor. O dulce ocium, honeſtumque, ac omni pene negotio pulcricus, Plin. lib. primo Epistoſa 9. Sin verò (prout dabitur occasio) cantare placeat, in Dei gloriam illud faciamus, ut ſanctus Iacob ſanctè monet cap 5. In omnibus iocis, ſanctæ matris noſtræ Hieruſalem, quæ ſurſum eſt, ne obliuiſcamur, ſed eam omnibus aliis delectamentis, meritò præ-

præferamus, Psal. 137, 6. Turpes & obscænas
cantilenas, tanquam animi pestes fugiamus :
militant enim aduersus animam, 1, Petr. 2.

Fe		Nullum malum erit impunitum,
Malum ri		Quædam mala sunt exigua, ergo,
so.		Exigua mala, non erunt impunita.

De verbis ociosis, reddenda ratio est, in die Iudicii, Mat, 12. Quæ tamen mundus iste malus & fallax, peccata non esse, falso & periculose existimat: aut saltem talia, quæ nostri Romanenses aqua sua benedicta elui, & facile purgari posse, falso arbitrantur.

Habet hæc Aqua benedicta, virtutes mirabiles, si ocium sit audire. Mures abigit & Sorices ut in vestris cubiculis manere non audeant. Felibus itaque, & vigilantibus Cattis, non est opus. Dæmones, Cacodæmones, & omnes infernales spiritus malignos fugat, & *tanquam alter Raphael, Tob, 8. eos apprehendit, & in desertum superioris Egypti, eos relegat,* Et quod magis miraculosum est, mulieres steriles, ex lege veteri dei, maledictas, fructuosas efficere, & pulcrè parere cogit: neque opus nunc esse, ut apud sæculum prius, *Iunonis Lucina opem & adminiculum implorare.* Putatote, si aliquis robustus et strenuus frater, otiose mendicans eā copiosius aspergat.

In hac tertia figura, minor propositio, debet semper esse affirmatiua, Quæ vnica regula,
attente

attentè obseruata, multos Paralogysmos soluit: porrò, et conclusio est semper particularis.

Versus hi quatuor sequentes vobis memoriter mandandi sunt: nam ad componendos in omnibus modis et figuris, syllogismos bonos & legitimos (vt modò audiuiſtis) valdè vtilis sunt.

Barbara, Celarent, Prima, Darii, Ferioque, Cesare, Camestres, Festino, Baroco, secunda.

Tertium grande sonās, recitat Darapti, Felapto, His adiungēs Disamis, Datisi (Bocardo, Ferisō.

A Barbara, vt hic videtis, quatuor hi barbari versus incipiunt, & in illis omnia videntur barbara, peregrina, & exotica. Et, si animaduertatis, in (Bocardo) desinunt, quod periculosum est, nisi prouidè caueatis. *Bocardo enim*, apud nos Oxonienses, Ergastulum est, in frigida *Ciuitatis Boreali parte*, squalidè situm, fontibus leuioribus puniendis destinatum, & quasi alterum Purgatorium. Videte igitur (iuuenes) & circumspicite, ne vos propter æs alienum, huius Purgatorii pænas experiamini. Amen, Prædico vobis, quicumque in hoc nostro Bocardo, syllogismum confecerit, indè exire non solet, donec nouissimum quadrantem restituerit. Relinquamus igitur hunc periculosum syllogismum, & de aliis dicere progrediamur: nam hic diutius commorari non est commodum.

Con-


Conclusionis vna regula optima, superest :
 quæ nunc hoc in loco (ne excidat) vobis com-
 modè recitanda est : In omnibus syllogismis
 Categoricalis minor terminus debet esse *Con-*
clusionis subiectum: Maior terminus, conclusi-
 onis prædicatum. Medius verò, in Argumen-
 tatione bona, conclusionem nunquam ingre-
 ditur, neque ingredi debet, quia non est eius
 domus & possessio, sed alterius. Neque vult
 Dialectica nostra, alicui iniuriam facere, sed
 unicuique quod suum est, dare & porrigere.

De Syllogismo Hypothetico, in propositi-
 onibus hypotheticis Disiunctiuis, antea dixi-
 mus: ad quem locum (studiosi iuvenes) vos re-
 mittimus. Sequitur iam, syllogismus Expositi-
 torius.

Syllogismus Expositorius.

Syllogismus Expositorius est, cum *Medius* ter-
 minus, est vox singularis, & referri potest, ad
 Figuram tertiam, in qua *Medius* terminus est
 subiectum in Maiore, & subiectum in *Minore*
 quemadmodum hic infra videtis, valens af-
 firmatiuè, & negatiuè: vt,

Cicero.	Cicero est Philosophus, Cicero est orator, ergo, Quidam Philosophus est orator.
Argallus noster.	Argallus noster, est pauper senex, Argallus noster, est Minister verbi dei, ergo, Quidam minister Verbi Dei, est pauper senex,


 Sit Argallus, Archigallusque noster, homo pauper, sit pauperior, sit pauperrimus: omnes paupertatis gradus & comparationes Grammaticales subeat, quid tum postea? *Qui volunt diuites fieri, 1. Tim. 6. incidunt in temptationem, et in laqueum Diaboli, & desideria multa & inutilia & nocua, quae mergunt homines in interitum et perditionem.* Ego, sic à Satana (snottie nose) temptari, prouocari, illaqueari, & dimergi, non desidero. Illud enim, quod mihi olim, cum rector de *Cadleigh* (in agro Deuonienfi fuerim) malè contigit, obliuisci non possum: de quo antea admonui: *Hac Pindari, Poetæ antiqui, mihi potius placent.*

Amabo leuem Cupressum,

Omissis Creta pascuis.

Terra mihi datum est parum,

Careo interim doloribus.

Hos suauissimos & dulcissimos versiculos, sæpiùs apud me cantare, & in agis raucus senex, modulari solco. Domum enim habeo, satis commodam, sed non hæreditariam. Et pro Pyndari Cupresso, Pomarium paruum & nitidum. Porro, aquam profluentem, salubrem & lymphidam, glebas paruas, sed proximas, Et, (Ut nos Phariseorum discipulos agnoscere possitis) decimas minores, Mentam scilicet, Anethum, & Cynimum (non Cynamonum) aut eius generis pretiosa Aromata, ne decipiamini:

talìa

talia neque dant, neque Decimant? *Consue-* *Consuetud,*
tudinis malum, Decimas nostras maiores &
meliores, absorpsit & abliguriunt. Habemus e-
 nim legem, & secundum legem debet mori.
 Id est, habemus pessimā consuetudinem cōtra
 Ecclesiam Dei, & Ministerium verbi. Pro-
 fecto, *Tyrannus iste, frequenter iniquissimas*
leges obtrudit mortalibus, ut belle notat D. E-
rasmus. Bene diues est, qui in ære alieno non
 est, qui necessaria possidet, & superflua non
 desiderat. Pro his Deum seriò precamur: ad-
 huc enim (homo plus quàm sexagenarius) hāc
 metam non attigimus. Si esset in illis fides, in
 quibus summa esse deberet, inopia non labo-
 raremus.

Hoc tamen vnum, mirificè me consolari
 solet, quòd tres habeam discipulos adhuc su-
 perstitēs, qui me olim præceptorem suum, in-
 genuè agnoscunt & confitentur: viz. *Thomam*
Wakelin Armigerum, Graiēsis Hospicii (ex
 Senioribus) alumnū non postremū, vi-
 rum liberalem, & mei amantem, *D. Thomam*
Smithe, equitem auratum, ingenio, doctrina,
 linguis, eloquentia, multisquē aliis naturæ &
 artis dotibus, præclarè ornatum, & Vene-
 randum in Christo patrem. *D. Franciscum*
Godwyn, *Landaffensem* Episcopum, virum mi-
 tissimum, & sanctissimis moribus imbutum.
 Hi tres *Argallum* cū viderint, gaudent, salu-

Gratitudo.

1. Cor. 16.

tant, congratulantur, ad cor meum loquuntur. Et quia senex sum, & consolationis indigeo, auro potabili cor meum pulcrè exhilarare solent. *Stephanus, Fortunatus, & Aichaicus, Pauli* labantem spiritum, multum refecerunt: similiter hi tres, meum. Optavit Dux *Agamemnon*, decem prudentes Nestores, et ego Argallus, decem rales consolatores bonos; Auri potabilis nimis cupidus essem, plures si desiderarem.

Negativus Expositorius.

Crassus. | *Crassus, non fuit acuti ingenii,*
 | *Crassus, fuit Dives, ergo,*
 | *Aliquis dives, non est acuti ingenii.*

Tardi & habetis ingenii *Crassus*, nomine & re *Crassus* fuit: *Nomen & Omen*. Utinam omnes avari diuites, tales essent. Nimis enim prompti sunt & ingeniosi, ad decipiendum bonos & simplices, homines. Quod ego sæpius, magno meo malo, expertus sum. *Filii huius seculi, in generatione sua, prudentiores sunt filiis lucis, Luk. 16.* Sed malle ego ab aliis me decipi, quam alios fraudulenter, decipere, & in hoc, apud amicos meos & familiares, quasi prædam nactus, sæpius gloriari soleo. *Hic Syllogismus dicitur Expositorius, quia exponit propositiones veras vel falsas esse, per singulares.*

Nullus

Nullus syllogismus, ex solis Negatiuis, aut ex solis Particularibus confici debet : Itaque, apud nos pueros Ononienſes (in Paruis noſtris) hoc ſæpiùs in ore fuit,

Syllogiſari, non eſt ex Particulari,

Neque Negatiuis, recte cōcludere, ſi vis.

*Solet imperitum vulgus, ex aliquo particulari, vniuerſum malè colligere. Videt Germanos quosdam, ebrietati deditos, & aliquos Italos, libidinoſos : hinc, omnes & ſingulos tales eſſe, imperitè concludit. Docti & conſiderati homines, hoc modo non arguunt. Perinde enim eſt, ac ſi hoc modo concluſero. vos (qui hæc legitis) ocioſos & inertes eſſe ſcholasticos, quia inter vos, veſtrum aliqui, tales reperiri poſſunt. Vos verò, *fucos ignauos* non eſſe (niſi mentior) audacter auſim affirmare. Cauendum vobis (iuuenes) ne ſimili modo, contra voſmetipſos, perperam argumentemini.*

*Præterea, quamuis nonnulli ſyllogiſmi, in omni Figura noſtra antea recitata, negatiue concludant, tamen ex omnibus negatiuis, nemo illud commode facere poteſt : Talibus eſt itaque illud verè reſpondendum, quod nos ipſi (*barbatuli*) in Scholis noſtris inculcare ad nauſeam uſque ſolebamus,*

Neque Negatiuis, recte concludere ſi vis.

Syllogiſmus Categoriſ communis, ratione materiæ, triplex eſt : Demonstratiuus, progrediens

progrediens plerumque ex artium principiis & Axiomatibus quæ nullus sanæ mentis negare potest, aut debet : *Dialecticus*, ex probabilibus concludens : *Sophisticus*, qui ex captiosis, fallacibus, & ambiguis constare solet. *Ad Demonstrandum*, & firmiter constringendum, Argumenta quæ ducuntur à vera *Definitione*, *Agere*, *Specie*, *Differentia*, à Proprio, Toto, Partibus, Causis veris & Effectis, præcipue valent.

Enthymema.

Enthymema, est curtatus & imperfectus syllogismus, *Davidis regis nuncijs ab ingratis Ammonitis*, 2. Sam. 10. ignominiose truncatis & abscissis, non dissimile, in quo altera propositio semper desideratur : quam si suppleas, perfectam effeceris, in aliqua figura, syllogismum. *Eius*, duæ sunt partes, *Antecedens* & *consequens*. Et notate quæso, si in *Antecedente* & *Consequente*, idem sit Subiectum, tunc deest maior propositio : si *Prædicatum* fit in utraque idem, tunc desideratur minor.

Enthymema, facile reducitur ad Syllogismum, si propositionem desideratam, addere volueritis. Cuius altera propositio reticeri solet, aut brevitatis causa, aut *Argumenti* vitio. Nam si ambæ exprimerentur, consequentis vitium, facilius

facilius deprehēderetur. *Aristoteles* vocat *Enthymema*, *Rhetoricum Syllogismum* : *Enthymema* verò, *Rhetoricam Inductionem*. Tamen, quia apud *Dialecticos*, bonum habent vsum, in illis explicandis (per Dei gratiam) adhuc vt incēpiamus, Progrediemur.

Inductio.

Fundamentum huius generis *Argumentationis*, est *AEquipollentia* generis & omniū specierum : itemque, *equipollentia* specierum & omnium *Individuorum*.

Inductio duplex est, *Socratica*, per interrogationes particulares, vt inde generale concludamus *Arist.* 1. *Topicor.* cap. 9. & *Dialectica*, quæ est, cum ex rebus singulis, quæ sunt similes, res vniuersas comprobamus, *Arist.* 1. *Top.* cap. ultimo. *Syllogismus*, ex rebus vniuersis, singulas demonstrat: *Inductio* autem, ex singulis, vniuersas colligit & concludit: Huius posterioris, duæ sunt partes, *Antecedens*, quæ ex rerum singularum coaceruatione constat, & *Consequens seu Conclusio* quæ est generalis illa propositio, ex singulis rebus collecta & conclusa. *Inductio*, alia est affirmatiua, alia negatiua,

Inductio Affirmatiua.

Vinosa Inductio.

Vinum Rhenauum calefacit,
Creticum calefacit,
Italicum calefacit,
Gallicum calefacit,
Hispanicum calefacit, ergo,
Omne vinum calefacit.



Et quoniam de nobili vino, de sanguinæ vuæ, Gen. 4, hic loquimur, audite quæso de nobili hac Dei creatura, compotorum quorundā Glossam ignobilem, Glossa ordinaria multò deteriore. *Noli adhuc (inquit Paulus) aquam bibere, sed (modicum) vini sumito, propter stomachum & crebras infirmitates tuas, I. Tim. 5* Quem Pauli bonum contextum, illi suo Glossæmate malo, malè sic peruertunt. Non bibemus aquam sed vinum : & affatim & copiosè ex Pauli authoritate, hoc faciemus. Modium enim vini sumemus, propter stomachum scilicet, & crebras infirmitates nostras. Hi strenui potatores, Timotheo iuueni lāguidodissimiles, non (Modicū) sed (Modium) vini habere volunt, propter stomachum (in malam rem) & crebras infirmitates suas.

Interim, notate quæso, quàm egregiè seipso decipiant. Modius enim, est aridorum mensura, vt Amphora & Dolium, liquidorum. Arida verò temulentis non placent, sed liquida. Nouum & inauditum hoc metendi genus, vinum metiri in Modio. Itaque, si ex hoc loco sapere velint, Paulū Apostolum, librariorum incuria malè deprauatum, integritati suæ & genuinæ

genuinæ lectioni restituant : artificioseque corradentes & expungentes (*Modicum*) pro co, substituant (*Dolium*) sicque fortitet bibent athleticè, strenuè, & forsàn plus quàm satis Non ego hic, nobilem Vinicreaturam derideo, sed eius abusum vitupero; bonum & non adulteratum, summè laudo & extollo.

Vappa, vappa inquam scelerata, mihi non placet, vt neque Acidum delectat. Illud etiam (de quo conqueritur *Esaias*) *vinum tuum mixtum est aqua*, palato meo non aridet : de tali mixtura conqueritur *Esaias Prophetà, Esai, I*, & de tali mixtura conqueritur Argallus senex. Dicuntur Vinarii nostri (subdoli homines, illud si faciant) vinum suum generosum, aqua diluere solere, in quem finem, ipsi viderint. Christus, aquã in vinũ miraculosè mutauit, hi, vinũ in aquã fraudulter cõuertunt, imo peruertunt Ego, illorũ arcana hìc reuelare neque volo, neque possum. Sinant me obsecro iã senem, ad libitum meum diluere vinum meum, aut si bi ipsis reseruent, ad faciendum (*bad Vinegar*) si placet. Sin verò diluere velint, illud vobis inuenibus potius quàm nobis, prouectioris ætatis senibus faciant, ne fumus & euaporatio, cerebrum vestrum conturbet, & sic Inventioni & Iudicio vestro (quæ nostræ Dialecticæ precipuæ partes sunt) noceant & incommodent. Nollem vos à proficiendo sic retardari.

sed

Sed, finite me adhuc (obsecro) paulisper progredi, quo vellem. O præclarum, nobile, & generosum vinum, scilicet aqua non dilutum. Stomachi crebras infirmitates tu corroboras languidum Timotheum tu iuuas, vinum (COS) vinum ex Falerno, vinum formosum, gratiosum, fragans, odoriferum, frigidum, friscum. Lac senum tu es, cor hominis lætificans, mæstos tu erigis, & pulchrè consolaris Vix me possum hic cōtinere, quin adhuc celebrem & extollam dignitatem, & meritas laudes tuas.

Sed, ne me senem delirare, & vino sepultum suspicemini, & Cremeti apud Comicum, seni temulento similem iudicetis, me reprimam, nolo longiùs exorbitare. Interim, hoc verè auisim affirmare, eius copiam haustam, vobis iuvenibus (quia nimis calefacit) plurimum nocere. *Vinum adolescentibus porrigere, est oleum igni addere.* Cauete igitur, ne hanc vinosam inductionem legentes, plus quam oporteat, bibatis. Nobis senibus, quàm vobis multò est salutaris, si benè caueamus.

Inductio. Negatiua.

Inductio negatiua, ritè confecta, valere potest, hoc modo.

*Romulus, non patitur Remum fratrem
vter.*

uterinum,

Cæsar, non patitur Antonium (Cleopatra amasiam)

Absalon non patitur Edwardum. 5. nepotem, ergo,

Omnis potestas, impatiens consortis erit.

Verissimum enim illud est, quod Lucanus Poeta olim cecinit,

Nulla fides regni socijs, omnisque potestas.

Impatiens consortis erit: nec Gētibus ullis Lucan. lib.

Credite: nec longè factorū exēpla petantur, pri. Pharsal

Fraterno primi maduere sanguine muri.

Inductio sufficiens & plena est illa, in qua potest ostendi exemplum diuersum, *Insufficiens* est illa, quando aut diuersa exempla, aut vnicum ostendi potest, in quo instare possumus. Cum enim singularia sint infinita, sufficit præcipua adduxisse, addita formula solēni, *nec potest dari exemplum dissimile, ergo, &c.*

Inductio, apertior est quàm Syllogismus, sensu-unique iudicio familiarior: *syllogismus autem*, vrgit magis, ad eosque qui contradicunt refellendos, potentior, *Arist. 1. Topic. cap. 8.*

Exemplum.

Argumentum ab Exemplo, hoc esse potest vulgatum forsan, sed non despiciendū. *Marcus Attilius Regulus*, vitam potius amittere quam

quàm fidem hosti datam fallere maluit, ergo fides hosti & inimico promissa, seruanda est. Profecto, vt quod res est dicam, fides Christianorum, in rebus honestis & licitis, non est frangenda, *nec considerandum cui, sed per quem inraueris, vt Hieronymus in Ezechielem, prudenter annotauit.* Iuramentum verò, sanctorum nomine sancitum, Scriptura nullibi approbat. Atque hoc ausim contra *Romanenses* nostros (quauis iam senex) cōprobare, & arguendo & disputando, defendere.

In Concilio Constantiensi, parùm constantes fuisse *Papicolas* & difragi: namque, cum *Ioanne Hus* & *Hieronymo Pragensi*, hominibus piis, doctis, & verè religiosis, fidem suam fæde violarunt. Itaque *Protestantibus* hæreticis (sic enim hi belli homines nos vocant) fidem datam, non esse seruandam, seriò concluderunt. Similem adhuc fraudem, *Romanenses* nostri retinēt. Itaque, caute obsecro, quomodò illis aliquid promittentibus, fidem adhibeatis.

Obiectum olim Carthaginientibus à veteribus Romanis, quòd essent fæderis violatores. Hoc iam *Romanensibus nostris* nouis, similiter obiicere poterimus, quod hi fidem suam nec liberent, nec curant. Audiant itaque. *S. Dauidem: Domine, quis habitabit in Tabernaculo tuo, aut quis, requiescet in monte sancto tuo?*

Qui non fecit proximo suo malum, qui iurat proximo suo, & non decipit, Psal. 15. Certè, nisi benè caueant, non requiescent, in monte sancto Domini.

Rursus attēdite, & mihi (balbutiēti seni) parcite obsecro, ferè enim iā peroravi. Exempli huius, hoc, aliud Exemplum esse potest, si legere volueritis. Christus Iesus oravit pro inimicis suis: eius exemplū Stephanus sequutus, similiter pro persecutoribus suis oravit, ergo illorum exemplo, & nos pro inimicis nostris orare, & exorare debemus, si vllō modo illis orando prodesse, & opitulari poterimus.

*Habet hoc Argumentandi genus, plus momenti ad persuadendum, quàm necessitatis ad concludendum. Idcirco, simpliciores qui syllogismis non capiuntur, exemplis capi & persuaderi possunt: quippè qui sensu potius quàm rationibus fortioribus, edoceri possint. Sed cautè nobis ab hoc loco arguendum est: omnia enim non sunt sequenda, vt hoc: Milo, missus est in exilium, quia Clodium occidit, ergo M. Cicero mittendus est, similiter in exiliū, quia Lētulum occidit, hoc non cohæret. Magnum enim discrimen inter Clodium & Lentulum. Lentulos, Cethegos, & Catilinas (in patriam suam eharissimam) coniuratores pessimos, olim fuisse legimus: de Clodio isto, hoc non legimus, Talia frigida argumenta, Cicero
plum-*

plumbeas pugiones appellare solitus est, tales scilicet quæ secare, penetrare, & diuidere non possunt, quia sūt obtusæ.

Lapsus patrum, hūc referendi sunt: quorū exempla, eo vsque sunt imitanda, quousque illi sequuntur Deum. Prudenter olim dictum fuit, *Legibus, non exemplis viuendum esse*. Sunt ergo omnia exempla quæcunque, ad bonos & honestos mores, ad sacras Dei leges & eius sancta mandata, restringenda vobis.

Dilucidam & perspicuam argumentationem faciūt, Exemplum, Similitudinisque collatio. *Exempla* verò, propria, & ad rem apta esse debent, & eiusmodi, ex quibus res controuersa meliùs iutelligatur. Cuiusmodi sunt illa qui *Homerus*, non quæ *Charilus* commemorat. Sic enim notius erit & clarius, id quod proponitur, *Arist. 8. Top. cap secundo*.

Hic Charilus, poeta *Samius* fuit, ab *Herodoto* institutus, homo, indoctus, & tali præceptore indignus, qui *Alexandri Magni* res præclarissimè gestas, ausus est scribere, carmine indocto & ridiculo:

Scribimus indocti, doctique poemata passim.

Horat. epist. lib. 2.

Similiter, & *Argallus* noster (*Londinensis*) senex indoctus & delirans, Definitiones & Diuisiones, & Distinctiones, & Argumenta meditari, & in anno suo pene *Clymaeterico* & fatali

fatali, in morris scilicet limine, scribit dialecticam. Quo genio aut ingenio, diiudicent Academici nostri. Quibus, hos meos labores, qualescunque fuerint, humiliter offero, consecroque in grati animi significationem, pro Munusculo. Utque hanc meam *senilem Dialecticam*, in iuniorum & nouitiorum suorum usum elaboratam, in bonam partem amicè & candide accipiant, submisso peto.

Sorites.

Sorites, est argumentandi ratio, qua prædicatum primæ propositionis sit subiectum secundæ, & prædicatum secundæ sit subiectum tertiæ, et sic deinceps, quasi per quandam *Catenam* alligatum et connexum, donec tandem ultimum prædicatum dicatur de subiecto propositionis primæ. Vocari solet hoc Argumentandi genus, *Stoicum*, quia a Stoicis putatur primò excogitatum. Cuins exemplum, inter multa alia, hoc vnum esse potest.

*Crebrò conuiuari, præbet occasionē crapulae,
Crapula, varit cruditatem.*

Cruditas generat morbos,

Morbi accelerant mortem, ergo (à primo ad ultimum)

Crebrò conuiuari, accellerat mortem.

Hinc illud Hippocratis Coi, medici peritissimi

simi plures periere gula quam gladio. Illudque Siracidis, propter crapulam, multi obierunt: qui autem abstinens est, adiuciet vitam, Sirac. 37. Dissoluitur Sorites, duobus modis primò, si omnes partes & connexiones non fuerint necessariae, ut hoc sequens ridiculum à combibonibus & ebrietati deditis, vulgò usurpatum, ut,

*Qui bene bibit, bene dormit,
 Qui bene dormit, nil mali cogitat,
 Qui nil mali cogitat, saluus erit, ergo,
 Qui bene bibit, saluus erit.*

Argumentum, compotoribus dignissimum: similes habent labra lectucas, Primò, huius lepidi soritis omnes connexiones, non sunt necessariae, Qui enim benè & strenuè bibit, saepe numero malè & inquietè dormit, secū dū illud Salamonis: Et erit sicut dormiens in medio mari, & quasi sopitus gubernator, amisso clauo, Prou. 23.

Hoc potius consilium sequendum, ego iudico, *Ut sis nocte levis, sit tibi cena brevis.*

Scholasticis pauperioribus, hoc non suadeo: ii etenim aut nullam cœnam, aut rariùs magnam habent: Pauperes scholastici, Luculli esse non possunt. Vobis hoc ego dico, inuenibus barbatulis, diuitum filijs, qui nocturnis vestris crapulis, & commestationibus intempestiuis nimium dediti estis. Profectò, hac *Asotia* & intempe-

intemperantia vestra, memoriam (inuentio-
nis *Thesaurum*) multum læditis. Immo, mor-
tem intempestiuam acceleratis, *Atropòsque*
fatalis, vitæ vestræ filū citius abrumpit, quam
vos putatis. secundo, & illud falsum est, quod
hi poratores indè consequi volunt, viz, *qui*
benè dormit, nihil malè cogitare. Ego, è contra
puto, multas cogitationes malas & turpes *Vē-*
tre & cerebro impletis, carnem nostram malam
mouentes & tirillantes, per *Satanae* fraudes
& versutiam, in somno nobis sese offerre, qui-
bus consentiendo & delectando, citius quàm
par est, locum damus. *Nec possum* mihi ad-
huc persuadere, quin rationem peccati habe-
ant, cuius generis (inter alta) sunt *nocturnæ*
Politiones, vt reliqua taceam. Quum itaque,
huius lepidi Soritis partes, non sunt omnes ne-
cessariæ, tales male consequuntur, & in argu-
endo minimè valent.

Diffoluitur secūdò, Sorites, si eius omnes cōnex-
tiones, non sint Affirmātes, vt, Exēpli causa :

Geometria, non est Dialectica,

Dialectica, non est Rhetorica,

Rhetorica est Ars, ergo,

Dialectica, non est Ars, hoc non sequitur.

Doctissimus Keckermannus, ynam hic ex-
ceptionem admitit. Si enim bona & necessa-
ria fuerit Prædicatorum negatiuorum cōnex-
io & vinculum, Negatiuos Sorites non esse

simpliciter reiiciendos putat. Vt, illud Pauli : *Afflictio parit patientiam, patientia experientiam, experientia spem, spes non confundit, ergo afflictio non confundit. Ex Paulo hoc desumptum est, Rom. 5.* Est hic *Sorites*, negatiuus: at tamen bellè sequi & bene cohærere videtis,

Sorites, similis est huic primæ regulæ Antepredicamentali, antea recitatae, scilicet : *Quando alterum de altero, vt de subiecto inferiori predicatur, quicquid de predicato dicitur, illud omne de subiecto quoque dicetur,* vt, homo est animal, animal est viuens, viuens est substantia, ergo homo est substantia.

Redigi potest *Sorites*, in syllogismum Categoricalum, si minor vel secunda propositio, migret in locum primæ vel maioris propositionis, & maior eiusdem, in locum secundæ vel minoris propositionis, vt,

Bara		Omne animal est viuens,
Animalis		Omnis homo est animal, ergo.
Bara		Omnis homo est viuens.

Hæc migratio, & trāsmutatio propositionum, disputantibus facilis est labor, & non iniucūda recordatio. Et enim vt in Ciuitate diutiùs cōmorantibus, iucundum est aliquandò locum & Aerem mutare, & in Tusculano, aut Laurentino

rentino rusticari, sic diù & intentè ratiocinantibus contingere solet: varietas enim multum delectat.

*Ex meo propinquo Rure, hoc capio Commodi,
Neque agri, neque urbis odium me unquam
percipit:*

Vbi satietas capit fieri, commuto locum.

Laches senex, ex Eunuchio Terentiij.

Ista senis verba, hoc in loco (nescio quomodò) in mentē mihi venerūt, & me senē, scribendo & rescribendo, & mecum meditando & argumentando lassatum & ferè attritum, aliquantulum recrearunt. Vos verò Iuvenes antequā estis senes, aut saltem prouectioris ætatis homines quā adhuc estis, *cessationem istam expectare non debetis.*

De Fallaciis

Fallacie aut in-	Verbis,	Æquiuocatio vnius uerbi. Ambiguitas totius orationis. Coniunctio distrahendorum. Disiunctio coniungendorum. Accentus, non rectè positus. Figura Dictionis, seu externa forma orationis.
	Rebus.	Accidens, seu fallacia Accidētis. Dictū ex parte, pro Simpliciter. Petitio Principij, seu quæstionis controuersæ. Non Causa, pro vera Causa. Plura rogata, pro vno posita.

Quod verò ad hæc, seu Monstra, seu nomina, Monstruosa attinet, qualia sunt ista, Dilemma cornutum, Crocodilites illaqueans, Pseudomenos mentiens & dissimulans, *Violentum proprio laqueo* (tanquam alius *Indas*) seipsū strangulans, & huiusmodi, non sunt ita per-
 timescenda, vt scholasticorum vulgus vulgò putat. Seu igitur ex *Africa* (vnde monstra venire solent) seu à quacunque alià Mundi plaga & Orbis cardine huc apportentur, nihil refert. Et adhuc addam, etiamsi *Protagoras* & *Euathlus discipulus suus* (quorum in arguendo subtilitas, à veteribus multum est decantata)
 contra

contra vos disputando, regerendo, & cauillando steterint, hæc monstrosa Argumenta & Argutiæ hinc deductæ, non sunt multum per-
 timescenda vobis, si volueritis. Facile enim hæc omnia, & illis simillima quæcunque, dilui possunt, si in bonam Syllogismi formam redigantur. Hæc vnica admonitio, plurimos nodos, quamuis Gordianos, facillimè secat & dissoluit. Itaque hanc cautionem, præ cæteris, nullo modo à vobis negligendam, iudico.

Tenenda est etiam, hæc aurea Regula: scilicet, *Falsa esse neganda, vera concedenda, dubia & ambigua, cuius esse distinguenda.* Dico rursus, caute ne Paralogysmus crescat, *elidatur in seruine.* Neque Opponentem progredi sinatis, antequam ambiguitatem sustuleritis, modò commodè possitis. Sitque, tam in Opponente, quam Respondente, amor & desiderium veritatis. Hæc vnica regula, auro terræ *Hauilah præstantior est, & tamen Aurum illius terræ, optimum est, Gen. 2.*

Vox ambigua, quàm sit almæ veritati inimica, omni-que rerum bonarum insidiosa, omnes autores boni, *Cicero, Aristoteles, Boetius, methodicus Galenus*, & reliqui quos legere & inuenire poteritis, serio & frequenter, ad nostram vtilitatem inculcare solent. Quæ de re, pulchrâ admonitionem habet Galenus, de *Methodo, lib. 1, cap. 5.* *Vita nostra (inquit)*

ambiguus est referta : Quæ, nisi distinguantur, necesse est tetrīs errorum tenebris, pulcherrimas rerum notitias, inuolui & perturbari.

Fallacia, in verbis.

AEqui-uocatio verbi, qualis mala hæc argumentatio esse cernitur.

1.

Da		Quicquid loquitur est homo,
Loquitur. ri.		Psittacus avis loquitur, ergo,
j.		Psittacus avis, est homo.

Psittacus olim, *Cæsarem Imp.* his verbis salutabat, *Aue Cæsar Auguste.* Et quum Imperator, huius instructori nihil numeraret, avis edocta addidit, *Oleum & operam perdidit.* Est **AE**qui-uocatio, in voce (loquitur) Itaque, maiori respondeudum est, & dicendum, quicquid distinctè, articulatè, & naturaliter loquitur, est homo. Psittaci, Picæ, & Merulæ, similesque aves garrulæ & loquaces, hoc modo nō loquuntur: Argumentum igitur malum est, constans ex quatuor Terminis.

Eiusmodi **AE**qui-uocatione, Romani (in declinatione sua , solito deteriores) Antiochum olim deceperunt: cum quo pacti erant, de Nauium dimidio reddendo. Itaque, singulas naues dissecuerunt, & cuiusque dimidiam partem, dolose reddiderunt. Sicque lusit *Æsopus Mercurium* (ita enim legimus) cui ex nucibus

nucibus, dimidium promiserat, postea nucleos comedens, Mercurio reliquit Cortices, & putamina. In his duobus exemplis, ambiguitas est in voce (*Dimidii*) quam, una pars de *Dimiduo* summæ intellexit, altera de *Dimiduo* materiæ.

Ambiguitas totius Orationis: vt, interroganti Pyrrho, an vinceret Romanos, respondit Oraculum,

2.

Aio te Æacide, Romanos vincere posse.

Quæ oratio, non est Categorica, sed tota Ambigua. Nam, an *Æacides* (qui est *Pyrrhus*) vinceret Romanos, an Romani *Pyrrhum*, ambiguum facit. Romani, hanc Fallaciam & deceptionem, postea soluerunt ferro, Similiterque, cum inexplicabili illo nodo Gordiano, fecit *Alexander verè Magnus*. Non enim patitur belligerans Mauors, lenta consilia. Bonū est hoc solutionis genus, in Campo Martio, & expeditum, cum ad manus, melius non occurrat. *Non vacat, neque est Ocium, Legisperitos & togatos homines semper inter Arma consilere.*

Rursus, Oraculum præcedens (*posse*) dicit, possibilitatem quandam promittens, tempus certum & determinatum non designans. Redigatur in syllogismi formam, & tum facilius hic occultans, latro (ad decipiendum natus) deprehenditur: scilicet, Oraculo credendum est,

hoc est Oraculum ergo huic credendum est. Hæc maior est distinguenda: & dicendum, Oraculo Diuino credendum est, non Diabolico. *Nam Dii Gentium, Dæmonia, Psal. 95.* Minor etiam Ambigua est, itaque conclusio ex talibus præmissis, rectè sequi non potest. Romanenses nostri similiter, ambiguè ratiocinari volunt, si eos quis malè & captiosè progredi permisserit, hoc modo.

Fides sine	Da		Fides, sine operibus iustificat,
operibus.	rap		Fides, sine operibus, mortua est, ergo
	ti.		Aliquod mortuum iustificat.

Maiorem (pace illorum) sic distinguimus: Omnis vera fides, sine bonis Operibus (tanquam causis) verè nos iustificat, i, apprehendit iusticiam Christi, qui est iusticia nostra: Minorem etiam negamus: Fides enim vera, nunquam est sine bonis operibus, & ob eam causam, nunquam mortua aut ociosa esse potest. Non tamen fidem veram præcedunt, sed (ut debent) subsequuntur. *Bona opera sequuntur iustificatum, non præcedunt iustificandum, Augustin. de fide & Operib. Cap. 14. Tom. 4.* Romanensium igitur de mortua fide, mortua conclusio non sequitur, aut malè & contortè sequitur, ut hic videtis.

Coniunctio distrahendorum: cuius exemplum, illud Siracides, *cap. 38. 1*, aliqui producunt. *Honora Medicum propter necessitatem,*
ergo

ergo Medicus, tempore necessitatis (tantum) est honorandus. Hæc (inquiunt) est fallacia Compositionis : iunguntur enim hæc verba (*propter necessitatem*) præcedentibus, cum ad sequentia potius pertineant, ut illi putant. Sic enim verba legi volunt : *honora Medicum, propter necessitatem etenim creavit eum altissimus.*

Huc etiam pertinet, illud patris senis, & filii Schol.
sui à scholis domum revertentis. Libenter ex. Oxon.
perirer (mi fili) quomodo Oxonii profeceris.
Hinc (mi pater) illud faciliè cognosces, inquit 06
filius. Habemus hinc (ut vides) oua tria : proba-
bo ea esse sex. Perge, mi fili. Tria (inquit) oua,
sunt vnum & duo : at tria, vnum, & duo, sunt
sex, ergo hæc tria, sex oua sunt. Pater subridēs,
benè (inquit) fili profecisti. Ego & mater tua,
hæc tria comedemus, tu reliqua tria, sume in
Canam tuam. Argumentum quippè istud, re-
muneratione & mercede dignum iudicamus.
Solutio profecto, tali Sophismate dignissi-
ma.

Porro, si animaduertatis (iuvenes) huius fal-
laciæ nomen, seipsum prodit. Quandoque
enim, aliqua coniuncta videritis, quæ distra-
henda sunt, ad hanc fallaciam pertinere, con-
fidenter concludere poteritis. Referrì etiam
poreft, ad Fallaciam Accentus: Punctus enim
& distinctio periodi, à vero suo loco & centro
est

est transmutatus.

4. Disiunctio coniungendorum, quale hoc est, quod hic subsequitur.

Da | Quicumque persecutionem patiuntur, sunt
beati:

ri. | Romanenses persecutionem patiuntur, ergo
j. | Romanenses, sunt beati.

Omittitur in maiori propositione (*Propter iusticiam*) sic enim legi debet: *Beati, qui persecutionem patiuntur, propter iusticiam, Mat. 5.* Papicolæ verò, propter errores & hæreses suos incarcerationantur, aut propter prodicionem in patriam suam charissimam & bonum principem, cui in Domino obedire debent omnes, etiamsi *Nabuchadonoser* fuerit, aut aliquis *Nero*, quem *Paulus* *Leonē* vocat, 2. Tim. 4. *Occidi tales (proditores) possunt, coronari non possunt, nisi panituerint & recipiscant, ut Cyprianus Martyr loquitur, de Simplic. Prælator. Tract. 3.*

Monachus quidam olim, ex *Salomonis Ecclesiaste*, sic lepidè argumentatus est.

Ce | Nihil est in hac vita melius, quàm lætari,
sa- | Nos Monachi lætamur, & iucundi sumus, ergo,
re. | Nil meliùs facere poterimus.

Salamon verò prudens, sic non loquitur, sed hoc modo: *nihil est melius quàm lætari & facere benè, Ecclesiastes. 3.* Iaque negamus maiorem propositionem, *Omisit Monachus (facere benè)* quodque suis coniungendum, fraudulenter

dulenter disiungit. Faceti homines, pro Culina & Ventre disputantes : ex Comico scilicet didicerunt,

Sine Cerere & Baccho, friget Venus.

Sententiæ, quæ ex autoribus truncatè, mutilatè, & circumcilè, (vt vetus pater Irenæus loquitur) citari solent, ad has duas fallacias, Compositionis & Diuisionis, referri possunt. Quæ fraudem & deceptionem, Diabolus, & hæretici omnes imitari solent.

Fallacia Accentus est, si quis syllabam breuē, cum longa confundat, vt, si nullam fecerit distinctionem inter leporem (*substantiam*) & leporem (*accidens*) quæ tamen hoc versu sequente, belle fecernuntur.

In syluis Leporem, ast in verbis, quare leporem.
Similiter, malum est fugiendum, ergo pomum est fugiendum, quia malum. Hoc in loco, quia de Pomo mentionem facimus, & vos Adolescentes, pomorum esu plurimam delectemini, lapsus Adæ parentis nostri & Protoplasti, hic commodè meminisse poteritis, qui ex Pomi interdicti esu, nos omnes secum, eiusdem criminis reos fecit.

Adam, primus homo, damnabat secula Pomo.
Nisi SEMEN benedictum, SEMEN inquam benedictum, interuocasset: Gen. 3. Adolescentes cum sitis, hoc ne obliuiscamini, obsecro. Namque, contra hanc pomorum crapulam & ingurgi-

gurgitationem, hoc *Alexi-pharmacum*, antidotum optimum & præstantissimum esse, ausim vobis certò affirmare.

Est etiam aliud, cuius vos hic admonitos esse cuperem, atque benè spero, (modò in rem vestram) me vobis faciliùs persuasurum. Sunt apud nostros Oxonienses Oppidanos, boni quidam & simplices (non *Mæchi*) sed *Mechanici homines*, qui *Pomaria* habent valdè pulcherrima, omnes generis fructibus adeò referta, vt *Adamum & Euam* rursus decipere possint, si nunc apud nos terrestres, viuerent, nisi meliùs cauerint. Non est vt vobis loca designem, aut digito ea demonstrem, vbi sunt. Vobis enim satis benè nota esse (si meministis) audacter ausim pronunciare. Sinite quæso possessores suos, aliqua poma inter vos possidere, omnia obsecro & singula, nolite auferre. Honestà est hæc petitio, negare non poteritis. Et ego vestro uomine, hoc spondere & *Stipulari* volo, proximo Autumnali tempore; cum Poma & fructus vestri rursus maturefcere cæperint, (secundum consuetudinem nostræ *Academiæ*) iterum ad futuros, vestraque *Pomaria* presto visitaturos. Iason, validus iuuenis, strenuus & nobilis, ex vigilantissimi Draconis faucibus, Aureum vellus sustulit, & vitæ cum periculo, domum reportauit. Habet *Academia nostra*, etiam Iasones suos, qui

qui neque vos, neque latrantes, vestros Molossos, verentur.

Augustinus pater, in Confessionum suarum libris, in Pomis aliorum suffurandis, furtum & crimen suum, dolendo & mærendo confite-
tur, ut vos (iuvenes) eius exemplo cauere &
pænitere possitis. Sed vos adhuc, Augustini nō
estis: satis est vobis (forsan) si in posterum,
tales fueritis.

Aliud huius Fallaciæ vulgatum & tritum
exemplum, hoc esse potest, melius enim nunc
non occurrit. Omnis Ara est sacra, vel con-
secrata: Porcorum stabulum (cum aspiratione)
est hara, sacra vel consecrata, igitur. Et,
omnis iustus est æquus, Aristides est iustus, ergo
Aristides est equus, & Caballus hinniens, Bu-
cephalo, aut Bucke equo meo (quem nuper
habui) aut Crabbe equo proximi mei nō dissi-
milis: quam fallaciam, hic sequens versus dete-
git planissimè.

Dixerat hic æquum, sed tulit alter, Equum.
Videtis Dyphthongum mutare sensum, ut ob-
seruantibus vobis, facile fuerit diiudicare.

Et porrò, notate quæso, quæcunque dicun-
tur per Mimesim, aut obiectionem & Ironiā
à sensu proprio ad alium translata & retorta,
ad hanc fallaciam Accentus pertinere, & refer-
ri possunt singula, quæcunque.

Figura Dictionis, seu forma orationis ex-
terna

terna, sæpenumero multiplicem errorem creat, propter Phrasæos Grammatices, & linguarum ignorantiam: quarum cognitionem, ego senex, nunquam habui. Namque, me puero, Hebraicæ aut Græcæ linguæ, aut Ciceroni fauentes, de hæresi statim, apud nos Oxonienses suspecti habebantur. Hocque hæreticorum nomen inuidiosum, à proficiendo multum deterrebat nos.

Vostamen (Iuvenes studiosi) eas nunc ad discite, si in posterum, docti theologi haberi velitis, Huius fallaciæ exemplum, hoc Romanensium esse potest. *Hæreticum hominem denita*, Tit. 3. id est (vt illorum quidam interpretantur) *de hac vita* tolle, & igne combure. Hocque sic explicant, vt aliquem habeant S. Scripturæ contextum, quo nos Protestantes (quos Hæreticos hæretici vocant) comburendos & igne consumendos, comprobent. Porro, vocabulum (*Denita*) ac si *Laniones* esset, in duo frustra male secant, quod iungendum & conglutinandum illis fuerit. *Maledicta Glossa, qua textum corrumpit: Græca enim lectio habet, ~~καὶ~~ Tit. 3. versu decimo.*

Varia phrasis Hebraica & Græca, externè sumpta, apud imperitos, aliter sonat quam reuera est. Habent Hebræi suos *Habraismos*, & Græci Atticismos suos. Itaque omnibus Theologis, harum linguarum cognitionem utilem

tilem esse, *Augustinus, Hieronymus, Origenes*, & omnes docti arbitrantur : exceptis *Romanensibus*, qui cum ipsi sint corrupti & impuri homines, ipsos fontes esse corruptos contendunt. Si fontes corrumpuntur (*O boni viri*) vos, vos inquam huius impietatis & nefarii sceleris rei estis, qui eos tam male & negligenter conservastis.

Fallacia in Rebus.

Rerum Fallaciæ subsequuntur, quarum quinque genera vulgò recitari solent . Accidentis Fallacia, rerum prima sit; quæ est, quando accidentia corporis & animi confusè, sine vlla distinctione & discrimine, coniunguntur : *ut Noe, perfectus fuit in generationibus suis, & fuit ebrius, Gen. 6. ergo perfectus ebrius fuit. Et Petrus, Apostolus fuit, & frigidus, ad Pontificis prunas sese calefaciens, Ioan. 18, ergo Petrus fuit frigidus Apostolus. Et, Demosthenes fuit Orator, & homo malus, ergo fuit malus Orator.*

Hæc fallacia, potest etiam ad fallaciam Compositionis referri, quia hîc ea coniunguntur, quæ disiungi & separari debent.

Porrò, & hoc notari potest, verbum (*frigere*) esse ambiguum: frigidus orator is dici potest, qui parum vehemens est, *ut de Theophrasto*
&

& eius discipulis, notat *M. Cicero, i. Officiorum*. Et frigidum (sine Metaphora) contrarium est calido.

Demost.
Angina.



Antedicti Demosthenis leuitatem & corruptelam, Plutarchus, in hunc modum pulcrè depingit, Polo cuidam histrioni, aliquando ad Demosthenem dicenti, *bidui certamine, se Talentum pro mercede retulisse*, respondit, *ego quinq; Talentis, unius Diei silentium vendidi*. Plutarch. *de Orator, 2. 1. a.* Excusabat silentium suum, quod laborans Angina, loqui non potuerit. Non laborabat Angina, sed *Argent-Angina*, vt alius de eo lepidè & falsè pronuntiabat. Habet hæc nostra (ferrotestacea) ætas mala Dan. 2. plures *Demosthenes*, hoc morbo contagioso, malè laborantes.

Dictum ex parte, pro simpliciter: vt, *Æthiops est albus* dentibus, ergo *Æthiops est albus simpliciter*, In syllogismum redigamus, & tum Elenchum vt furem, facilius deprehendemus.

Quicumque est albus dentibus, est albus simpliciter,

Æthyops, est albus dentibus, ergo,

Æthyops, est albus simpliciter.

Nego Maiorem propositionem, nam ea non est vera. Apud Tribalos, patrē suum immolare, laudabile est, ergo simpliciter hoc est *Laudabile*, hoc consequens, inconsequens est,

ex hoc loco, vid. *Arist. 2. Topicor.*

Hi Tribali (vt illud vobis hic expediam) populi sunt *Thraciae*, quæ Dittio, nunc *Romania* nominatur, & ad *Europam* spectat, qui usque ad Istrum flumen, fines suos dilatant & producunt.

Similiter, in Epistolis *Pauli*, quædam intellectu difficilia sunt, Vt *Petrus testatur*, 2. *Petr.* 3. ergo Scriptura est simpliciter difficilis, & per consequens, à Laicis hominibus (quos *Cænes & Sues vocant Romanenses nostri*) non legenda, aut intensius meditando. Hoc Sophisma vocatur à *Barib. Kekermanno*, à Limitato ad non limitatum. Et tale est hoc *Anabaptistarum* (quos nulla *Respublica* tolerare potest) furiosorum & fanaticorum hominum.

Fe- ri- o.	Quod est abrogatum, non valet, Vetus Testamentum est abrogatum, ergo, Vetus Testamentum non valet.
------------------	--

Eorum minor Limitanda est: Vetus namque Testamentum est abrogatum, non quoad Substantiam, sed quoad Accidentia & Circumstantias, Itaque, captiose & sophisticè arguunt, & ab hoc loco redargendi sunt.

Petitio Principii, seu quæstionis controuersæ, est quum ignotum aut dubium, probetur per æquè ignotum et dubium: sic itaque aduersarii nostri, contra nos ratiocinantur.

Sancti Mortui, nostras cogitationes norant, ergo,

Sancti Mortui, à nobis inuocandi sunt.

Nego antecedens : nam, an Sancti Mortui, nostras cogitationes cognoscant an non, inter nos controuertitur, hæc questio est. *Augustinus* Pater, negare videtur. *Si inquit, rebus uiuentium interessent mortuorum anima, me ipsum pia mater, nullo modo desereret. Sed profectò, quod sacer Psalmus personat, verum est, quoniam pater et mater dereliquerunt me, Dominus autem assumpsit me, ex Psal. 26. De cur, pro mortuis, Cap. 13.*

Similiter, Episcop. Romanus, iure possidet magnam Italia partem, quia magna Italia pars fuit ei à Constantino Magno donata, ut somniant Romanenses nostri. Sed illud quæstio est, an talis Donatio vnquam fuerit, annon.

Ordinaria in Ius Canonicum Glossa, hanc Donationem (Paleam) esse pronunciat. Et, si concedamus talem Donationem vnquam existisse, non tamen valere, magnus ille Iurisconsultus Bartolus affirmat, in Proemio Digestorum. Itaque, aduersarii nostri, principium petunt et nugantur. Solidius argumententur, si docti homines haberi volunt, neque hoc modo, pretiosum tempus ociòse conterant.

Non causa pro causa, adhuc restat explicanda nobis, quæ est, quando Causæ per accidens adducuntur

adducuntur tanquàm veræ & genuinæ causæ:
 vt, Diues ille apud *S. Lucam* damnatus est,
 ergo diuitiæ damnant homines. Responden-
 dum est, diuitias non esse illius damnationis
 causam, sed earum abusus. Similiter, vinum
 inebriare solet, ergo vinum est malum. Res-
 pondendum, vinum per se, hoc non facere, sed
 immodicum eius vsus. Benè igitur Chrysost-
 omus, *Non vinum, sed ebrietas em crimineris, in*
Mat, 17. Homil, 59.

Rursus, ex lectione *S. scripturæ*, nascuntur hæ-
 retici, ergo *S. scripturæ* non sunt legendæ
 Laicis. In syllogismum redigamus, tuncque
 Elenchum hunc & paralogysmum clarius per-
 spicietis.

Da | Quodcunque gignit hæreses, fugiendum est,
 ri- | Scriptura gignit hæreses, ergo,
 j. | Scriptura est fugienda, & non legenda laicis.

Nego minorem propositionem. *Scriptura e-*
nim, hoc non facit propriè et per se, sed nostra
ignorantia: Erratis, nescientes scripturas,
Ioan, 5. Dices non legi: non est hac excusatio,
sed crimen, Chrysostom in Hebr. Homil. 17.

Hoc eorum argumentum, in illos sic retorque-
 mus: docti olim homines, fuerunt, vt *Nonatus*
Pellagius, Arrius, Macedonius, similesque Hæ-
 retici: qui ex *Scripturis* malè intellectis, tur-
 piter & periculose errarunt, ergo sacræ literæ
 non sunt à doctis legendæ, & per consequens

nec ab ipsis Romanensibus, quamvis magistri (Nostrandi) & magni *Rabbini* vulgò existimètur. Respondemus itaque vt antea, Scripturas non esse errorum veras & iustas causas, sed nostram ignorantiam, & cognitionis imbecillitatem : *adhuc enim cognoscimus ex parte*, 1. Cor. 13. Profectò, cognoscimus ex parte, & minùs cognoscimus, quia pauperes sumus, & illis Mediis destituti, quibus docti & literati esse possimus. Itaque, quicunque volunt Ministros verbi Dei, ex puris Eleemosynis viuere & familiam sustentare, parùm confiderate loquuntur. Loquuntur *pro seipsis*, *pro Ecclesia* & *Doctrina non loquuntur*. Atque, vt iam finia : Plura Rogata, pro vno posita, sunt, quando plura simul interrogamus, ad quæ non possumus rectè respondere, nisi separentur : vt, an Duo & tria sint paria vel imparia? *An Iacob & Esau, an Cain & Abel*, sint boni an mali homines ? Tales interrogationes friuolæ sunt & captiosæ.

Optima regula est, & omnium facillima, Adversarium disputantē iubere, & etiam urgere, *Argumentum suum, in syllogismi* formam bonam redigere & disponere. Hoc etenim est Dialecticè, & formaliter disputare. Tunc Paralogyfimi, & Deceptiones omnes, multò faciliùs nobis innotescunt. Itaque, ad maiores nostros in vera doctrinâ progressus, & ad veritatem

tatem citius inueniendam (in quam omnes boni & ingenui homines, sedulo incumbere debent) hanc nobilem regulam ne contemnatis, sed in memoriam vestram recondatis, etiam atque etiam vos obsecro.

Sed, ut videtis, sol Horizontem nostrum reliquit, Nox appropinquat, & Zantippa ad Cœnā vocat: cui, si non actutum parueo, actum erit & de Cœna mea, & amicitia nostra. Heus tu bone vir, cur non properas? Properandum videtis, bis vocor. Iam venio. charissima & suauissima Coniunx. *Responsio mollis, frangit iram sermo durus, suscit at furorem, Prou. 15.* Nolo ego (qua nunc sum mente) furorem vxoris meæ prouocare. *Crabrones irritare, non est tutum.*

Quocirca, ut Aristoteles dicit, quoniam vitiose & iniquæ concertationes cum quibusdam futuræ sunt necessario, prudenter videndum quibus cum disputamus. Neq; enim cum rixosis contendere debemus, nec quemlibet in societatem exercitationis recipere, ut Arist. prudenter admonet, 8, Topic. cap. 5.

Concludamus cum Oratore Romano, disputantium inter se reprehensiones, non sunt vituperanda: maledicta, contumelia, tum iracundæ contentionēs, concertationesq; in disputando pertinentes, indignæ philosopho, mihi videri solent. Tūc Torquatus inquit, prorsus assentior. *Neq; enim disputari*

*disputari sine reprehensione, nec cum Iracundia
aut pertinacia, rectè disputari potest, Cicer. de
finib. lib. pri. Candidis & sedatis animis discep
temus, quaeso vos, & obtestor in domino.*

*Ira, furor brevis, animum rege, qui nisi paret
Imperat, hunc frenis, hunc tu compesce catena.
Valete, Iuvenes optimi & suauissimi, & rursus
dico, in Domino (optimi) optime valete. Anno
à verbo Incarnato, 1605, & serenissimi totius
Britaniæ regis Iacobi, prudentissimi, doctissimi,
& religiosissimi principis, per Dei gratiam,
tertio.*

*Soli Deo nostro, laus omnis, honor & gloria,
in omnem æternitatem, Amen.*

**Ioannes Argallus, rector Ecclesiæ
parochialis de Haleswoorth,
apud Suffolcienses
dixit,**

*Quicquid in Saculo peruersorum dogmatum
est, quicquid ad terrenam scientiam pertinet, &
putatur esse robustum, hoc Dialectica arte sub-
uertitur, & instar Incendij, in cineres, famulasq;
dissoluitur: ut probetur nihil, quod putatur esse
fortissimum, Hiero. in Ezech. cap. 25.*

*Disputationis Disciplina, ad omnia genera,
quaestionum, plurimum valet. Tantum ibi ca-
uenda libido rixandi, & puerilis quaedam offen-
satio decipiendi Aduersarium. August. lib. 2. de
Doctr. Chri. cap. 33.*

*Hanc, Ioan. Argalli (S. Theologiae Baccalau-
rei) breuem & succinctam Dialecticam, legi-
mus & benè approbamus. Et, quia plana &
perspicua est, porrò, hic illicque salibus & fa-
cetiis aspersa, Nouitijs & Tyronibus utilem fo-
re, & lectu non indignam iudicamus.*

Ro. Redmayn.

Io. Maplixden, Arch. Suff.

Io. Aldrich.

Excudatur.

Rich. London.

In Passionis Prædicamento, hæc interponenda sunt pag. 40.

Patitur animus, patitur corpus, egrotat animus, egrotat corpus. Egrotat crumena mea, sapius quàm vellem, ex quo morbi genere, vos quaso quorum Marsupium simili morbo laborat, Indicate.

Inter fallacias verborum, in AEquivocatione verbi pag. 170.

*Quis expedit Pfitaco suum xape
Picasque docuit nostra verba conari?*

A. Persu, in Satyras, prologus.

